

راج کہانی



سعید بھٹا

راج کہانی

خالی

راج کہانی

سعید بھٹا

سافہ

راج کھانی — لوک ادب — سعید بھٹا

سانجھ پبلیکیشنز نے نوید حفیظ پر نثر 'لاہور' توں چھپوائے
46/2 مزنگ روڈ، لاہور، پاکستان توں شائع کیتی۔

پہلی وار : 2013ء
مکھ چتر : صابر نذر
گیں : 500
قیمت : 200

Raj Kahani

(Punjabi Folk Lor Book by Saeed Bhutta)

Copyright © 2013 - 1st Edition

Except in Pakistan this book is sold subject to the condition that it shall not, by way of trade or otherwise, be lent, resold, hired out or circulated without the consent of the author or the publisher in any form of binding or cover other than that in which it is published.

Printed by:

Naveed Hafeez Printers, Lahore, Pakistan

Price:

In Pakistan: Rs. 200.00

Published by:

سانجھ

SANJH
PUBLICATIONS

Book Street, 46/2 Mozang Road, Lahore, Pakistan.

Phone: +92 42 37355323. Fax: +92 04 37323950

e-mail: sanjhpk@yahoo.com, sanjhpk@gmail.com

Web: www.sanjhpublications.com

ISBN: 978-969-593-099-1

مشتاق صوفی دے ناں

خالی

سارنی

9	رام چندر
16	راجا کرنال
33	راجا بیرل
52	ملاں دو پیازہ
65	تان سین
71	رادھا بھٹیانی
80	سعد اللہ خاں چنیوٹی
98	بھور سلطان
103	”راج کہانی“ بارے کچھ گلاں
107	کہانی وارفرہنگ
111	سوے
112	ناں
114	تھاں

خالی

رام چندر

ایہہ سورج بنسی راجپوت ہوئیں۔ اجودھیا ریاست دا مالک ہويا ہے باپ ایہناں دا، جسرت۔ ایہہ جسرت دے پتر ہن۔ راجے جسرت دے گھر ترائے رانیاں ہوئیں۔ پہلی اچھراں رانی ہوئی ہے جیس دے وچوں رام چندر ہويا ہے۔ رام چندر نوں ہندواں اوتار منیا ہے۔ دُونی دے وچوں کچھن ہے۔ تریں رانی دا ناں کیکی ہويا ہے۔ اوس دے وچوں دو پتر ہوئیں نکل تے ساہ دیو۔ ایہہ چار پتر ہوئیں راجے جسرت دے، تریں رانیاں چوں۔ راجے جسرت کسے راجپوتانی ریاست تے حملہ کیتا ہے۔ لڑائی ہوئی ہے۔ فوجاں جسرت دیاں چل پئیں۔ راجا جسرت تے رانی کیکی ہک تھ دے وچ اسوار ہان۔ دشمن حملہ راجے جسرت تے کر دتا ہے۔ رانی تلوار لے کے لڑن لگ پئی ہے۔ راجا جسرت بڑا زخمی ہويا ہے۔ رانی لڑ کے گھیرا تروڑیا ہے دشمن دا۔ اتنے نوں فوجاں نوں غیرت آئی ہے کہ ہک عورت اساڈی لڑ رہی ہے تے اسیں بھٹے جانے ہاں۔ فوجاں ہٹ پئیں۔ اوہناں دشمن دی فوج نوں بھجیا ہے۔ راجے جسرت نوں خوشی آئی ہے کہ رائے توہیں قربانی دا کمال کر دتا ہے۔ اوہراں ہک کپڑا لے آ صاف جیہا، جیس دے اُتے میں تینوں عہد نامہ لکھ دیواں۔ اوس لکھ دتا ہے بھئی اپنی زندگی وچ توں جیہڑے دو انعام منکسیں، میں تینوں دیساں۔ رانی اوہ کول کر لیا ہے۔ ہٹ آئیں۔ ایہہ نکل تے ساہ دیو دی ماں ہائی۔ اچھراں چوں رام چندر ہويا ہے۔ کچھن دی ماں دا ناں بھلا کھلا ہے۔ کچھن پورا غلام ہويا ہے، ایس بھرا رام چندر دا۔

راجے جسرت نوں آیاں کچھ عرصہ ہو گیا ہے۔ ایہہ راجپوت دو قسم دی شادی

کریندے ہائے۔ اک شادی کاج سدیا جاندا ہا۔ دوئی شادی داناں سوئمر سدیا جاندا ہا، جیہدے اُتے کائی شرط لین ہا۔ رانی سیتا ہوئی ہے۔ اوس دے پیو سوئمر رکھیا ہے بھئی ایہہ شرط میری جیہڑا راجپوت پوری کر لسی، میں اوس نوں دے چھوڑیاں۔ شرط کیہ ہائی؟ کڑاہ تیل دا بھریا ہويا ہا۔ اوس دے وچ بانس ٹھوکیا ہويا۔ بڑا بلند بانس۔ اگوں اوس نوں انج چرخوی لائی ہوئی ہا۔ اوس چرخوی نوں سوراخ ہان۔ اُتے ہک سانگ ہائی، جیس سانگ اُتے مچھی سونے دی ہائی۔ شرط ایہہ ہائی بھئی ویکھنا تیل آلوں ہے۔ کمان دے وچوں تیر کڈھے۔ چرخوی پھر دی پئی ہووے۔ اوہناں سوراخاں وچوں تیر گزر کے مچھی دی اکھ وچ لگے تے میں اوس نوں دیونی ہے سیتا۔ سوئمر تے بڑے بڑے راجپوت اکٹھے ہوئے۔ راجا رام چندر وی ہے۔ گھل گھل کے راجپوت بہہ رہن تیر کوئی نہ لگے۔ وارا ایس رام چندر دا آ گیا ہے۔ اساں تاں مُہندواں دے ویلے دی تصویر ڈٹھی ہے۔ بڑا خوبصورت تے ڈھیر سارا جوان ہے۔ نازک اندام جوان ہويا ہے۔ جتھے تصویر وکھوے ہا، کمان اوس دے تھ وچ وکھیندی ہائی۔ اوس کمان دے وچوں تیر چھلکا ہے۔ ویہدا پٹھوں پیا ہے۔ چکر پھر رہیا ہے چرخوی دا۔ سوراخ چرخوی دے وچوں گزر کے مچھی دی اکھ وچ جا لگا ہے تیر۔ اوس ویلے سیتا دی شادی ہو گئی ہے ایس نال۔ پرنا کے ایہہ گھر لے آیا ہے۔ راجے جسرت بڑیاں خوشیاں منائیاں۔ گل راجپوت ہند دا بلایا ہے۔ ہک سوتے تریہہ قوم ہے راجپوت دی، جیس وچ چھتری راج کل ہن۔ چھ بنس ہن۔ کل راجپوتاں نوں دعوت دی ہے۔ راجے اعلان کیتا ہے اج میں پتر اپنے نوں تخت دیونا ہے۔

رانی کیکی دی ہک سہیلی ہوئی ہے۔ نوکر وی ہوئی سوں۔ اوس آکھیا، ”کیکی بیٹھی ہیں؟“ ”جی آ۔ بیٹھی ہاں۔“ اوس آکھیا، ”اج تیرے پُتر اں دے گل غلامی دا طوق پا رہن تے ساری زندگی نہینے نکلتا۔ توں وی راجپوت دی لڑکی ہیں بیٹھی ٹھہر سور دے تے ہیں۔“ ”کیہ کراں؟“ ”اج راجے کولوں اوہ وعدے منگ بھئی جیڈی اوکھی اکھیائی، میں منساں۔“ سہیلی اوہدی صورت انسان ہائی سیرت شیطان ہائی۔ اوس آکھیا، ”توں راجے نوں آکھ، اوہ وعدے پورے کر۔ راجا آکھسی کیویں؟ توں آکھیں بارہاں سال تائیں تخت میرے پُتر اں نوں دے تے بارہاں سال تائیں رام چندر نوں بن باسی دے،

مطلب ہے جنگل وچ رہے۔ اوتھے رہے جتھے لا پتہ ہووے۔ اسانوں پتہ وی نہ ہووے کتھے ہے۔“ خوشیاں منائیاں جا رہئیں۔ شدیانے بج رہن۔ سازنج رہن۔ راجپوت خوش خوش بن۔ تاجپوشی دے سکے ہو رہن کہ اج رام چندر دے سر اُتے تاج رکھیا جاونہ ہے۔

اچھراں رانی پھولاں نہیں سماندی کہ میرے پُترنوں اج تاج پیا ملدا ہے۔ اتنے ئوں رانی کیکئی شاہی محل وچ، راجے ئوں آکھیا ہے، ”اوہ وعدے تے لکھت تیری۔“ اوس آکھیا، ”منگ۔“ رانی کیکئی آکھیا، ”رام چندر ئوں بن باسی بارھاں سال تے بارھاں سال نکل تے ساہ دیونوں تخت دے۔“ راجا ڈھٹھا ہے بے ہوش ہو گیا ہے۔ غم دے کنیں پہاڑ مڑٹ گئیں۔ پے پٹنے سارے اجودھیا وچ گئیں۔ رام چندر ایہہ گل سُنی ہے بھئی پیو میرے نوں غش توں غش ہے۔ وعدہ نہ پورا کراں تاں راجپوت نہیں۔ جے وعدہ پورا کراں تاں رام چندر نوں بن باسی دیونی ہے۔ رام چندر لگا آیا ہے۔ اوس آکھیا، ”مہاراجیا! اوہ تاں راجپوت دا بچہ وی نہیں نا، جیہڑا اپنے پیو دی زبان نوں گُوڑا کرے۔ اپنے سکھ کان یاں شاہی کان۔ توں روند اکیوں پیا ہیں؟ میں منگ کے تیتھوں بن باسی لینا ہاں۔ اللہ دے واسطے دے چاں۔ اوہ وی تاں بھرا ہن، جیہناں تخت تے بہنا ہیں۔ اوہ کسے ہو دے تاں نہیں جسرت دے ہن تے اوہ میری ماں ہے، جیہڑی ایہہ گل منگ رہی ہے۔ مینوں اچھراں توں گھٹ اوہ وی کائی نہیں۔“ اٹھیا ہے راجا جسرت پُترنوں ہاں نال چاں لایا ہے۔۔ شاوش پُترا شاوش۔ بہت اچھے۔ اوس ویلے رام چندر بن باسی لکھ دتی ہے کہ بارھاں سال تائیں میں بن باسی وچ رہساں۔

جیس ویلے رام چندر تیار ہو گیا ہے تاں سیتا آکھیا ہے، ”میں نال آؤنا ہے۔“ رام چندر آکھیا، ”توں شہزادی ہیں۔ جنگل دا واسا۔ جنگل دے میوہ جات اتے اساڈا گزارہ ہوونا ہے۔“ سیتا آکھیا، ”سبھ کجھ منظور ہے ہک جدائی تیری منظور نہیں۔“ کچھمن آکھیا ہے، ”میں جیس دن داجمیا ہاں، میں تیرا غلام ہاں۔ میں بھرا آپ ئوں جاندا نہیں تیرا۔ میں تیرا دامن کوئی نہیں چھڈنا۔“ رام چندر ٹُر پیا ہے۔ سیتا ٹُر پئی ہے۔ کچھمن ٹُر پیا ہے۔ راجا جسرت ٹُر پیا ہے۔ رانی اچھراں ٹُر پئی ہے۔ مطلب ہے بھرے شہر اجودھیا دے وچ ہک ساہ دیو تے نکل تے اوہناں دی ماں تے ہک اوہ پلین رن، ایہہ چار رہ گئیں۔ دُوا سارا

اجودھیا ٹر پیا ہے۔ ہن رام چندر حیران ہے بھئی شاہی ساری، تخت سارا تباہ ہو جاسی۔
 مگروں کوئی غنیم حملہ چاں کرے، اجودھیا تاں ماریا گیا۔ نہ فوج ہے وِچ نہ بندہ ہے۔ نہ
 لہنی نہ دیونی۔ سیتا تے کچھن نال صلاح کیتی پیس بھئی رات آوندی پئی ہے دریا دے
 کنارے۔ اسیں ایہناں نوں سنوا کے جنگل وڑیے اوس نوں بھئی ایہناں نوں لہیے ای
 نہیں۔ آپے روچٹ کے ہر شے پچھانہ ہٹ جاسی۔ بارہاں سال کٹ کے آجائیں۔
 پچھوں اجودھیا کوئی غنیم نہ مار لے۔ بھرا وی میرے اوکھے ہوسن۔ اوتھوں ایہہ نکلن۔ دریا
 دے کنارے رات آئی ہے۔ ہر شے تھکی ہوئی ہے۔ سیں گئی ہے۔ رام چندر، کچھن تے
 سیتا نوں جگیندا تے وڑے کسے اوس جنگل نوں، اودوں جنگلات بہوں ہوئے، وگا وگا کے
 گھوڑے بہہ رہے، اوہناں دا پتہ ای نہ لگا کہ کدے گئے۔ ایہہ ہر شے ہٹ کے واپس آ
 گئی۔ ماں ساہ دیو تے نکل نوں آکھیا، ”ایہہ تخت تساڈا ہے۔“ اوہناں آکھیا، ”مائے! ماں
 ہونیوں۔ آکھ کچھ نہسے سگدے۔ رام چندر جیہا بھرا بھجایا ہی جنگلاں نوں بارہاں سالوں
 واسطے۔ اساں لعنت کرنی ہے ایس تخت تے۔ اسیں تخت امانتی بہنے ہاں۔“ آہن: جھٹیاں
 چا کے اوس دیاں اتے تخت دے رکھیں۔ بارہاں سال تائیں ساہ دیو تے نکل تخت دے
 اُتے لت نہیں رکھی۔ امانتی تخت ہے۔ جییں دینہہ آیا شالا اوسے نوں نصیب ہووے۔
 اساں تاں غلام ہو کے رہنا ہے۔ ماں نوں کچھ نہیں آکھ سکے۔

ایہہ چلدے چلدے، پنج وئی ہک موضع ہے پہاڑ دا، اوتھے ایہناں جھونپڑا گھتیا
 ہویا ہے۔ سیتا، رام تے کچھن اوتھے رہندن۔ میوے جنگل دے توڑیندن۔ پرندے،
 جنگلاں دا شکار ہڈھ کے اوس دا گوشت کھاندن، کدی کوئی ہرن لبھ جاندا ہے۔ باہمن
 سدیندن۔ فقیر بن کے رہے ہوئے۔ پنج وئی موضعے دا راون ہویا ہے، دھینسر وی سدیندن۔
 دھینسر ایس توں سدیندن، ایس جیڈا عالم ہندو قوم وِچ کوئی نہیں ہویا۔ چاروید ہوئے ہندو
 مذہب دے چواہاں دا حافظ ہویا ہے۔ ایڈا دماغ ہویا پیس بھئی دھینسر سدیا گیا ہے بھئی وہ
 دماغ۔ ایہہ لٹکا دا راجا ہویا ہے۔ ایس دھینسر دے کھرتے دوش دو بھائی ہوئے بھین دا ناں
 روپ نکھا ہے۔ اوہ کواری ہوئی ہے۔ پنج وئی پہاڑ دے وِچ ایہہ رہندے ہان کھر، دوش
 تے روپ نکھا۔ لٹکا دے وِچ راون رہندا ہا جیہوں سراندیپ وی سدیندن۔ روپ نکھا

جنگل دی سیر کریندی آوندی ہے۔ اوس رام چندر جھونپڑی وچ تکیا ہے۔ سیتا وی بیٹھی ہے۔ کچھن وی بیٹھا ہے۔ عاشق ہو گئی رام چندر تے۔ اوہ ہر صبح نوں آ جاوے شام تک بیٹھی رہوے۔ کچھن آ آیا ہے جوں تکیا ہے سیتا روندی بیٹھی ہے۔ اوس کچھیا، ”میری بھین کیہ گل ہے؟“ سیتا آ کھیا، ”رام چندر تاں ہک فرشتہ صفت انسان ہے۔ ایس آلوں تاں مینوں ڈر کوئی نہیں مگر جیس ایلے روپ نکھا آوندی ہے تاں ایسیاں حرکتاں اوہ کریندی ہے، میرے بیٹھیاں رام چندر نال کہ میرے سینے تے چکی جھوپ جاندی ہے غیرت دی۔ ایس علاقے دی ایہہ رانی ہے۔ اسانوں باہمن، مگتے، مسافر، بچ جاندی ہے۔ ایہہ روون ہے۔“ کچھن آ کھیا، ”رو نہیں۔ ہُن اوس آونا کوئی نہیں۔“

روپ نکھا آ گئی۔ کچھن آ کھیا، ”اساڈے جھونپڑے وچ توہیں ایدوں اگانہہ نہیں آونا۔ توں نگ کرینی ہیں۔ نکل جا۔“ اوس آ کھیا، ”وے باہمن! توں ہویا کتھوں دا ہیں مینوں ہوڑن آلا رانی نوں۔ علاقہ اساڈا ہے تے آہدا ہیں اتھے آویں نہیں۔“ کچھن آ کھیا، ”میں تینوں پیا آہناں ہاں نہ آویں۔“ روپ نکھا آ کھیا، ”میں آونا ہئی۔“ ایہدے ہتھ وچ تلوار ہائی، ایس اوہدا تک وڈھ لیا۔ نک وڈھا کے اوہ جاوڑی بھراواں کول روندی، پٹیندی۔ اوتھوں کھر تے دوش چڑھے تے نال فوج، ایہہ وی لڑن کڈھ ڈڑھے۔ ایہناں کھرو مار گھتیا تے دوش وی مار چھڈیا۔

اوس ویلے ایہہ خبراں راون تے اپڑیاں۔ انج انج باہمن ہین، مسافر ہین۔ ایہہ قصہ ہے۔ اوس آ کھیا، ”الو دیاں پٹھیاں او! ایہہ رام چندر تے کچھن ہین راجے جسرت دے، جیہناں اتنی کجھ کیتی ہے۔ ہور کاہیں باہمن لڑنا ہا اساڈے نال۔“ اوہنوں یقین ہا کہ انج میں کامیاب نہیں ہو سکدا۔ جیڈی گاہل اوہناں کڈھی ہے ایڈی کڈھاں۔ رام چندر تے کچھن شکار چلے گئیں۔ رام چندر کڑا مار دتا ہے، ”سیتا! ایس توں باہر نہ نکلیں۔ ایس دے اندر کائی شے وی نہ آوسی، انشاء اللہ۔“ اوہ وگ گئیں۔ وگ گئیں تاں راون ہک پنڈت بن کے، دھنی تائیں سفید داڑھا چٹا تے ہتھ اچ سوٹا تے کمبدا تے جمیل گل اچ، ایہہ آپہنچیا۔ ایس صدا کیتی، ”ہلا بھئی رام کے رام کی بھکھیا منگدا ہاں۔“ سیتا آ کھیا، ”اندر آ جاتے لے لے۔“ اوس آ کھیا، ”میں بارہاں سال دا روزہ رکھیا ہویا ہے تے میں کسے

دے اندر نہیں آؤنا مینوں منع ہے۔“ اندر آ ہی ناہی سکدا۔ سیتا آ کھیا، ”مینوں اپنے پتی دا حکم ہے۔ ایس لیکے توں توہیں باہر نہیں نکلتا۔“ راوَن آ کھیا، ”میں تیتھوں ہک گل پچھنا ہاں۔ پتی وڈا ہے یاں رام وڈا ہے؟“ اکھے، ”رام وڈا ہے۔“ اکھے، ”میں رام دا نام گھنتا ہاں۔ توں پتی داناں کھینی ہیں۔“ اتھے سیتا نوں نکلتا پیا ہے۔ سیتا باہر نکلی تے اوس چالئی تے لے کے لنکا چلا گیا۔

رام چندر تے کچھن نوں پتہ لگا۔ اہجے بارہاں سالوں دے وچوں عرصہ رہندا ہا۔ پچھانہہ تاں ہٹ ناہن سکدے۔ اوس ویلے ہک راجا ہویا ہے، جیس دا جرنیل ہنومان ہویا ہے۔ اوس راجے نوں جا ملے۔ اسیں رام چندر تے کچھن، راجے جسرت دے لڑکے ہاں۔ ایہہ مصیبت بن گئی ہے۔ اسوں راوَن دے ملک لنکا تے حملہ کرنا ہے۔ اوس فوج وی دتی ہے تے ایہہ جرنیل وی دتا ہے۔ اوٹھوں ایہہ چڑھے ہین۔ ایہہ سمندر پار کر کے، لنکا دے اُتے آ کے لڑائی شروع کر دتی ہے۔ سیتا کچھدی ہے راوَن توں، ”مت تہانوں مار لین۔“ اوس آ کھیا، ”نہیں سیتا۔ اسانوں مار نہیں سکدے، جیہڑا مشرق آلا بُرج ہے نا، ایس دے وچ ہے بارود۔ اوس دے وچ آتشی تیر نہ وگاؤن تاں لنکا ماری نہیں جاندی۔ ایہنا تھوں فتح ای نہیں ہوندی۔“ سیتا، رام چندر آل اکھوا بھجیا ہے کہ مشرق آ لے برج اچ آتشی تیر مارو تاں لنکا مرلیسی۔ جیس توں پیا آہدا ہے:

گھر بھیتر دھینسر ماریا، سڑ لنکا جائے

رام چندر تے ایہہ گل آئی تاں اوہناں آتشی تیر وگاؤے۔ بُرج وچ لگن۔ بُرج وچ بارود ہا، اوہنوں اگ لگ گئی۔ ساری لنکا سڑ گئی ہے۔ اوس ویلے راوَن پکڑیا گیا ہے۔ راوَن نوں پکڑ لیاندانیں۔ جیس ویلے مارن لگے تاں راوَن آ کھیا، ”لوکو! آخری وقت ہے میرا۔ ہک نصیحت لکھ لیو۔“ ”کیہ؟“ اکھے:

جگ جیتنے سے بہتر ہے نفس جیت لینا

اس نفس کے ہی مارے میں مارا جا رہا ہوں

اتنے نوں بارہاں سال گزر گئے ہاں۔ ایہہ ہٹ کے آؤن۔ ساہ دیو تے نکل اٹھیں دے لگے آؤن۔ اوہ آ کے پیراں تے ڈھے پین۔ اوہناں آ کھیا، ”رام چندر! ماں

اساڈی نوں اسیں کجھ نہیں آکھ سکدے۔ بزرگ ہوئی۔ کیہ آکھیے؟ مگر اوہ جوڑا تیرا تخت
تے پیا ہے۔ خدا دی قسم امانتی تخت رکھیا ہويا ہے۔ اساں اج تائیں تخت تے لت نہیں
دتی۔ تخت دا مالک ہیں ای توں۔ اسیں نوکر تیرے۔“

راجا کرنال

راجا اشوک بنارس دا راجا ہویا ہے۔ ہر بادشاہ یاں راجے نُوں اعظم دا خطاب نہیں ملدا۔ اشوک اعظم سدایا ہے جیویں اکبر اعظم سدایا ہے یاں سکندر اعظم سدایا ہے۔ اعظم دا خطاب اوہناں بادشاہاں نُوں ملدا ہے، جیہناں دے پیٹھ کئی راجے ٹکے تار رہے ہون۔ اشوک بنارس دے وچ بہہ کے ٹیکسلا تائیں شاہی کہتی ہے۔ گویا کہ سارا ہندوستان اوس دا ہا۔ راجے اشوک تے پتر کوئی نہ۔ باغ دی سیر کریندا آ وندا ہے۔ مالی توں پچھیا ہے کہ ایس بوٹے پھل کیوں نہیں لیا؟ اوس آ کھیا، ”مہاراجیا! ایہہ قدرت ہے اوس ذات دی، جیویں تینوں اولاد نیہسوں دتی۔ انجیں ہار ایس نُوں وی ہور کمی کافی نہیں۔ زمین وی اوہا ہے۔ پانی وی ہے۔ محنت وی ہے۔“ راجے دے دل تے ٹھوکر لگی ہے۔ ہر بندے داکم نہیں ہوندا مثال دیونا۔ کنیں کنیں بندے مثال دیون تاں دُوئے دا بیڑا بوڑ چھوڑیندن۔ راجے دے دل تے ٹھوکر لگی ہے بھئی سارے باگ وچوں میں وی دنیا تے انجیں آیا ہاں، جیویں ایہہ بوٹا ہے۔

راجا لگا آیا۔ اوس قوم اپنی اکٹھی کیتی۔ اوس آ کھیا، ”ایہہ تخت، ایہہ تاج، اوہ خزانے تے ہر شے قابو کرو۔ اساڈا دُنیا اچ حصہ کوئی نہیں۔“ ہر بندہ مالی نُوں کچھ آ کھن لگ پیا ہے۔ کیڈا بے وقوف نکلیا ہیں۔ کیڈی گندی مثال دیتیائی۔ اوس ویلے لوکاں آ کھیا ہے: راجیا! ہر شے اُمید تے زندہ ہے۔ خدا دی رحمت توں بے اُمید نہیں ہونا چاہیدا۔ اُمید تڑپ جاوے تاں انسان دی زندگی ختم ہو جاندی ہے۔ ہر چیز دا علاج ہے۔ ہر کم دی

☆ راجا کرنال

کوشش ہے۔ توں انج کر، ہک سادھو فقیر ہے، جنگل دے وچ واسا ہے اوس دا۔ دُنیا توں تارک ہے۔ گھاہ، پتا کھا کے اوہ رب دی عبادت وچ رہندا ہے۔ اکھے، اوہ دے کول لگے جاویے۔ اوہ دے کولوں دُعا منگواوے۔ مت اللہ پاک تینوں سنبھالے چاں۔ راجے نوں لے کے سادھو فقیر کول چلے گئے۔ چار کتاباں ہین ہندو مذہب دیاں، چار وید ہن۔ اوہ چونہہ دا حافظ ہويا ہے۔ اوہ دے کول گنن۔ جا کے گریہ زاری کیتی نیں: اے فقیر اللہ دیا! دُعا کر راجے دے تخت دا کوئی والی بنے۔ ایہدی اولاد ہووے نرینہ۔ اوس آکھیا، ”خدا بدھا ہويا اساں فقیراں دا وی نہیں ہوندا۔ آؤ سارے رل کے گریہ زاری کریے۔ مت کسے دی منظور چاں کرے۔“ فقیر ہتھ دُعا دے اٹھائن۔ گڑگڑا کے دُعا منگی ہے بڑی عاجزی نال۔ رُتے ہین دُونے لوک وی۔ کجھ دل نوں تسکین آئی ہے راجے دے نوں کہ انشاء اللہ فقیر دی دُعا مستجاب ہے۔ آگ گن گھر۔

دیہاڑیاں دے بعد اللہ پاک راجے نوں پُتر دتا ہے۔ اوس داناں راجا کرنال رکھیا ہے۔ ہندواں دیاں مذہبی کتاباں دسندیاں ہن کہ اوس لڑکے دی سوا انج اکھ ہوئی ہے، آنہ۔ بے مثال آنہ ہويا ہے اوس دا۔ بڑا خوبصورت۔ جیس ویلے پنج سال دا بچہ ہويا ہے تے اوہنوں آن کے سادھو دے کول کھلاریا ہے بھئی ایہنوں علم پڑھا۔ اوس آکھیا راجا!

جھان آ پلنے چھوڑ ہوا لیتی، وت اُنھاں نوں اندریں واڑنا کیہ
 جیہڑے دُنیا چھوڑ فقیر ہوئے، وت اُنھاں دا پڑتتا پاڑنا کیہ
 میں آبادیاں چھوڑ کے جنگل ملّیا ہے۔ میں آبادی تہاڑی دے وچ آ نہیں سگدا۔
 تینوں طاقت ہے اتھائیں اپنے پُتر کان سامان مہیا چاں کر۔ نوکر نوکریں رکھ دے۔ میں پڑھیاں۔ راجے انجیں کیتا ہے۔ پہلے دیہاڑے جیس ایلے بچہ آیا ہے پڑھن کان۔ اوس آکھیا، ”بچیا! علم ہین دوئیں۔ ہک روحانی ہے۔ ہک زبانی ہے۔ پہلی بات ایہہ ہئی کہ توں ایہہ نہ جان کہ میں راجا ہاں یاں راجے دا پُتر ہاں۔ انسان نوں موت آگوں اُڈکندی کھلی ہے۔ جیڈی وی ہستی دا ہووے، اوس مرنا ضرور ہے۔ ایس دُنیا دے مال مگر دُنیا دار اپنا مال تباہ کر رہن۔ بچیا! ایہہ خیال کریں، ایس دُنیا دے مگر دین نہیں ونجنا چاہیدا تے پڑھ

الف۔“ جیس ویلے بچہ سبق لین آوے۔ پہلے اوہنوں موت دے اُتے نظر دیوائے کہ توہیں مر جانا ہے۔ توں راجا کوئی نُونہہ۔ مخلوق اللہ دی نال اچھا ورتیں۔

رب دو گلاں دے کان، ہے بندہ خلقیا
ہک حمد پڑھے سبحان، صبح تے شام نُون
نہ سورے کوئی غیران، خدا دے باجھ اوہ
نہ سمجھے غیب دان، بشر جن ملک نُون
ہر نفع تے نقصان، خدا دی طرف تھیں
رب قادر ہے رحمان، ہر ہر چیز تے
دوآ۔

ور تے وِچ جہان، تے نال انصاف دے
انسان دا کم کرے احسان، وِچ بھیر دے
راہ خدا دے جان، بچاوے کسے دی
بھکھیاں دیوے نان، تے آب پیاسیاں
جند، عزت، مال، امان، رہے وِچ فضل دے
ثابت نال ایمان، وِچ بہشت سدھاوسیں
پڑھ کلمہ مسلمان، ایہہ ساتھی ہئی توڑ دا

لڑکا پڑھن لگ پیا ہے۔ تعلیم اوس نُون دو دیون لگ پیا ہے اُستاد زبانی علم وی،
رُوحانی علم وی۔ اکی سال دے وِچ اوس جا کے تحصیل علم دی طے کیتی ہے۔ اتنے تائیں
جیہڑی اوس دے وِچ ہائی نا دُنیا داری، ایہہ فقیر کٹ کے سٹ گھتی ہائی۔ اوہ مجسم فقیر ہو چکا
ہا۔ جیس ویلے ایہہ آیا ہے راجے بڑیاں خشیاں منائیاں ہین۔ کُل ہند دے راجے نُون
دعوت دتی ہے۔ اوہ آگئے۔

ایس زمانے دے وِچ راجے اشوک شادی کیتی ہے۔ رانی شکنتلا، اوس داناں ہو یا
ہے۔ شکنتلا جیس ویلے ڈٹھا ہے راجے کرنال نُون، اوہ عاشق ہو گئی۔ اوہ حرکتاں کرن لگ
پئی ہے۔ ایہہ مجسم فرشتہ ہا۔ ایہہ حیران ہووے بھی ماں ہے میری۔ کیہ حرکتاں کریندی ہے

میرے نال۔ اوس آکھیا، ”گل سُن۔ اول تاں گل ایہہ وے کہ میں ہر عورت تُوں دھی بھین
جاندا ہاں۔ تُوں تاں ہونیوں میری ماں۔ ایہہ حرکتاں کرنیاں چھڈ دے۔“ اوہ مڑ وی ڈڑھی
رہی۔ راجے اشوک کرنال کان ساک چاں منگیا قلعے قنوج دے راٹھور راچپوتاں تُوں۔ ساک
آدری گیا۔ گڈھیں پے گئیاں۔ خوشیاں مناوَن لگ پین۔ جیس ویلے جِج ایہدی چڑھن لگی
ہے تاں رانی شکنتلا ایس تُوں وکھریاں سدیا ہے۔ اوس آکھیا، ”گل سُن ایہناں اکھیں
تیریاں میرا دھرم، شرم ہر شے کھس لئی ہے۔ میرا آکھیا من چاں۔ بے نہ منسیں تاں جیہناں
اکھیں میرا دھرم کھسیا ہے، ایہہ اکھیں نہ کڈھائیں، تینوں پتہ ہے کہ راجے اشوک اُتے میرا بڑا
قابو ہے۔“ اوہ ہس پیا۔ اوس آکھیا، ”رائے! اِکی سال میں تعلیم لئی ہے اپنے سادھو اُستاد
کولوں، جیہڑے پردے میرے دماغ دے ہان دُنیا داری دے، اوس کٹ کے پرانہ سٹ
گھتن۔ مینوں اوس پہلے دیہاڑے آکھیا ہا، ایہہ اکھیں وکھ کے تیریاں آدم عاشق ہوویندا
ہے۔ ایہہ اکھیں تیریاں نوہرہ رہنا۔ توہیں آپ وی نہیں رہنا۔

سُکھی خانے دَل بناوَنے
کوٹ قلعے محکم پاوَنے
سبھ موت سگھر بھن جاوَنے
باقی رب ستار ہے

کوٹ قلعے جند تُوں کر گئے
تدبیراں ڈھالاں دھر گئے
موت کے مارے مر گئے
باقی رب ستار ہے

اوہ وکھ پیاں آوندیاں کڑیاں نی
ہتھ پکڑ ڈگورے اڑیاں نی
چر بُوہ سرہانیوں مڑیاں نی
باقی رب ستار ہے

بھنی میری تُوں ماں ہیں۔ میں تیرا آکھیا نہیں من سگدا۔ تُوں اکھیں کڈھوا چھڈ۔“

جنگ چڑھ گئی۔ ایہہ پرانی کے گھر آ گیا۔ رانی نون بار بار اوہ گل سٹ مارے کہ میں وعدہ کیتا ہویا ہے۔ جیس ایلے راجے دے کول شکایت کرن دی کوشش کرے۔ راجا آکھے، ”گل سُن ایس کرنال جیہا اساڈی جد اِج کوئی نہیں ہویا نہ ہونا ہے۔ ایڈا پاک بندہ ہے۔“ قابو اِج اوہ آوے ای نہیں۔ تاں جے ٹیکسلا دے وچوں پیغام آ گیا۔ راجا! جیہڑا گورنر توں ٹیکسلا تے بہایا ہے اوہ باغی ہو گیا ہے۔ ساری سندھ اوس دے نال رل گئی ہے۔ سارا ملک اوس بدراہ لیا ہے۔ راجا اشوک بڈھا راجا ہے۔ تخت دے اُتے کھڑا ہو گیا ہے۔ اوس تقریر کیتی ہے۔ اے راجپوتو! کیہڑا راجپوت ہے، جیہڑا میتھوں انعام لے تے اوہا سرکٹ کے پیش کرے۔ اے راجپوت کوئی نہ بولیا رانی شکنتلا اُٹھی ہے۔ اوس آکھیا، ”چودھیں مدھیں ندھان ہے۔ سوہیں بندیں ثابت ہے۔ پُتر نون چاڑھ۔ شے تہاڈی ہے لڑیندا میلکھ نون ہیں۔“ راجا رو پیا ہے۔ اوس آکھیا، ”اِجن تائیں میں پُتر دے پورے لاگ ای نہیں دے چکیا۔ کل ایہدی شادی پئی ہوندی ہے۔ چھیواں مہینہ ایہدی شادی نون ہے۔ توں ایہنوں مراونا چاہی ہیں۔“ اوس آکھیا، ”معلوم ہوندا ہے تسیں نسل راجپوت نیہے۔“ راجا بولن لگا ہے تاں کرنال اُٹھی کھلوتا ہے۔ کرنال آکھیا، ”گل سُن راجیا! حکم ہوندن دونیں۔ یاں ماں دایاں پیو دا۔ پیو میرے حکم نہیں دتا۔ ماں میری مینوں حکم دتا ہے جنگ دا۔ میں ایہہ داغ کیوں جھلاں۔ کیوں خاندان میرے دے اُتے لفظ آوے۔ میں تیار ہاں۔ توں مینوں اجازت دے۔“ راجے اشوک ہاں نال چاں لایا ہے۔ ”شاباش بچیا! حلالی دی ایہہ تعریف ہے۔ تینوں غیرت آئی ہے۔ سامان آلوں کمی نہ ہوسی۔

ہار جیت وس خدا دے، راٹھاں ایہو کجھ کرنا

اگانہہ ہُن بھاویں ہار آوی یاں جیت آوی۔ ایہہ رب دے وس ہے۔“ ٹیکسلا دے گورنر دے نال اعلان جنگ ہو گیا ہے۔ تیاری ہو گئی۔ جیس ویلے ایہہ چڑھن لگا ہے تاں ایہہ پہلے آیا ہے ماں مترئی دے کول۔ ”گُستاخی کوئی ہوئی وی ہے ماف چاں کر۔ ماں بن کے اِج ہتھ پھیر۔

بیگم کھندی ہے ماں نون، سُن ماں پیاری
بچے دے چاں کپڑے، چھیویں پھلکاری

ہاتھی دے چاں جھولدا، کوئی سنے امباری
 اج سیر کرن دے باغ دا، مائے جاندی واری
 اساں مُڑ نہیں آونا پکیاں، بہہ عمراں ساری
 کیہ پتہ ہے میری موت ہووے۔“ اوس آکھیا، ”توں آیا ہیں میرا رگڑا کرن
 کان۔ میرے سرتے چوٹا ہے۔ میں وی راجپوت دی لڑکی ہاں۔ میں تیری اکھیں نہ
 کڈھائیں تاں توں آکھیں۔ نہیں تاں اج وی آکھیا منیں چاں تاں میں راجے توں
 روک لیندی ہاں۔“ اوس آکھیا، ”تیرا ماریا ای میں وطن چھوڑو ہاں۔ نہ تیرے متھے
 لگساں۔ نہ گندیاں گلاں سنساں۔“ اوتھوں چل کے اپنی ماں کول آیا ہے۔ ”اماں جی۔“
 اکھے، ”جی۔“ ”میں جا رہیا ہاں۔ توں مینوں اجازت دے۔“ اوس آکھیا، ”بیٹا! تیری
 میں موت تے وی خوش ہاں، جیہڑا توہیں داغ نہیں جھلیا تے آپ تیار ہو گیا ہیں۔ نہیں
 تاں ایس سوکن میری مینوں ہمیشاں ایہہ طعنہ دیونا ہا۔“ اوس ویلے اپنی رانی راٹھور کول
 آیا ہے۔ راٹھور توں آکھیا یس ”لے۔“

الف : اللہ آن ملایا تاں آن ملساں، اج قسمت چاں نکھوڑیا ای
 ساڈا دل ناہیا ایتھوں تڑنے تے، رب ڈاڈھے نے بنھ کے ٹوریا ای
 تئیں خوش وسو پیارے مکھ والے، اساں دیس تساڈڑا چھوڑیا ای
 وقت سخت دوپہر دے جان محمد، جاندیاں بچناں توں کہیں نہ موڑیا ای
 میں جا رہیا ہاں۔ اللہ توں سوچی ہیں۔ جیندے ہویا سے تاں وت ملسائیں۔“ اوہ
 روون کڈھ ڈڑھی۔ اوس آکھیا، ”گل سن۔ میں اوس قوم دی، اوس نسل دی عورت ہاں،
 جیہڑیاں خاوند دے مُردے تے مرویندین۔ نال جل ویندین۔ ستی ہو جاندین۔ میں
 جیندا خاوند کیوں چھوڑاں۔“

توں تڑ چلیاں ہیں، ہو کے راہ پدھانو
 میں کجھ نہ کھٹیا، بن کے تڈھے دا جانو
 اج کریہاں وانگ بھار چوائے نی، اساڈی ہک وی نہیں ساہنو
 نشے وانگ شراب دے، رہیا ہیں من توں لاہنو

میں تیرے نال۔“ اوس آکھیا، ”بیڑا ٹھل جاوی توں ستریں دی پئی ہوئی شہزادی
 ہونیوں۔ اگانہہ جنگ ہويا۔ جنگل دے سفر۔ دریا عبور کرنے۔ اگانہہ مُرداراں دیاں
 بوئیں۔ توں نہ آ۔“ اوس آکھیا، ”ہر گل منظور ہے تیری جُدائی نہیں۔ میں نال آونا ہے۔“
 ”چلو۔“ اوس آکھیا۔

ایہہ جی چڑھ پئے ہن لشکر۔ اگانہہ تکیا ہے تاں فوجاں، مدان۔ اوہناں دا وی
 اکٹھ ہے۔ تمبو ایہناں دے وی لگ گئے۔ صبح دا وقت ہے کرنیل، جرنیل، فوجاں آن کے
 دروازے تے کھلو رہن، تمبو دے تے۔ ”راجیا! حکم دے اسیں حملہ کریے۔“ راجا چپ
 ہے۔ اوہ حیران ہے۔ مینوں پیر پچپن اچ آکھیا ہا، بچیا! دُنیا دے مگر دین تباہ نہ کریں۔
 اتھے ندی لہو دی وہنا ہے انسان دی۔ مگروں پیو دی آکھ ہے۔ اگوں ایہہ باغی ہويا کھلا
 ہے۔ میں کیہ کراں میریا اللہ۔ کوئی ایسی میرے دل اچ گھت میں ایس گناہ توں کیویں بچ
 جاواں۔ بار بار جرنیل چچھدن: جی حکم دینو، ایہہ مراقبے بیٹھا ہے۔ اپنے رب نال گلاں پیا
 کریندا ہے۔ آخر کار ایہدے دل اچ ہک گل آگئی ہے۔ ایس آکھیا، ”ٹیکسلا دے گورنر
 تُوں آکھور زم گاہ دے وچ آکے میری گل سُنے۔ ہتھیار نہ اوہ لائے نہ میں لائیں۔ اتھے
 آکے گل میری سُنے۔“ اوس آکھیا، ”نہیں، ہتھیار توں وی لا کے آ۔ میں وی لا کے آونا
 ہاں بھئی ہک دُوئے توں خطرہ رہے۔ ہو سگدا ہے میں ہتھیار نہ لائیں تیرے کول خفیہ
 ہتھیار ہووے یاں میرے کول ہووے۔“ راجے کرنال آکھیا، ”ٹھیک ہے۔“

دوویں راجے ہتھیار لا کے آگئیں، جیہڑا سا جھامیدان ہا۔ جتھے جنگ ہوونا ہا
 اوتھے۔ ”ہلا دس۔“ اوس آکھیا، ”خُدا تُوں مننا ہیں۔ ایس تُوں مننا ہیں قیامت آونا ہے
 تے خُدا سوال کرن اساڈے تے۔“ اوس آکھیا ”ہا۔“ ”جیہڑی ایہہ مخلوق آپس اچ
 لڑن کان آئی بیٹھی ہے، ایہناں دا آپس اچ کوئی جھگڑا ہے۔ اوہناں لڑنا ہے تیرے حکم
 نال۔ ایہناں لڑنا ہے میرے حکم نال۔ اتھے ندی لہو انسان دے دی وہنا ہے۔ کئی بچے
 یتیم ہو جاسن۔ بہتر انجیں ہے کہ جھگڑا تیرا میرا ہے۔ ایہناں دا جھگڑا کوئی نہیں۔ توں
 مینوں لکھ دے۔ میں تینوں لکھ دیواں بھئی جے توں مینوں مار لئیں تاں ہر شے تیری۔
 جے میں تینوں مار لئیں تاں ہر شے میری۔ جھگڑا مک جاسی۔ یاں توں مری یاں میں

مریناں۔ ایس مخلوق دا تاں قصور کوئی نہیں۔“ اوس آ کھیا، ”مینوں تھوڑا جیہا وقفہ دے۔ میں صلاح کر لئیں۔“ اوہ واپس ہٹ گیا۔ جا کے اوس اپنے مددگاراں نوں بُلایا ہے بھئی میں حیران ہو گیا ہاں۔ راجے اشوک دے اُتے اسانوں ہزار شکایت ہاں۔ ایہہ کوئی ولی اللہ ہے۔ ایہدے نال لڑائی گُفر ہے بھئی اپنی موت چائی کھلا ہے مُلکھ دے بچاون کان۔ جے تئیں آ کھوتاں میں ہتھیار رکھ دینا ہاں۔“ اوہناں وی آ کھیا، ”ٹھیک ہے۔“ گورنر ہتھیار اُتار کے آ گیا ہے۔ اوس آ کھیا، ”راجا کرناں! پیو دے پیش کرنا ہئی زندے نوں تاں قید کر لا۔ جے میرا سر پیش کرنا ہئی تاں سر کٹ لا۔ میں تیرے نال لڑدا ہی نہیں۔ تیرے نال لڑنا گُفر ہے۔“ کرناں اُٹھیندا لگا آیا ہے۔ اوس ہاں نال چاں لایا۔ اوس آ کھیا، ”توں بھائی ہیں میرا۔ کچھلی شاہی اوس کرنی ہے، اشوک۔ ایہہ شاہی میں تینوں دینا ہاں۔ میں تاں شاہی کرنی کائی نہیں۔ میں تاں رب رب کرنی ہے۔ گل ایہہ کر۔ ٹکا دیونا منظور کر۔ اُنجیں ہار رعایا ہو کے بہو۔ میری بیوی تے مینوں ہک کُٹیا پا کے چاں دے۔ سادہ لباس تے سادہ روٹی۔ ایہہ اسانوں دوویں ٹائم مل جاوے۔ ایہہ شاہی توں کر۔ کچھلی اوہ کر لسی۔“ بڑا خوش ہو گیا۔ رسائی ہو گئی۔ ایہہ ہُن او تھے رہندا ہے۔ ٹیکسلا دا گورنر اتنا عاشق ہا ایں دا کہ سوا ایں دے کول پنج منٹ بیٹھے دے، اوہ تخت نہ لیندا۔ ہر صبح نوں ایہنوں وقت دیونا۔ ایہدیاں گلاں سننیاں۔ بنارس دے وِچ خبر آ گئی۔ رسائی ہو گئی ہے۔ ٹکا تارنا منظور کر لیا نیں۔ راجے بڑیاں خوشیاں منائیاں بھئی بغیر لڑائی دے میرے پُتر ٹیکسلا فتح کیتا ہے۔ گل پُچی ٹکٹلا تے۔ اوہنوں اک لگ گئی بھئی گھلیا تاں ہامری جاسی۔ ہُن رات دہنہہ گڑھدی رہے بھئی میں جوں اکھیں آ کھیاں ہان، کڈھاونیاں ہین، اوہ گل پوری نہ ہوئی۔ ہر ویلے اوہ سوچیندی ہائی۔ اوس زمانے مہر تے راجے وسدے ناہن۔ راجا آیا ہے۔ رانی تاڑی رکھیا ہے۔ اوس مہر اُتار کے قندیل دے وِچ رکھی ہے۔ راجے کھانا کھا دھا ہے۔ سین پیا ہے۔ اوہ مٹھیں مٹھیں بھرن لگ پئی ہے۔ پیار کرن لگ پئی۔ جیس ویلے سمجھیا ہے راجا سدا ویندا ہے۔ اوہ اُٹھی ہے مہر چاون کان۔ قندیل کول اپڑی ہے تاں راجے ہائے ہائے کیتی ہے۔ ”کیہ ہئی راجیا؟“ اوس آ کھیا، ”خواب بڑا بُرا آیا ہے۔ میں ویہناں ہک بدماش جیہی عورت

ہے۔ میرے پُتر آل اُنگل دا اشارہ کیتا ہے۔ اوہ ڈھے گیا ہے۔“ اوہ ہسدی ہسدی ڈھڈھ تے لیٹ گئی۔ اوس آکھیا، ”راجیا! ایڈا بہادر جوان ہے تے عورت دے اشارے نال ڈھے گیا ہے۔ ایہہ خواب خیال ہے۔“ تھک کے سنوایا ہے۔ رانی مڑ اٹھی ہے۔ قندیل کول پہنچی ہے تاں راجے ہائے ہائے کیتی ہے۔ ”کیہ ہئی راجیا!“ اکھے، ”میں ویہناں میرا پُتر ہے۔ ہک سیاہ رنگ دا انسان ہے۔ اوہ اوس دیاں دوویں اکھیں پیا کڈھدا ہے تے دھوتن خون دے پئے وہندن۔“ اوس آکھیا، ”راجیا! اج کیہ کھادھا ہئی؟ کھانا ہضم نہیں ہویا۔ جیہڑے بخار ہن، ایہہ دماغ نول چڑھ رہن۔“ اوس آکھیا، ”شیں تاں گنبدیاں ای نہیں۔“ تھک کے وت سنوایا سوں۔ اتنے نول قندیل دے وچوں مہر کڈھ کے اوس ہک کاغذ اُتے مار لئی ہے۔ راجے حال حال چاں گھتی ہے۔ ”رائے! پتہ نہیں اج دے خواب کیہ پئے کریندن۔ میں ویہناں نوہہ میری تے پُتر ایہہ مگریاں دا گدا کریندے آوندن۔“ اوس آکھیا، ”راجیا! مڑ سچی دساں تاں توہیں کوڑی جاونا ہے۔ میں تیریاں پڑپوتریاں جیڈی ہاں۔ نہ دل رہیا۔ نہ دماغ رہیا۔ نہ گردے رہے۔ نہ عمر رہی۔“ اوس آکھیا، ”ایہہ ٹھیک ہے۔ واقعی ایہہ گل سچی ہے۔ شاید ایہہ وجہ ہووے۔“

صبح رانی کاغذ دے اُتے لکھیا ہے۔ گورنر ٹیکسلا! مالے اساڈے گھر دے ہن ایہہ خط پہنچے، کرنال دیاں دوویں اکھیں کڈھ لئیں۔ اگر توں ایسا نہ کریسیں، چالیہہ بندہ ہو ئسیں پرواردا، میں چالیہہ نول موت سزا کریساں۔ ایہہ راجے اشوک دے ناں تے اوس خط بھیج دتا ہے۔ شتراں تے ڈاکاں چلدیاں ہان۔ ڈاک چلدی چلدی ٹیکسلا دے گورنر تے پہنچ گئی۔ اوس خط پڑھیا۔ اوہ حیران ہو گیا۔ ایڈا نیک ہے تے پیو سکا پیا خط لکھدا ہے۔ اوس آونا چھڈ دتا کرنال کول۔ اٹھویں دیہاڑے کرنال بندہ گھلیا۔ اوہ آیا۔ آن کے بہہ رہیا ہے۔ ”یار! اٹھ دیہاڑے تینوں گزر گئے ہن تے توں میرے کول نہیں آیا۔“ اوس انج تکیا ہے اکھیں آلوں تے ہنجوں شپ شپ کیتی ہے۔ ”کیہ ہئی؟“ اکھے، ”ایہہ کائی مرض ہے اٹھویں دیہاڑے دی جیس توں میں نہیں آسکیا۔ میریاں اکھیں چوں پانی وہندا ہے۔“ کرنال ہس پیا۔ اوس آکھیا، ”جیہڑا سادھو فقیر میرا اُستاد ہا۔ اوس مینوں حکمت وی سکھائی۔ مریض بندہ اُتلی ہوا تے کھلار تے میں تینوں دسیساں، ایہوں ایہہ مرض ہے۔ ایہہ کوئی

دل دا درد ہے، جیہڑا ہنج لیا رہیا ہے۔ ایہہ پانی نہیں۔“ اوس ویلے اوس آکھیا، ”کھلوو ٹونہ۔ ایہہ خط تیرے ناں آیا پیا ہے اٹھویں دہنہ دا۔ چالیہہ بندہ کوپساں میں، تے میں تیریاں اکھیں کیوں کڈھنیاں ہن۔ پو تیرے ظلم کیتا ہے۔“ کرناں اوہ خط پکڑ کے پو دا اکھیں تے لایا ہے۔ اوس آکھیا، ”اگا نہہ بکواس مت کریں میرے پو دے حق اچ۔ ایہہ ہزار واری وی اکھ پیدا ہووے، پو دے حکم تے کیوں نہ کڈھائیں۔ میں اکھیں دوویں کڈھینا ہاں۔“

اوس ویلے اوہ آیا ہے رانی کول۔ اوس آکھیا، ”رائیے! رانی شکنتلا کسے ڈھنگ نال میرے پوتوں ایہہ خط لکھوایا ہے۔ حکم میرے باپ دا ہے۔ جے میں اکھیں نہ کڈھائیں، ایہہ چالیہہ بندہ مری جاسی تاں میں ہک دیاں دو اکھیں گنیاں چنگیاں ہن۔ چالیہہ بندہ بچدا ہے نالے پو دا حکم منی جاسی۔ توں پیکیاں تے چلی جا۔ رانی شکنتلا دا مطلب ایہہ ہے بھئی انھا راج تے نہیں بٹھایا جاندا۔ ایہہ قانون ہے اساڈا۔ اوہ اپنی اولاد کان رستہ صاف کر رہی ہے بھئی مینوں کوئی بھلکے ڈھپیوے تاں اوہ راجا بنے۔ توں وگ جا۔ جیس ویلے انھیاں ہو جاونہ، راج رہنا نہیں۔ میں گداگر ہو جاونہ۔“ رانی روون کڈھ ڈڑھی۔ اوس آکھیا، ”راجیا! تینوں میں اوس دیہاڑے دسیا ہا کہ میں اوس خاندان دی لڑکی ہاں، جیہڑیاں مُردے خاوند دے نال جل کے مردیاں ہن۔ ستی ہو جاندین تے میں جیندا خاوند چھوڑ جواں۔ میں کون ہاں۔ میں تینوں مت دینی ہاں پو دا آکھیا من جوں لوگ جانن کہ پو ظلم کرے، اولاد کتھوں تائیں سبہ سکدی ہے تے میں وی عورتاں نوں مت دیواں کہ متھاج خاوند دی خدمت کیویں کریندی ہے۔ میں تیری انج خدمت کراں جیویں توں راج تے بیٹھا ہیں۔“ ”اچھا۔“ اوس آکھیا۔

اوس ٹیکسلا دے وچ ہوکا دیوایا ہے کہ آؤ لوکوانج تہانوں تماشا دکھائیے بھئی پو دے ایسے حکم دے اُتے اولاد عمل کیویں کریندی ہے۔ مخلوقاں اکٹھیاں ہو گنیاں۔ فقیری لباس بنا رکھے۔ آکھیا ہے بھئی جیہڑا میریاں اکھیں کڈھے، جیہڑا شاہی لباس میں پائی کھلا ہاں، ایہہ اوس دا۔ عورت آکھیا، ”جیہڑا زیور میرا ہے ایہہ وی اوس دا ہے۔ میرے خاوند دا آکھیا منو کیوں کہ چالیہہ بندہ تد بچدا ہے۔“ ساریاں جلا داں انکار کیتا ہے بھئی ساتھوں

تاں ایہہ کم نہیں ہوندا۔ ہک جلا دِوِج کجھ ول ہا۔ اوس آکھیا، ”میں کڈھداں۔“ عورت اپنی
 ئوں کرناں آکھیا ہے، ”جیس ویلے آنہ میرا نکل رہے، ایہہ دوائی گھتیں۔ میرا درد تے
 خون کھلو رہی۔“ جیویں ایس آنہ پٹ کے باہر کڈھیا ہے۔ مخلوق روون آلی ہے۔ عورت
 اُٹھی ہے۔ اوس دوائی دگائی ہے درد تے خون کھلو رہیا۔ اِنج (تھہ دی تلی ول اشارہ) تھہ
 دے وِج آنہ پکڑ کے، ”آئے (اے) مخلوق اللہ دی جدوں تائیں ایہہ اکھ اپنی جگہ تے ہا،
 ساری دُنیا وی کوئی ایہدی قیمت آکھے تاں میں کائی ناہی دیونی۔ ہُن ایہہ آنہ نکل گیا
 ہے۔ میں آکھاں ہک پیسے توں وی لے لوو تاں لیسو؟“ اکھے، ”اساں ایہدی جڑھ کڈھنی
 ہے۔“ اوس آکھیا، ”ایہا بات ہے۔ جیس دُنیا دے مال دے مگر اپنا ایمان ونجا رہے ہو۔
 دینہ قیامت دے ایس آنے دی قیمت دا وی ایہہ نہیں۔ ہاں بھئی دوئی کڈھ۔“ اوس دوئی
 کڈھی۔

آہدن: اوس زمانے ایس اپنے سادھو کولوں بین سکھیا ہا۔ بین پہلا ساز ہے
 ایس علاقے دا۔ ایہہ سارے ساز سارنگیاں وغیرہ کچھ بنے بین۔ ایہہ سارے ساز بین
 چوں بنائے گئے ہیں۔ بین سادھو وگیندا ہا، جیہدے کولوں ایہہ سکھیا۔ بین ہتھ وِج
 ہے۔ مخلوق ہٹ رہی ”رہو۔“ اوس آکھیا، ”نہیں ایس دیس تے میں نہیں رہن لگا۔“ عورت
 اپنی ئوں آکھیا، ”لے چل۔ موت دی انتظار ہے، پر نہ اپنے پیکیاں تے جاونا ہئی نہ
 میریاں تے۔“ ایہہ اوتھوں ٹُپئی۔

روندی تے ٹُپلی تھلاں ئوں، دیکھن لوک تماشا

بین ایہدے کول ہے۔ جیس شہر وِج آوندا ہے ایہہ بین وجیندا ہے۔ کوئی کپڑا دیندا
 ہے، کوئی آٹا، کوئی پیسہ۔ واہ انھیا کمال کیتا ہئی۔ رانی اوتھوں بنارس چاں تکیا ہے بھئی میں
 اپنے سوہرے توں پچھاں۔ ایہدا قصور کیہ ہائی جیس توں ایہدیاں اکھیں نکلیاں ہیں؟
 ایہنوں کوئی علم نہیں کہ مینوں کدے لے کے جا رہی ہے۔ کئیں جنگلاں دے وِج راتاں
 آوندین۔ قدم قدم تے موت ہے۔

نازک پیر ملوک سسی دے، شودھی کیہ جانے پدھ کر کے
 اگے سچوں لہہ آب نہ پیتا، کدوں ٹُری پب دھر کے

تھل مارو دیاں تتیاں ریتوں، پچھی چھوڑ گئے سبھ ڈر کے
آ سسے کر ہوت ئوں گھولے، کیہ لینا ہی تھل وڑ کے
آہا ہے اکھے۔

عزرائیل تھلاں دے اندر، لین آیا سسی دی جان ہے
جان سسی دی لہدی نیہسوں، ایس گل تے ملک حیران ہے
سسی آ کھیا ”اوہ جان میری، اگے لے گیا ہی کچھ دا خان ہے
مویاں ئوں مارن دا، نہیں رب دا کوئی فرمان ہے

منگر تے نکیر سسی توں، وچ قبر دے پچھن آئے
اوہ لین حساب کتاب قبر دا، سسی رو رو حال سُنائے
وے کون تئیں کیہ نام تِساڈا، دسو کچھ ولوں کد آئے
واہ واہ صدق یقین سسی دا، جیس ہوت نہیں منوں لاہے

جنگلاں دے وچ فاقیاں دیاں راتاں آوندین۔ مینہ برسدن تاں غاراں دے وچ
رہندن۔ قدم قدم تے موت ہے مگر سنگت خاوند دی نہیں چھوڑی۔ ترائے سال ایہناں
ئوں ایس رستے دے وچ لگے۔ ٹاکیاں ئوں پرٹاکیاں لگیاں ہوئیں۔ تلیاں پیراں دیاں اڈ
گئیں۔ رنگ اڈ گئیں۔

شام دا وقت ہے ایہہ بنارس ئوں آ وڑن۔ شہر دے وچ پھرن لگ پئے اسانوں
رات رہائیو۔ رات رہائے کوئی نہ۔ اودوں بارش لہہ پئی۔ اودوں سرد علاقہ ہے۔ سردی بے
بہا ہے۔ جتھے راجے دیاں رتھان کھلونیاں ہان، اوس مکان دے وچ آ وڑن۔ پالے دی
ڈک کائی نہیں۔ مینہ دی ڈک ہے۔ ہک سپاہی لگا آیا اوس ہڈھاں مار کے اٹھایا ہے۔ اکھے،
”رات نہیں ہئی۔“ رانی روندی ہے بھی سُبھان اللہ۔ واہ خدا دیاں حکمتاں۔

رانجھا جا لگھیا ہے گلی چوچک والی، سبھی پیڑ کچیوں دھاوندی ہے
اوہو جھنگ تے جھنگ دیاں گلیاں نیں، ہکا ہیر نہ نظریں آوندی ہے
محل ویکھ کے تے اوہ بابل والے، کیوں جان نہ نکل اج جاوندی ہے
بھیں بھیں کے ویکھے چوغطیا اوئے، اورے نکراں توں ہیر کجھاوندی ہے

اوہو شہر ہے جہدے وچ میری ڈولی لتھی ہائی۔ ایہا رعایا ہے جیہڑی اسانوں سلام کریندی ہائی۔ اج اوہو شہر ہے اسانوں رات رہن کوئی نہیں دیندا۔ کرنال اوس ئوں آکھدا ہے۔ ”راہیے! اج تاں ہر گئی ہیں۔ بیڑا ٹھل جاوی خدا دی رحمت توں کدی وی بے اُمید نہیں ہوونا چاہیدا۔ خدا کوئی سبب بناونا ہے اساڈا۔“ جیس ویلے ہڈھاں مار کے کدھن لگ پیا تاں کرنال بولیا: کیوں بھائی تیرا بال بچہ کوئی نہیں؟ اوس آکھیا، ”کیوں؟“ اوس آکھیا، ”دیگر دا وقت ہا جدوں اسیں ایس شہر اچ آئے ہاں۔ ٹگر اسان منگیا کسے توں نہیں۔ اسانوں سر لکاؤن دی جگہ کسے نہیں دتی۔ ایڈے ظالم لوگ ہن۔ اسانوں توں کدھیں ایس سردی وچ، اسیں مر جاسیں۔ ایہہ یقین کر ایس نگرئیں اگ نہ لگے تاں انجیں جانیں فقیر کوڑ ماریا ہے۔“ اوس آکھیا، ”فقیر پلو تے نہ دے۔ اگانہہ رُ آ۔ میں تسانوں اچھی جگہ تے بہائیں۔ جتھے نہ مینہ ہوسی، نہ پالا ہوسی۔“ اوہ لگا آیا۔ جتھے جنگی سامان راجے دا پیا ہوندا ہا، اوس دروازہ چاں کھولیا۔ اوس آکھیا، ”ایس وچ وڑ جاؤ تے کسے شے ئوں ہتھ نہ لیائے۔“

کرنال لیٹیا ہے گودڑی وچھا کے۔ آکھیوس: راہیے! ویکھ لا کہیں دے محل ہن۔ کروڑ ہا بھر کے اوہناں بنائے۔ اللہ پاک اساڈے اُتے کیڈی مہربانی پیا کریندا ہے۔ میں تینوں پہلے دیہاڑے آکھیا ہا توں ایہہ بھار نہ چا۔ تیتھوں نہیں چویندا۔ توں ہیں ہر گئی۔ کل دے آئے ہاں توں ہیں روون لگی۔ ہُن تائیں روندی پئی ہیں۔ میں بے راجے دا پُتر ہاں، دیو بھرے تیرے میرے پھٹن دا وقت ہے۔ میں تینوں گھل چھڈنا ہے۔ توں مینوں ننگ کرینی ہیں۔ رانی پیراں تے ڈھے پئی۔ ”خدا داناں ہئی ایہہ قسم نہ چا۔ میں تینوں سچی گل دینی ہاں، جیس توں میں روئی ہاں۔“ اکھے، ”دس۔“ اوس آکھیا، ”کل دا میرا دل ہا میں بین سناں۔ میں کیہڑی ماں دی جی ہوئی ہاں کرنال راجے تے حکم کراں۔“ کرنال آکھیا، ”جا راہیے! مینوں توہیں بڑا درد دیوایا ہے بھئی میں چٹکی آٹے دی دے مگر بالاں ئوں سُنیدا ودا ہوندا ہاں تے بھیڑیے توہیں میرے مگر پیکے وسار چھڈے۔ راج وسار چھڈیا۔ گداگر بیوں۔ میں تینوں بین کیوں ناہی سناؤنی۔ آ تینوں میں اوہ بین سُنائیں، جیہڑی اج تائیں میں تینوں سنائی ای کدی نہیں۔“ کرنال اٹھی بیٹھا ہے۔ بین اوس مونہہ

نال چاں لائی۔ اوہ الٹھ جگاؤن لگ پیا ہے۔ رانی ئوں بھی درد آون لگ پیا ہے۔ ایہہ
 بئین دا آواز روشندانناں دے وچوں ٹپ کے شاہی محل دے وچ پہنچ گیا۔

راجا سٹا ہویا ہے۔ اوہ جاگ گیا ایس بئین دے آواز اُتے۔ اوس آکھیا، ”جاگو
 نا ساریاں گل گولیاں، باندیاں، رانیاں، شہنشاہ“ اٹھا بہا یوس۔ ”ساریاں جاگو کوئی
 میرے پتر آر بئین و جا رہیا ہے یاں پتر ہے میرا یاں اوس دا کوئی اُستاد بھائی ہے۔ سگوس
 اوسے آر و جا رہیا ہے۔“ ساریاں اٹھ پٹھین۔ راجا روون لگ پیا ہے۔ راجے آکھیا،
 ”اج ترائے سال گذر گئے میرے آل تاں بھیڑے خط ای نہ لکھیا۔“ شہنشاہ آکھیا،
 ”جنگل وچ پلایا ہے۔ جنگل وچ رہیا ہے۔ اوہنوں ساک سین دے نال کیہ؟“ اکھے،
 ”راہیے! ہمیشاں توں برا بولینی ہیں۔ دراصل اوہدا لگاؤ خدا نال ہے، جیہناں دا اودے
 لگاؤ ہو جاوے، اوہ دُنیا داراں ئوں ایذا کوئی نہیں چٹکیاں جاندے تے ایس جیہتاں
 اساڈی پوری وڑھی وچ کوئی نہیں۔“ اتنے ئوں راجے بلایا ہے ”دربان کھلا ہیں؟“ اکھے،
 ”جی کھلا ہاں۔“ اکھے، ”جاویں نا ایس بئین آ لے ئوں اتھے لے آ۔ ایہدی بئین سُنیے۔“
 اوہ گیا ہے۔ اوس آکھیا، ”او بئین و جاوَن آ لیا۔“ اوہ ڈر گئے ہن۔ اسانوں پالا ہے۔ ہُنے
 کڈھدا ہے۔ اکھے، ”جی۔“ اکھے، ”بھئی میرا مہاراجا تہانوں یاد فرما رہیا ہے۔ چلیں نا
 اوتھے چل کے بئین سُنا۔“

کر نال اٹھیا ہے تے ہسیا ہے۔ اوس آکھیا، ”وکیہ لے راہیے قدرت خدا تعالیٰ
 دی اسانوں بھگوان کائی شے لے دیواؤ ہے۔“ رانی بھی رُنی ہے بھئی سائل بن کے جا رہیا
 ہے پیو آل۔ میں تاں ایس ئوں دسیا ہویا کوئی نہیں۔ ایہہ آگئے۔ تکیا ہے رانی راٹھورتاں
 پلنگ اُتے، بیج اُتے بیٹھی ہے شہنشاہ۔ کنیں نوکریں اُتے دھاوندیاں کھلین راجے دے
 اُتے۔ ایہہ جیس ویلے لگھ آیا ہے تاں شمع دان جاگ رہے ہاں۔ راجے آکھیا، ”او ہونمانیا!
 توں تاں اٹھا ہائیں۔“ اکھے، ”جی آ۔“ ”اچھا بھئی بئین سُنا۔ میں تینوں انعام بڑے
 کریساں۔“ ایہہ دروازے اچ بہہ رہیا ہے جیویں منکت بہندن۔ دوویں پیر جوڑ کے ایس
 بئین مونہہ نال لائی ہے۔ رانی راٹھور گنڈا نپ کے کھلی ہے۔ اوتھے بھی اوہنوں درد ہے بھئی
 میرے نالوں تاں ایہہ گولیاں چٹکیاں ہن، جیہڑیاں گُریاں تے پیٹھیاں ہن۔ ایس بئین

شروع کیتی۔ جیویں جیویں الٹھ جگیندا ہے، راجا روندہا ہے۔ راجا شلٹنٹا آل مونہہ کر کے روندہا ہے۔ ”تمام اوسے آر بند اٹھا رہیا ہے۔ سُن لے۔“ راجے آکھیا، ”بھئی ہک واری بٹن بند کر۔ گلاں کریے۔ توہیں بہوں روویا ہے۔“ اوس بٹن بند کیتی۔ اکھ، ”جوگی ہیں؟“ اکھ، ”جی نہیں۔“ ”سناسی ہیں؟“ اکھ، ”جی نہیں۔“ ”اُداسی ہیں؟“ ”نہیں۔“ ”بیراگی فقیر ہیں؟“ اوس آکھیا، ”سچ پکھو تاں میں فقیر ہاں نہیں۔“ ”کون ہیں توں؟“ اوس آکھیا، ”میں وی ہک راجے دا پُتر ہاں۔“ ساریاں ہسن کڈھ ڈڑھیاں۔ اکھ، ”مونہہ وی راجیاں آر ہے۔“ راجا وی پسا۔ کرنال جوش اچ آ گیا۔ اوس آکھیا، ”راجیا! ہس پیا ہیں۔ میں آکھیا ہے راجے دا پُتر ہاں ایس واسطے۔ خدا دی قسم میں ایڈے راجے دا پُتر ہاں، توہیں جیہے اوہدے اگے ٹکا تاریندے ہوئے۔“ تاں راجا بہوں ہسیا۔ ”میں جیہے اوہدے اگے ٹکا تاریندن۔ کیہ ہے اوس راجے دا ناں؟“ اوس آکھیا، ”جی اوس ٹوں دُنیا جاندی ہے۔ اوس ٹوں اشوک اعظم سدیندن۔ بنارس دا والی ہے۔“ راجے آکھیا ”کیہ پیا آہنا ہیں۔ بیٹھا بنارس دے وِچ ہوئیوں۔ میں اشوک ہو یوم۔“ اوس ویلے رانی انج ٹری ہے راجے آل۔ راٹھور رانی آکھیا:

مگر جانے کا ظالم نے نرالا ڈھنگ نکالا ہے
ہمیشہ پوچھتے ہیں تجھ کو کس نے مار ڈالا ہے

او راجیا! میں نوہہ ہاں تیری راٹھور۔ ایہہ پُتر ہے تیرا کرنال۔ ایہہ خط ہے تیرا۔ ایہدے اُتے ایہدیاں اکھیں کڈھائیاں گئیاں ہین۔ مینوں ترائے سال ایس سفر اچ گزر گئے ہین۔ پن پن کے، گدا کر کے اسیں لگے آوندے ہاں تے ہُن توں پچھنا ہیں کہ توں کون ہیں۔“ راجے انجیں سمجھیا ہے کہ میرے سراج بمب پھٹ گیا ہے۔ راجا اپنی مسہری توں چنویا ہے تے زمین تے آلتھا ہے۔ راجے اشوک دی برک نکلی ہے۔ سارے محل وِچ کہرام مچ گیا ہے۔

راجے حکم دتا ہے بگل بجائیو۔ ایسے وقت ہر کوئی آوے۔ دربار لگ گیا ہے۔ ایہناں دوہاں دی بانہہ نپ کے راجا آ گیا دربار دے وِچ۔ اوس آکھیا، ”او وزیر، مصدی، ڈھیر سارے بیٹھے ہو۔ دسو ایہہ کون ہین؟“ اوہناں چوں کنھیاں آکھیا، ”پتہ نہیں جی کل

پندے ڈٹھے ہیں۔ اسانوں تاں کوئی پتہ نہیں۔“ اوس آکھیا، ”ایہہ پتر ہے میرا۔ ایہہ نوہہ ہے میری۔ ایہہ خط ہے میرا۔ ایہدیاں دوویں اکھیں کاہیں کڈھوائیاں ہیں؟“ مخلوق روون کڈھ ڈڑھی ہے۔ اوہناں آکھیا، ”راجیا! اسانوں تاں کوئی علم نہیں۔“ اوس آکھیا، ”نہیں مینوں علم لگدا ہے۔ وزیر؟“ اکھے، ”جی۔“ ”اوہ ترائے خواب مینوں آئے ہاں۔ یادہئی۔“ اکھے، ”جی آ۔“ ”میں آکھیا ہا بھی ایہہ خواب نامے جاندا ہے۔ کرنال آل لکھو بھی مینوں خواب انج آیا ہے۔ اگوں وزیرا توہیں مینوں ہوڑیا ہے۔ خواب اوسے دے بارے ہیں تے بھیڑے خواب ہیں۔ اوس ویلے خواب نامے وچ میں ایہہ درج کروائے ہیں۔ تاریخ دیکھو۔ اوس دیہاڑے دے خواب دی گل تے ایس خط دی تاریخ رل جاوے تاں میری چور شکتلا ہے۔ کیوں کہ میں جاگدا ہاں، ایہہ قندیل کول کھلوتی ہوندی ہائی۔ مہر قندیل دے وچ ہا۔“ ملائی تاں تاریخ مل گئی۔

اوس ویلے راجے حکم دتا ہے شکتلا نوں ملزم بنا کے میرے پیش کرو۔ پھدھی آئی۔ راجے آکھیا، ”لے گل دس۔“ اوس گل اول کولوں لے کے اخیر تائیں دی۔ میں عاشق ہو گئیم۔ ایہہ غلطی میں کر بیٹھی ہاں۔ میں مانی منگنی ہاں۔ راجے آکھیا، ”میں تینوں اوہ سزا کریساں، جیہڑی دُنیا کن نیسی۔ توہیں میری لگ کر چھڈی ہے۔“ اوس ویلے کرنال اٹھیا ہے۔ اوس آکھیا، ”حکم ہوندا ہے ماں دایاں پیو دا۔ ایہہ ماں ہے میری۔ میں اللہ واسطے ماف کرینا ہاں۔ چلو تیرے حکم نال نہ کڈھائیاں ماں دے حکم نال کڈھا چھڈیاں۔ ہتھ نال توہیں وی نہیں کڈھیاں اوس وی نہیں کڈھیاں۔ حکم گیا مینوں اوہ منا پیا بھی چالیہہ بندہ بچدا تاں ہے، جے میں اپنیاں اکھیں کڈھائیں تاں۔ چالیہہ بچا کے میں اپنیاں اکھیں کڈھائیں تے میں اللہ واسطے مانی منگنا ہاں بھی تیرا حکم نہ سہی، میری ماں دا سہی۔ ہُن ایہہ فرق پیندا ہے۔ میں مڑ ماں تاں نہ سمجھی۔

جیہڑے ہوندی طاقت ٹلدے
نالے خیر فقیراں چلدے
اوہناں کارن باغ محل دے
باقی رب ستار ہے

راجیا! ماف کرن آ لے نُوں رب بہوں چاہندا ہے۔“
 اوس ویلے شکنترا اُٹھی ہے۔ اوہ پیراں تے ڈھے پئی ہے۔ اوس آ کھیا، ”توں کُتی
 اُتے رحم کر رہیا ہیں۔ ہک سُر نی اُتے رحم کر رہیا ہیں۔ خدا تیرا بھلا کرے۔“ راجے آ کھیا،
 ”بھادیس قانون نہیں نا اُتھے راجے نُوں تخت دیونا، توں تخت دا وارث بن۔“ اوس آ کھیا،
 ”میں ہکو ساتھ کیتا ہے دُنیا دارناں۔ ایہہ حالت ہو گئی ہے۔ جے تہاڈے آل آیا ہاں تے
 ایس حالت نُوں پہنچ گیا ہاں۔“ دُعائیں دیندا اوہ چلا گیا۔ جیس ویلے اوتھے گیا ہے تاں رانی
 تے راجا دوویں گئے ہن بھئی اوتر پے ویندے ہاں۔ ساڈے حق اِج دُعا کر۔ اوس ویلے دُعا
 واسطے ہتھ اُٹھائے ہن۔ میریا اللہ! جے کدی ایہہ عمل منظور ہے تاں میری ماں دی گود ہری کر
 دے۔ اوہنوں مُڑ پُتر ڈھیہا۔ ایہہ مُڑ ڈھیر تائیں بادشاہ لگے آئَن۔

راجا بیربل

بیربل انبالے دا باہمن ہويا ہے۔ پیو ایہدا مرگیا۔ ماں ایس دی دلی دی ہائی۔ اوہ دلی لئی گئی۔ جیہڑے ایلے ایہہ پڑھ کے آوے ہاں ماں ایہدی مولیاں لے رکھدی ہائی۔ ایہہ اکبر دے کوچے دے وچ مولیاں وچیندا ہا۔ پیر و ایس نوں سدیندے ہان۔ ہک دیہاڑے ایہہ کھلا ہے جے اندروں گولی نکلی ہے کمبدی تھڑکدی۔ بیربل پچھیا ہے ”گولی کیہ ہئی؟“ اوس آکھیا، ”اکبر بادشاہ محل اپنے اچ بیٹھا ہے۔ اوس مینوں آکھیا ہے جا کے اوہوں بلا لے آ۔ ناں اوس کوئی نہیں لیا۔ میں ڈرتوں پچھ نہیں سگی۔ ہن لے جاواں تے کیہنوں لے جاواں۔ میں مری گئی۔“ بیربل آکھیا، ”لیٹیا ہا یا بیٹھا ہا؟“ اکھے، ”لیٹیا ہا۔“ ”اُتانا کہ پاسے پرنا؟“ اکھے، ”اُتانا۔“ اکھے، ”شہتیر دے وچ کوئی نقص ہے۔ کاریگر بلا لے جا۔“ گولی آکھیا، ”جی کاریگر میں بلا لے آندا ہے۔“ بادشاہ آکھیا، ”اسیں پچھے وی ہسدے رہے ہاں تینوں کاریگر کایں آکھیا ہے؟“ اکھے، ”مینوں تاں بیربل آکھیا ہے۔“ بادشاہ باہر نکل آیا ”ایہوں کیوں آکھیا ہئی؟“ اوس آکھیا، ”جی اللہ قدرت نال سیاپدا ہے۔ انسان بولیاں سیاپدا ہے۔ جیس ویلے دسیا پس بھی اُتانا پیا ہاتے آکھیا پس جا جلدی اوس نوں بلا لے آتاں میں سمجھیا ہے کہ شہتیر دے وچ کوئی نقص ہے۔“ بادشاہ آکھیا، ”سورویہ تنخواہ تیری تے سردی نوکری۔ توہیں میرے نال رہنا ہے۔“

اکبر بادشاہ لال قلعے دا سیر کریندا آوندا ہے۔ بادشاہ چڑھیا ہے دمدمے تے۔ سدھا لہندے مونہہ ہے بادشاہ دا۔ بادشاہ ویکھ ویکھ کے ہکے واری شوہ پر نوں وٹ دتا ہے۔ آنے سرخ ہو کے پھرن۔ بیربل بھیج کے لہہ آیا ہے۔ اوس بیرم خان جرنیل نوں آکھیا

ہے، ”بادشاہ دا قندھار تے دھاوا ہے۔ فوج تیار کر۔“ اوس ویلے دھونسے سٹ لگی ہے۔ بادشاہ بچ کے لٹھا ہے بھئی بغیر میرے حکم دے دھونسے تے سٹ کیوں لگی ہے۔ بادشاہ پچھیا ہے ”بیرم۔“ اکھے، ”جی۔“ ”دھونسا کیوں گا جے۔ ساٹا کیوں لاگے؟“ اوس آکھیا، ”تساں حکم نہیں دتا قندھار تے دھاوا۔“ ”میں تاں کوئی نہیں دتا۔“ اکھے، ”ایس بیربل آکھیا ہے۔“ ”بیربل! کیوں آکھیا ہئی؟“ اوس آکھیا، ”جیس ویلے لہندے آلی بانہہ قلعے دی اُتے توں چڑھیا ہیں تاں تیرا سدھا مونہہ قندھار نوں ہا۔ توہیں شوہ پر نوں وٹ دتا ہے۔ میں سمجھ گیا ہاں۔ تریسا سال ہے لکا نہیں پیا تر دا۔ بادشاہ اج غضب ناک ہے حملہ کریندا ہے۔“ بادشاہ آکھیا، ”تینوں مشیراں دے وچ جگہ دتی جاندی ہے۔ دربار دی کچھری وچ تیتھوں مشورہ لیا جاسی۔“

دن بدن ایہہ ودھدا آوے۔ جیہڑے ویلے درباری ایہہ ہو گیا تاں ایہہ نورتن وچ داخل ہے۔ اکبر جلال دین بادشاہ تفریح دا وقت دتا ہے۔ ایہہ گھر گیا ہے۔ جودھا بائی جہانگیر دی ماں ہے۔ ایہہ راجپوتی ہے۔ مردیاں تائیں ایس دین (اسلام) قبول نہیں کیتا۔ رانی جودھا بائی نوں گولی آکھیا ہے، ”اکبر اپنے محل وچ تینوں بلا رہیا ہے۔“ نوکھا کمرہ ہو یا ہے۔ اوس دے وچ ہار سنگھار پے ہوندے ہاں۔ قد آدم شیشے کھلے ہوندے ہاں۔ آئی ہے جودھا بائی بھئی میں جائزہ اپنالیں۔ اکبر دے پیش ہوونا ہے۔ بونجا صوبے دا مالک ہے۔ مت کوئی سنگھار وچ کمی ہووے۔ پھری ہے آکھیوں: ہور کمی کائی نہیں۔ مینوں بندی کائی نہیں۔ پنسل رنگین چا کے اوس نقطہ دتا ہے۔ ایہہ نوں تلک سدیندن۔ ایہہ آگئی۔ بادشاہ آکھیا ہے، ”آرے میرے چاند کے چاندن۔“ ایہہ روندی پچھانہہ ہئی ہے۔ گولی پچھیا ہے۔

جاوت تیج اُکلت آوت، نیر پلٹت کیوں

رانی جودھا بائی آکھیا:

شاہ اکبر کہے مکھ چاند برابر، میں مکھ چاند برابر کیوں
چن میرے حسن اگے کیہ مثال ہے۔ چند نوں گلنکھ ہے۔ گولی آکھیا:
چاند گلنکھ مکھ بادرے، گچا گلنکھ مکھ شاہ
کوار کامنی گلنکھ ہے گنی گلنکھ ابھیمیاں

اوس ویلے اوہ ہٹ گئی۔ اکبر کول گئی۔ اکبر بادشاہ ڈٹھا ہے، اوہ تلک جیہڑا لگا ہو یا ہا پنسل دا۔ بادشاہ خیال کیتا ہے کہ ایہہ بندی ہے یاں کچا تلک۔ بادشاہ سوچیا میں بچھیا تاں میرے عقل دا اندازہ ہو جاسی۔ کسے ترکیب نال میں سمجھاں۔ اکبر بادشاہ حکم دتا ہے: گولی پان لے آ۔ پان بیگم آل وی کیتا ہے۔ جیہڑے ویلے اوس پان دی رسنائی ہے، اوہ تلک چٹی گیا ہے۔ بادشاہ ہس پیا۔ ”ایہہ تلک ہا بندی تاں نہ۔“ اکھے، ”نہیں۔“

بادشاہ ایہدی بھارت بنا کے دربار وچ آ گیا ہے۔ وزیراں نوں آکھیا ہے۔ اچھا بھئی ہک بھارت ہے، مکھ سے کاٹک اڈا دو، مونہہ دے اتوں کاں کیویں اڈیا ہے۔ مونہہ بنایا ہے ہوٹھ دی چوٹی نوں۔ تلک نوں کاں بنایا ہے۔ رائے گد وزیر اٹھیا ہے۔ بادشاہ آکھیا، ”ہک ہئی جواب دیونا ہئی، پر نظم کر کے نضراچ نہیں۔“ رائے گد آکھیا:

ایک کبا کچھ کزٹ کجھر سے دوڑ کوہی پنچرا پکڑانا
باہری پھرت گھرت امبر سے دیکھا وہ اُس جا کچھ کھانا
بھوکا باز پھرے ول روکھا وہ بھی اُن کو دجھاں رسانا
کہے رائے گد سن شاہ اکابر ات پدھ مکھ سے کاٹک اڈانا

اوس آکھیا ہے ”جی باہر وار دھرنکا پیا ہے۔ اُتے آ کے کاں بہہ رہن۔ باہری جھاٹ ماری ہے۔ اوس کاں پکڑ لیا۔ کاواں گُراٹ کیتا ہے۔ باز ہوا دے وچ کھلا ہا۔ اوس اتوں پر چاں گھٹے بھئی کوئی شکار ہے استھے۔ جیہڑے ویلے گھوکر آئی ہے اوس دے پراں دی باہری کاں چھوڑ دتا ہے۔“ جیہڑے ویلے اُتردا ہے نا، اوس ویلے گھوکر آ وندی ہے اوس دے پراں دی۔ بادشاہ آکھیا، ”کہیا تو تم نے ٹھیک ہے پرمن نہیں مانا۔“ گل انج نہیں۔ بادشاہ امیر خسرے نوں آکھیا ہے، ”توں دس۔“ اوس آکھیا ہے جناب:

ایک گندر چھپ بیٹھی ہے پلوا انگ نہ چند چگدا کاٹک سیانا
اوس جو اُن کی گھات پچھاتی لے آئی چھاتی سکھ مانا
کر کر زور چلی سمرای اوس کے مکھ پر وہ گُرا لانا
سوہا سوہان پڑا وچ ویڑھے وہ بھی اُن کو دوڑ مدانا
کہے امیر خسرو سن شاہ اکابر ات پدھ مکھ سے کاٹک اڈانا

اوس آکھیا کیہ ہا۔ کاں ہائن دانیاں دے اُتے چکدے بیٹھے۔ بلی جھاٹ ماری ہے۔
 اوس کاں نپ لیا ہے۔ کاواں گِرا لٹ کیتا ہے۔ ویڑھے وچ کتا ستا پیا ہا۔ اوہ بھج پیا ہے۔
 گتے توں ڈر کے بلی کاں چھڈ دتا ہے۔ بادشاہ آکھیا، ”کہیا تو تم نے ٹھیک ہے پر من نہیں
 مانا۔“ تان سین شاعر ہويا ہے۔ بادشاہ تان سین نوں حکم دتا ہے۔ اوس خیال کیتا ہے
 مثالوں کیناں دتیاں نیں بادشاہ نوں۔ مثال تاں ایسی ہووے کہ دماغ معطر ہو جاوے۔
 اوس آکھیا:

جل میں کنول، کنول میں کوندن، اوس کوندن میں بھور سمانا
 بھوری بھورا کر پکارے اوس مت وچ رہیا اُلبھانا
 بھیتی نین گئی سس اپنے سورج گگن مسکین لسکانا
 بھئی شام تب ہوا اُجالا اُڈ گیا بھور کچھو نہیں جانا
 کہے تان سین سن شاہ اکابر ات پدھ مکھ سے کانگ اُڈانا

مطلب کیہ پانی دے وچ کنول بوٹی ہے اوس دے پھل وچ آکے بھور بہہ رہیا ہے۔
 بھوری چکر چاں بدھا ہے اُتوں۔ دینہہ لہندا پیا ہے۔ پھل کرما جاونا تیتھوں نکلیونا کوئی
 نہ۔ رات جدائی دی آجاسی۔ اوس لذت دے وچ اوس آکھیا نہیں نیا۔ دینہہ لہہ گیا۔
 پھل کلا گیا۔ اوہ وچ گھٹی گیا۔ کچھو بیٹھا ہے وچ پانی دے۔ اوس مونہہ چاں اڈیا ہے بھئی
 اودوں نکلے تاں میں لے لیاں۔ رات ساری اوہ وچ رہیا ہے۔ بھوری اُتوں پھر دی
 رہی ہے۔ جیس ویلے رات گزر گئی ہے۔ صبح سورج کرن ماری ہے۔ پھل دا مونہہ پٹیا
 ہے۔ بھور اُڈ گیا ہے۔ کچھو نوں پتا نہیں لگا۔ ویکھو جناب میں دو مونہہ بنائن، ہک کانگ بنایا
 ہے۔ کچھو دا مونہہ ایدوں پھل دا مونہہ۔ بادشاہ آکھیا، ”بہت اچھے۔ مثال بہت سوہنی دتی
 ہا۔ افسوس ایہہ وے کہ انعام دے قابل نوہہ۔ کہیا تو تم نے ٹھیک ہے مگر من نہیں مانا۔“
 اوس ویلے بادشاہ بیربل نوں آکھیا۔ بیربل آکھیا، ”جی کاں تاں میں اُڈا وکھیاں پر بادشاہ
 نوں منا پوسی۔“ اوس آکھیا، ”ہاں ٹھیک ہے۔“ اوس آکھیا، ”جناب ایہناں آکھنا ہا۔“

لالو لال رنگ لاتی ہے گوری لالو لال کیا رنگ بانا
 کرت سنگار سچ کر بیٹھی دو ادھراں وچ تلک سمانا

جب چو پے پان بھیسوس مکھ لالی جوں بادل مونہہ چاند چھپانا
ادھرس رس مدھرس کی لیئے اڈ کر منڈوہا چلانا
کہے بیربل سن شاہ اکابر ات پدھ مکھ سے کانگ اڈانا

”کہیا تو توہیں ٹھیک ہے پر میرے سزراں دا چور ہیں۔ توں اوس ویلے لکيا ہویا ہیں۔ عمر قید سزا۔“ پٹ کے ماریا وچ جیہل دے۔ میراٹی ہووے باہمن ہووے یاں سید ہووے ایہہ نمانے قیداں جوگے کجھ نہیں ہوندے۔ ایہہ جٹاں دا کم ہوندا ہے بھتی ست ست سال بھوگ کے نکلتا آکھنا، ”میں داروگی نال رل گیا ہام۔ میرے ڈھولے سُندی ہائی۔“ باہمن قید ہو گیا۔ رووے شودھا۔ عمر قید سزا۔ اوس ویلے زندگی تائیں ہوندى ہا۔ چیتر دا قید ہویا ہے۔

ساون دی رُت ہے۔ اکبر جلال دین بادشاہ تکیا ہے لہندے دے دا توں بدل اٹھی گئیں۔ واء پُرے دی چھٹ گئی ہے۔ بوندا باندی برسن لگ پئی ہے۔ کیلاں جھومن لگ پئیاں۔ موراں پانکلاں چاں پائیاں۔ جیس ویلے ایہہ ٹھٹ بنیا ہے۔ بادشاہ حکم دتا ہے: سہیل خانہ محلات دے اُتے چڑھ کے قدرت دا نظارہ لیئے۔ ساریاں چڑھ آئیں۔ بادشاہ جودھا بائی رانی اپنی دی انگل نپی ہوئی ہے۔ ایہہ پھر دے آوندن محل تے۔ اوہ چکھدی ہے: بادشاہ سلامت! جیہڑیاں اوہ گھٹاں برس رہیں کیہڑی جگہ ہے؟ بادشاہ آکھیا، ”دلکھی وال بھٹیاں۔“ اکھے، ”جتھے رائے کمال تے رائے سارنگ یا کی بھٹی ہوئے۔“ اکھے، ”جی ہا۔“ ”اوہ گھٹاں کیہڑے دیس دیاں ہن؟“ اکھے، ”ایہہ مٹھرا نگری ہے۔“ ”جتھے کرشن مہا راج ہوئے۔“ اکھے، ”جی ہا۔“ اکھے، ”اوہ گھٹاں کتھے ہن؟“ اکھے، ”قلعہ گڑھ چتوڑ۔ تیرا پیکا وطن۔“ پیکے وطن دیاں گھٹاں ویکھ کے بچپن دا زمانہ یاد آ گیا۔ اوہ دم دے تے چڑھ آئی ہے۔ بادشاہ پیٹھاں کھلا ہے۔ زمانہ اپنے بچپن دا یاد آیا۔ سہیلیاں دے نال کھینڈنا۔ اوہ روون لگ پئی ہے بھتی دھیاں ایہو گجھ ہوندین۔ کتھے جمیاں کاہیں پالیاں کتھے قسمت پھدھ کے واہیاں۔ ایہناں خیالاں دے وچ کھلی ہے۔ جے کہے واری بجلی لشکی تے کڑکی۔ دھڑل آئی ہے زمین نوں۔ اوہ ڈر کے ڈھسٹی ہے بادشاہ دے اُتے۔ قدرت خدا دی ہے سونہیاں دی ہر طرز سونہی لگدی ہے۔ کوڑھا نمانا لوڈ وی کرے تاں دل آہا ہے

ایہدے مونہہ تے لڑ مار لینے۔ اوہدا انج بے ہوش ہو کے ڈھبنا، رنگ دی سرخی، اکھیں دی نیک، ہوٹھاں دی خشکی، ایس صورت وچ بادشاہ ڈٹھی کدی ناہی۔ بادشاہ نوں بھی بہوں پیاری لگی۔

بادشاہ لگا آیا کچہری وچ۔ حکم دتا بھئی 'کامن کنٹھ لگی ڈرتی ہے' کامنی ڈر کے کنٹھ نال کیوں لگی ہے۔ وزیراں خیال کیتا: بیربل وچ کوئی نہیں اساتھوں دسیوے نہ ایس اسانوں سزا کرنی ہے۔ اوہناں آکھیا، ”جی، چوتھا پاوا بیربل ہے۔ اوہنوں وچ چاں بلائیو۔“ بادشاہ آکھیا، ”بڑی یاد دیوائی نیں۔ جے آج بیربل دے سے چاں تاں اوس توں میرے شکوک اٹھی دیں۔“ بیربل نوں بلایا گیا۔ ماریا ہويا قیداں دا وچارا آ گیا۔ سلام کیتا ہے بادشاہ دا۔ بادشاہ آکھیا، ”بلا بھئی بیربل تینوں بلایا گیا ہے بھئی کامن کنٹھ لگی ڈرتی ہے۔“ اوس آکھیا جناب:

رُت ساون کی مینگھ بر سے کوئل سن کر کل کرتی ہے
جب شام گھاؤں وچ بچ کھیوت تب کامن کنٹھ لگی ڈرتی ہے

بادشاہ آکھیا، ”بہت اچھے۔ جوڑا گھوڑا انعام۔ قید رہا۔“

بادشاہ جتھے بہہ دلی وچ، تعریفاں کرے۔ بیربل دے جیہا اج دانا کوئی نہیں۔ ”بیربل! جتنے مہینے توں قید رہیا ہیں گل دا لطف نہیں آیا۔ تیرے ایس قید چوں رہا ہوں دا جشن منائیے۔ شکار چڑھیے۔“ دھونسے تے سٹ لگ گئی۔ شکار چڑھ پئے۔ بادشاہ تے بیربل گھوڑے جو لے کیتی آوندن۔ دُوئے سارے کٹک کچھے ہن۔ بادشاہ سوال کیتا ہے ”بیربل۔“ اکھے، ”جی۔“ ”ایس دُنیا دے وچ فضول چیزاں کتیاں پیدا ہوئیں؟“ اوس آکھیا، ”جی ترائے۔“ ”کیہڑی کیہڑی؟“ اکھے، ”چھاں جنگل دی کسے ارام نہیں کرنا۔ چاننی پوہ دی کسے بہار نہیں دیکھنی۔ عقل غریب دا، اوہدے آکھے کسے نہیں لگنا۔“ بادشاہ آکھیا، ”ٹھیک ہے۔“ ”اچھا اساوڈے ملک ہندوستان دی بہار دی رُت کیہڑی ہے۔ خزاں دی رُت کیہڑی ہے؟“ اکھے، ”ساون۔“ اکھے، ”ہک مہینہ دو رُتاں۔“ اکھے، ”جی ہا۔“ اکھے، ”کیوں؟“ بیربل آکھیا، ”جی رُت ساون دی ہووے۔ بدل دھانور جاوون۔ ہوا پُرے دی چھٹ جاوے۔ بوندا باندی برسن لگ پوے۔ ایہہ جنت دا نظارہ ہے۔ ساون دی

رُت ہووے۔ مینہ دُٹھے ہوئے ہوون۔ ہوا بند ہو جاوے۔ دُھپ کڑا کا دے کے نکل آوے۔ دوزخ دی گرمی ہے۔“ بادشاہ آکھیا، ”ٹھیک ہے۔“ ہلا بادشاہ آکھیا، ”توں ہمیش زمین آلوں ویکھ کے گردن جھکا کے ٹرنا ہیں۔ ایس وچ کیہ کھڑایا ہئی۔ کیہ دُھوڈھینا ہیں؟“ بیربل سمجھ گیا بادشاہ خول تے آیا ہے۔ اوس آکھیا، ”جی پیو میرا ایسے زمین وچ کھڑی گیا ہا۔ میں ہمیش اوس دی تلاش وچ ہوناں۔“ بادشاہ آکھیا، ”جے پیو تیرا میں دُھوڈھ کے دیواں تاں میرا کیہ انعام؟“ بیربل آکھیا، ”جے پیو دا ادھ نہ دیواں تاں باہمن دا پتر نہ ہوساں۔“ ہس پیا بادشاہ۔ بادشاہ آکھیا، ”ہلا تیتھے لڑکے کتنے ہین؟ میں اُستاد منگوائیں ملک ملک دے۔ اوہناں نوں تعلیم دیوائیں تاں جو میری اولاد کول وی ایہو جیہے بندے رہن۔“ بیربل آکھیا، ”جی ہندو قوم وچ اسیں جت ست قائم رکھنا عبادت جاندے ہاں۔ میں جت ست قائم کیتا ہو یا ہے۔ میں شادی کرو کائی نہیں۔“ بادشاہ آکھیا، ”مڑ تیری نظر اچ تیرا پیوتاں بڑا گناہ گار ہو یا جیس شادی کیتی تے تینوں جمایوس۔“ بادشاہ آکھیا، ”ہٹ جا پچھانہ۔ میں شکار آلوں پرسوں ہٹنا ہے۔ شادی کرکے بیج مان کے میرے پیش نہ ہوسیں، میں اپٹھیاں کرکے کھل لاہ لیاں۔“

بیربل کھلو رہیا ہے۔ دُوئے اگانہہ ٹردے رہے۔ چند نوکر بیربل دے نال ہین۔ بیربل روندنا ہے۔ نوکراں آکھیا، ”شادی چاں کر۔“ اوس آکھیا، ”کہہندے آل کراں؟ غیر قوم آل کراں تاں اگلے تھالیوں کڈھ چھوڑیں، مذہب چوں۔ باہمن نوں میں غریب سمجھ کے برادری دا، اج تائیں نہ فائتا، نہ مکان، نہ سلام نہ گجھ۔ میں ہن کس توں ساک منگاں؟ پچھا جے کسے توں منگاں وی اجیہا کاہلا کون ہے، جیہڑا پرسوں تائیں آکھے ایہلا ہئی۔ میں مری گیا ہاں۔“ ہٹ پیا۔ کچھری بادشاہ دی لگدی ہائی جمنا بازار اچ۔ ایہہ لگھدا او تھتے آوندا ویندا ہا۔ ایس تاڑیا ہو یا با بھئی اوہ گھر باہمنان دا ہے۔ ناں شاں اوہناں دا کوئی ناہس آوندا۔ ہک دو کواریاں اوہناں دیاں نکلدیاں ویہدا ہا۔ آکھیوس نوکراں نوں: میں منگنا ہے ساک ایہنا تھوں۔ ایہناں مارنے ہین لتر۔ سوہری دیاں او! اتھتے نال ہو کھلو، توڑا چھوڑیائے۔ بیربل مگروں ٹردا آوے جیس ویلے اگوں اوہناں نوں ویکھے، کوارا ہا، رنڈن دی لونی لٹھی ہوئی ہوندی ہے۔ ہر بھرا نوں کا نا گھت بہندا ہے پکا ون آلی کائی نہیں۔ ایہہ

نمانا کوارا ہے۔ مگروں ٹردا آوے، جیہڑے ویلے اوہناں نوں ویکھے شرما جاوے۔ اگانہہ لگھ جاوے۔ مُڑا گیرٹے جا کے ہٹے۔ ترتی وار لگھن لگا ہے تاں باہمنّاں آکھیا ہے: بیربل بھیڑیا! غریب وی بھرا ہوندن۔ سلام چاں دتا کر۔ اوہ تاں مندا ایہو گجھ پیا ہا۔ ہٹ آیا۔ سارے باہمن اُٹھی کھلن۔ باہمنیں ہک دُونی نوں دس لگ پیاں: ایہو تاں بیربل ہے جیہڑا ویر ہے بادشاہ دا۔ ”ہلا بیربل! دانا سُنینا ہیں کوئی گل سنا۔“ اوس آکھیا، ”کیہڑی گل سنائیں۔ زمانہ آ گیا ہے کلجک دا۔ ست جگ ہوندا ہا، جیس ویلے کوئی بھرا اوتر پیا ویندا ہووے ہا، اگلے پھدھ کے پرنا چھوڑیندے ہاں۔“ ہر گل پرناون تے لے آوے۔ اوہناں آکھیا۔ ”بیربل! مرض کیہ ہئی؟ گلاں تاں ہور وی ہزاراں ہن۔“ آکھیوس، ”ایہہ ایہہ حکم بادشاہ دے دتا ہے۔ پرسوں میں مری جاونا ہے۔“ بابا ہک اوہناں دا بیٹھا ہا۔ اوس آکھیا، ”او باہمنّاں او! جیس دیہاڑے دا ایہہ ہویا ہے۔ اساڈی قوم دا ناں دُنیا دے کناریاں تائیں ایس پہنچا چھڈیا ہے۔ ایہو جیسے ہمیشاں ماواں نہیں جیندیاں۔ ایہنوں ساک دیو۔“ اوہناں آکھیا، ”بیربل جج کر۔“ بیربل جج کر کے آیا۔ گڑی پرنا کے گھر لے گیا۔

رات سچ دی ہے۔ دس پئی ہے کہ بادشاہ ہٹ آیا ہے جوں دیو بھرے تیری حاضری ہے بھئی ایکھاں میرا حکم نیا سوں کہ نہیں۔ بیربل اپنی بیگم کول ہے۔ سیں گیا ہے۔ ستے نوں خواب آیا ہے بھئی اکبر بادشاہ تے جو دھا بائی رانی ہک اٹاری دے وچ ہن۔ محل دے شہتیر دے وچوں پھنیز ناگ پیا لڑھکدا ہے۔ جاگ گیا۔ آکھیوس: خواب میرا چکا کدی نہیں۔ جے مت لہہ آوے۔ بادشاہ مر جاوے۔ ایہو جیہا بادشاہ اسانوں دُنیا تے لھینا ہی نہیں۔ بیربل اُٹھی کے بہہ رہیا۔ سٹھنگی تلوار دا پہرہ ہے۔ قزلباش کھڑے ہن۔ ستران وچ مینوں کون جاوَن دیندا ہے؟ بیربل روون کڈھ ڈڑھا ہے۔ بیربل اپنے آپ نوں آکھیا ہے ترلا کر مت بچ جاوے۔ مری جاویں تاں ٹکڑا تاں حلال ہو جاسی، جیہڑا اج تائیں کھا دھا ہئی۔ بیربل اُٹھی کھلوتا۔ تلوار چائی ہے۔ بیگم پچھیا ہے ”کدے ویندے ہو مہاراج؟“ بیربل ہٹ کھلا۔ ایس آکھیا، ”گل سن میری۔ میرے گل تاں تینوں بادشاہ گھتیا ہے۔ میں اوہناں مرداں وچوں نہیں، جیہڑے پرمت کٹا کے اجازتاں منگ کے ٹردن۔ آئندہ واسطے مت مینوں مگروں سدیں۔“ اوہ چپ کر گئی۔

ایہہ ٹرپیا ہے۔ اگانہہ آیا ہے تاں تکیا پیس سٹھ پہرے دار کھلا ہے۔ کھمبیاں اُتے شمع دان ہن، اوہ جگ رہن۔ کوہ تائیں ہر شے نظر آرہی ہے۔ حد ہائی رکھی ہوئی بھئی ایس حد دے اندر جیہڑا آجاوے اوہدا سر وڈھ لینا۔ ایس حد تائیں کوئی آوے تاں گرفتار کر کے میرے پیش کرنا۔ جیس ویلے اوہ حد پار کرن لگا ہے تاں اوہناں آکھیا، ”ایہہ کون ہے؟“ اوہ بھج پئے۔ اوہناں نوں سارنگ کرنا پیا۔ ”بیربل ہوش اچ ہیں۔ کیویں اتھے آیا ہیں؟“ اوس آکھیا، ”میں ستریں جاونا ہے۔“ اوہناں آکھیا، ”جتھے توں آیا کھلا ہیں اتھے اسانوں گرفتار کرن دا حکم ہے۔ ایہتھوں اگانہہ ٹپ پویں بھادویں اکبر دا پوکیوں نہ ہووے اسان سر وڈھ لینا ہے۔“ اوہناں آکھیا، ”نکل جا۔“ بیربل آکھیا، ”میں ہٹ وینا ہاں۔ سویرے بادشاہ مر جاوے یاں بیگم مر جاوے۔ بادشاہ دی موت میں سٹھ بندے توں لیاں۔ رات تہاڈی ہے۔ دینہہ میرا ہے۔ مینوں اندر جاوے دیوتاں بادشاہ دی موت دا میں ذمے وار ہاں۔ نہ جاوے دیوتاں تسیں ذمے وار ہو۔“ اوہناں آپس اچ صلاح کیتی ہے۔ بیربل ہويا۔ اوہناں آکھیا، ”مڑ لگھ جا۔ اساڈا ناں نہ لئیں۔“ بیربل جیہڑے ویلے دروازہ پار کیتا ہے۔ چوٹیوں پگھر نکلیا ہے گھریاں تے جا کھلا ہے۔ قدم قدم تے موت ہے۔ پھدھی جاواں تاں میں مری جاونا ہے۔ ہٹ جاواں مڑ احسان بادشاہ دے یاد کرے۔ آکھیوس: مرنا ہک دیہاڑے سر پر ہے۔ نکلڑا حلال ہو جاسی ہا، مری وی گئیوں تاں مت بادشاہ بچ پوے۔

اندر ایہہ گیا ہے۔ رات دے وقت نوں مغلاں دے گھراں وچ گھسے پہریدار ہوندے ہاکن۔ اوہناں نوں خواجہ سرا سدیا جاندا ہا۔ گھسرا سدنا اوہناں نوں جرم ہا۔ خواجہ سرا کرسی تے بیٹھا ہے۔ پھلا تلوار دا زمین دے وچ دبایا ہويا ہے۔ قبضے تے سردھریا ہويا ہے۔ اوہ وی گھوک ستا پیا ہے۔ این ول تکیا ہے تاں پھنیز ناگ۔ اوہ شہتیر توں لڑھک رہیا ہے۔ بیربل آکے مٹھ بھری ہے خواجہ سرا نوں۔ اوہ جا گیا ہے۔ اوس آکھیا، ”دھی یاویا دیونے پہرے بادشاہ دے بونجا صوبے دا مالک ہے تے سیں جاونا۔ نمک حراما! اُتوں وکھ۔ میں رات سچ دی چھوڑی ہے۔ سٹھ تلوار دے پیٹھوں لگھ کے آیا کھلا ہاں۔ میں نکلا پیا ہوں۔ ایہہ سپ مار۔“ اوس آکھیا، ”ہک واری جالیں۔ میری کرسی دے پیٹھ

کیہ ہے؟“ اُکھے، ”پانی۔“ اُکھے، ”میرا پیشاب پیا وہندا ہے۔ میں ناںگاں مارن جوگا ہاں۔ مارنا ہئی تاں آپ مار۔ نہیں تاں میں اُگلے کمرے وچ پیا وینا ہاں۔“ بیربل آکھیا، ”تیر کمان آن دے۔“ اوس آن دتا۔ بیربل شست رلا کے ماریا تیر سپ دے کوپر دے وچوں لگھ کے جتنا تیر ہا شہتیر دے وچ ٹھک گیا۔ سپ اوتھے پھاس گیا۔ قطرے خون دے ڈھین لگ پئے۔ اوہ بیگم تے پون لگ پئے۔ بیربل سوچیا: جے جگائیں تاں بیمار ہو جاسی تے ایہہ زہر ایہدے اُتے پئی ڈھندی ہے۔ ایس مر جاونہ ہے۔ ”میں ویندا پیا ہوں۔ ایہہ قطرے خون دے چو کیندا رہو رُوں لے کے۔“ اوس آکھیا، ”ٹھیک ہے پر میں انج چو کیندا پیا ہوواں تے قطرہ اوتھے (تھہ دے پچھلے پاسے) آوے تاں میں کدے؟ چو کنا ہئی تاں آپ چوک۔“ اوس آکھیا، ”رُوں لے آ۔“ قطرہ جیہڑا ڈھندا ہے۔ بیربل چو کیندا ہے۔ اوہ سٹ گھٹیندا ہے۔ مڑ بنا کھلوندا ہے۔ بیگم پاسا پر تیا ہے۔ اگے قطرے ممیض تے پے ڈھندے ہاں اوہ قطرہ ہسی تے ڈھٹھا ہے۔ اوہ چو کن لگا۔ بیگم جاگ پئی۔ جوں اوس نکلیا ہے تاں ہک مرد اُتے بویاں کھلا ہے۔ بادشاہ نوں اوس مٹھ بھری ہے کہ کوئی بوسے لے رہیا ہے۔ اٹھو نا بادشاہ دا بیربل انجیں سمجھیا ہے کہ بھمب آ گیا ہے۔ بل گئی ہے ہر شے۔ بادشاہ نکلیا ہے بیربل نوں۔ اگے بادشاہ نوں ہک واری شک پیا ہا کہ ستریں رہندا ہے۔ یقین ہو گیا۔ بیگم نوں آکھیا، ”اندر چلی جا۔“ سد ماریا ہے۔ ”قرلباش۔“ اوہناں آکھیا پیا کھلا ہئی۔ ”ہاں جناب۔“ ”آ جاؤ اندر۔“ آگئے۔ ”یہ کون ہے؟“ اُکھے، ”بیربل۔“ اُکھے، ”ہمارا وزیر۔“ اُکھے، ”جی۔“ ”ایہوں قتل گڑھ لے جاؤ۔ ایس دی گردن دا خون تے آنے کڈھ کے ہُنے میرے پیش کرو۔“ کیا مجال ہے گھسے دی جوں گواہی چاں دیوے۔ بغیر آکھے دے بولنا مشکل ہا۔

جیس ویلے قتل گڑھ وچ آندا نیں۔ بیربل دے کپڑے اُتارن لگن۔ اوس آکھیا، ”ہک گل میری سن لو۔ رات کتنی رہندی ہے؟“ اوہناں آکھیا، ”پہر۔“ اُکھے، ”پہر رات نہیں رہندی۔ سٹھ تساں بندے دی زندگی ہک پہر رہ گئی ہے۔ میں اندر کھیڈن نہیں گیا۔ انج سب میں جا ماریا۔ فجر بادشاہ نوں پتہ لگنا ہے۔ میرے کان بادشاہ نوں غم آونا ہے بھئی ایڈے نمک حلال نوں میں کیوں ماریا تے تساں موت سزا ہو جاونہ ہے۔“ گل

اوہناں دے وی دل لگ گئی۔ اوہناں آکھیا، ”ہن کرے کیہ؟ بادشاہ دو نشان منگدا ہے۔“
 بیربل آکھیا، ”میرے گھر لگے جاؤ۔ اک ہرن کھلا ہے، ہک بکرا۔ دوویں چیزاں ذبح چاں
 کرو۔ بکرے دا خون لے لیو۔ ہرن دے آنے بندے آر ہوندن۔ ایہہ وقت دھک
 چھڈو۔ فجر جیہڑے ویلے بادشاہ ناگ تکنا ہے، میں تہانوں انعام لے دیونا ہے۔“ اوہ لگن
 دو جنے۔ ڈھیر ڈھل دے بعد اوہ آگن۔ اوہناں آکھیا، ”تیری سوانی نہ بکرا ذبح کرن
 دیندی ہے نہ ہرن۔“ بیربل آکھیا، ”حد مک گئی ہے۔ کل پئی آوندی ہے تے اج موت
 میری قبول کرو ہے۔“ اوہناں آکھیا، ”نہیں تینوں غلطی ہے۔“ ”ہلا۔“ اکھے، ”اوہ آہدی
 ہے بھئی گردن میری دا خون لتو تے آنے وی میرے کڈھو۔ بیربل بچ جاوے۔ میں
 جیہیاں ہزار لے سکدا ہے۔ مینوں بیربل جیہاں لھنا کوئی نہیں۔ نالے میں اپنی وفا دا ثبوت
 دے جاواں۔“ بیربل دیاں ہتھوں ٹپیاں بین بھئی واقعی عورت مرد دا وڈا سا ننگا ہے پر میں
 ہن عورت مرا کے بچاں تاں بندیائی کائی نہیں۔ ”ٹسیں جاؤ۔“ گئے ہن۔ اوہناں جا کے
 ہرن وی ذبح کیتا ہے تے بکرا وی۔ دوواں دا خون تے آنے بادشاہ دے پیش کیتے ہن۔
 بادشاہ دوویں چیزاں کتیاں توں لکا چھڈین۔

ماریا اعوان سجاوا سکھ مجھیں نوں آئے
 ہُن بادشاہ طبیعت وچ آیا ہے۔ بیگم نوں کول بلایا ہے ”کھسرا۔“ اکھے،
 ”جی۔“ ”کائی کہانی سنا؟“ اوس آکھیا، ”جی“ مینوں تاں کہانی یاد کائی نہیں۔ مٹھیں
 آکھوتاں بھرینا ہاں۔ ”بیگم آکھیا، ”ٹسیں کچھری وگ ویندے ہو۔ اتیناں سُنیدا ہے کہ
 مُکُن وچ نہیں آوندیاں۔“ بادشاہ آکھیا، ”مادر چودا رناں وچ دھنا بن بہندا ہیں تے
 مینوں کہانی بیہوں سُنیدا۔“ اوس آکھیا، ”جی سچ چکھدے ہوتاں ایہہ کائی قوم تے
 نہیں۔ نہ ایہناں وچوں کائی نبی ہوئی نہ کائی امام۔ نہ جرنیل نہ بادشاہ۔ کائی کریندا
 رہاں ایہہ خوش رہندین۔ ہن مینوں کرنی پئی اکبر بادشاہ دے اگے۔ ایہہ مُکان ٹرن
 گو لگو پٹ، پلی کھو، گنا بھن۔ ہسدیاں کھیڑ دیاں لکیاں گئیاں، جیس ویلے مُکان آلا
 گھر نیڑے آیا ڈکرا دھک کے گلھ آل چاں کیتا تے اوتھوں روونا شروع کر دتا۔
 جیہڑی دے گل لگن سیڈھ سُنک کے اوہدے موڈھیاں تے رکھی رکھنا تے کچھے اوہنوں

کھیاں ہُت نہ لین دیونی۔ ایہہ اوہ ٹبر ہويا۔ میں کھچ مار بہاں۔ توہیں آ کھنا ہے سروڈھ
 لینیو۔ ہويا سردا سر۔ شے اگے کائی نہ ہوئی۔“ بیگم آ کھیا، ”الیں بیربل ڈٹھا ہے مردا۔ نمانا
 ڈریا بیٹھا ہے۔ تسیں کوئی وعدہ چاں کرو۔“ بادشاہ آ کھیا، ”توہیں کائی کھچ ماری نا، اوہ
 ماف تے گل سنا۔“ ہن اوس کہانی شروع کیتی۔

اوس آ کھیا: جی ہک ہويا ہے سوداگر۔ اوس نوں پتر ڈھیہا۔ پتر دے ناں اوس
 لکھی سوداگر رکھیا ہے۔ اوہنوں علم پڑھایا۔ اوہ جوان ہو گیا۔ مڑ اوہدی شادی کیتی۔ شادی
 کیتی تاں عورت بڑی خوبصورت۔ لکھی اگے عورت دی قوم دا واقف نہ۔ مسیتڑ جیہا ہا۔ اوہ
 سارا چاپہرا عورت کول بیٹھا رہے تے ویہدار ہے۔ پو اوس دا اکیا کہ ایہہ تاں باہر نکھنوں
 ای رہیا۔ اوس وکھریاں چاں کیتا۔ لکھی لیٹرین وی گھر بنوالی بھئی ایہہ وقت وی میں باہر
 نہ جاواں۔ پو مڑ اکیا اوہ لگا آیا۔ اوس آ کھیا: بچیا!

چڑھدے مرزے خان نوں، وجھل دتی ہے مت
 بھٹھ رناں دی دوستی گھری جھان دی مت
 لاون ہس کے یاریاں، رو کے دیون دس
 پچھے پچھوتاوندیاں، مار پٹاں تے ہتھ
 ہتھیں ویر کوہندیاں، دے گردن تے لت
 جھلیں بگدے شیر نوں، کسے نہ گھتی ہے نتھ
 بکرا دیواں پیر دا، آویں سیالاں چوں وت

میں تینوں دساں۔ مرد عورت دو پیسے ہن۔ مرد داکم ہے باہروں کمالے آ دنا۔ عورت دا
 کم ہے گھر سانھنا تے توں رناں آ لے کم تے ہو گیا ہیں۔ بھرے کھوہ وی اُتھڑ ویندن
 تے جیس ویلے توہیں بھکھیاں ہو جانا ہے، عورت دا بخت ہے صورت، لگدی ایہہ تیری گجھ
 نہیں، ایہہ کوئی لے کے بہہ رہی توں کیہ کریسیں؟ بھیڑیا کما۔ اساں وی شادیاں کیتیاں
 ہیں۔ محبتاں وی ہان، پر سال نکلیا، بارہاں سال دا خرچ آ گیا۔ اٹھیا ہے لکھی اوس پو
 دے پیر چاں پکڑے۔ اگلی مانی دے۔ میں دیو بھرے لا تیری کرینا ہاں سوداگری دی۔ خدا
 دا راضی کرنا ماں پو دے راضی کرن وچ ہے۔ لگدا انسان دا گجھ نہیں۔ جیس ویلے لکھی پو

دے پیر پکڑے اوہدیاں ہنجوں ویہہ آئیاں۔ اوہ دعائیں دیندا اٹھی گیا۔

سوانی دا کن کم بہوں کریندا ہے۔ ایہہ گلے دیاں ہلیاں ہوندین۔ مونہہ ہور دے ہوونا کچھلی وی سن لینی۔ مرد نما ناچدے بوقھاڑ ہوس، اودائیں سندا ہے۔ جیس ویلے پو اٹھی گیا ہیں تاں عورت اوس نوں آکھیا، ”ایہہ بڈھڑ کیہ کھچ کھچ کریندا ہائیا؟“ اوس آکھیا، ”ڈھڑ بے وقوف، چیل دی چیل، ایہہ کیہ آکھیا ہئی؟“ اوس آکھیا، ”جیس ویلے آپ بڈھڑے ہو جاؤں انجیں آہدن۔ ایہہ تینوں آہدا ہے سوداگری تے جا۔ میں تینوں ہک منٹ نہ ویکھاں تاں مرن ڈھکنی ہاں۔ یاں مینوں نال لے جاسیں، نہیں تاں ایس دریا اچ بڈ کے میں مرجساؤں۔ ایہہ یاد رکھیں۔“ سوداگر حیران ہو گیا بھئی میں ہن کیہ کراں۔ اوس آکھیا، ”میڑا ٹھل جاوی توں ستریں دی ہلی ہوئی۔ تیرا پردہ ہو یا۔ میرے نال بھاڑی ہوونے ہوئے۔ میں اگانہ سوداگراں نوں ملنا ہو یا۔ دریا عبور کرنے، پہاڑ عبور کرنے تے اتنی مخلوق دے وچ میں تیرا پردہ کیوں رکھساں؟“ اوس آکھیا، ”میں تینوں دسی ہاں۔ ہک صندوق چاں بنوا۔ اوہنوں شیشے چاں لوا۔ صندوق اتنا ہوئے جہدے وچ اٹھی کے میں ہک دو قدم پٹ لئیں۔ جتھے لتھا کڈھ بیٹھا۔“ اوس آکھیا، ”چلو ٹھیک ہے۔“ اوس کاربگر چاں منگوائے۔ دل وچ کیہ میں صندوق بنوینا ہاں تاں ایہہ شکار مٹی۔ لے میں جاؤنی کائی نہیں۔ جیہڑے روز تیاری دے ہین، ایہناں وچ شکار فساد نہ ہووے۔ صندوق تیار ہوون لگ پیا۔ شہر سارے وچ گل مشہور ہو گئی کہ لکھی عورت نوں نال لے جاؤ ہے۔ پو آن کے ہوڑیوس بھیڑیا! اسیں سارے ویندے ہاسے سوداگریاں تے۔ اوس آکھیا، ”ابا جی! عورت اپنی موم۔ میں لے جاؤنی ہے۔“ ”چلو ٹھیک ہے۔“

لکھی سوداگر تیاری چاں کیتی ہے۔ جیس رات ٹرنا ہاوس۔ پرانا چور ہک جٹ کھچر، تجربے کار ہا، اج اوہدی ہر شے باہر لہنی ہے۔ کوئی شادی کرو ہووے۔ مالا اکٹھا کرو ہے۔ چور تک تے آوندن اج باہر ملنی ہے ہر شے۔ اوس آکے سنھ چاں ماری۔ اوس تکیا ہے لکھی تے لکھی دی عورت ہک پلگھ تے پیٹھن۔ نھھا جیہا ڈیوا بلدا ہے پیا۔ لکھی خیال مریندا ہے بھئی میں سال دے بعد آونا ہے۔ ٹھڈھا ساہ بھر کے آہدا ہے: چنگا اللہ حافظ۔ اوس آکھیا، ”میں نہیں آونا۔“ لکھی آکھیا، ”توہیں آونا ہے پر اوتھے لکھی ہے ڈھل مال شال لدیندیاں۔“

جیس ویلے لدر ہسائیں میں تیرے آل وساہی بندہ گھلیساں۔ چھری تے رومال دا جیہڑا سناہ دیوی اوہدے نال لگی آویں۔“ چور سُندا پیا ہے۔ لکھی وگ گیا ہے۔ چور خیال کیتا ہے بھئی عمر ساری لکے ہاں۔ چھ بھرا ہاسے پر سوانی دی کھگھ کان لوہ کے مر گیا سے بھئی ویڑھے وچ کھگھدی کیویں ہے؟ ایہہ عورت ہتھیں آوندی ہے۔ بے چھری رومال دا سناہ دیواں تاں۔ اوس بھگلی سنھ وچ تاں تُئی مگر اوہ وی ٹر پیا۔ اوہناں بھار شار لدیا۔ لے کے اوہ ٹر پئے۔ کوہ ڈیڈھ چور وی نال ٹردا رہیا۔ جیہڑے ویلے یقین ہو گیا کہ چھری رومال دا سناہ کسے نوں نہیوں دتا۔ چور ہٹ کے لگا آیا۔ اوس آکھیا، ”لکھی دا ٹبر توں ہیں؟“ آکھے، ”جی ہا۔“ ”چھری رومال دا سناہ دیندا ہئی تے اُٹھی۔ اوہ پڑوٹا گھنیاں آلا وی چا لاتے ٹر۔“ جیس ویلے ٹر پے ہین، لہندے آل مونہہ لکھی ہوراں کیتا ہا، جٹ سدھا مونہہ لنگا نوں کیتا۔ بھئی قیامت تاں کیس میل نہ ہوون۔ لے کے ٹر پیا۔ جیہڑے ویلے جنگل دے وچ وڑی ہے عورت پردے دی پٹی ہوئی، ڈرے جھاڑاں نوں ویکھ کے۔ کچھ لکھی ہوریں کدے نی؟ پنڈے چمکن بار دے تاں آکھے: اوہ ٹونے کھڑکدے ویندن تے ہنے آ ویندن۔ جیس ویلے جٹ خیال کیتا بھئی اگوں پچھوں کائی شے نہیں۔ اوس آکھیا، ”اتھتھے بہورنے۔ میں چور ہاں۔ سنھ وچ بیٹھا ہام تے ایہہ گل سنی موں تے تینوں لئی ویندا ہو یوم۔“ ایہہ گل گھسرا پیا کریندا ہے اگے بادشاہ دے۔

لکھی نوں سال پے گیا۔ جتھے جاوے آکھے: کنیں کہانی آ لے سدو۔ قصے کہانی آ لے آجاو۔ ہلا بھئی کائی اوہ گل سنائیو جتھے مرد بے وفائی کریندا ہے نال عورت دے۔ اوہ سنان۔ نالے رووے نالے پیسے دیوے۔ میں تاں اوہدے نال بڑی بے وفائی کیتی۔ سال دے بعد ہٹ کے آیا ہے۔ آیا گھرتے رڑی ہوئی پئی۔ لکھی حال حال چاں گھتی۔ آکھیوں پیونوں: اودوں راتھ بنیوں تے مینوں اکھیوئی نہ نال لے جا۔ سوانی بڈ کے مرگئی۔ اوس قسماں چائیاں ہوئیاں ہان۔ محبت اوس نوں ہائی۔ سال دے موپاں ہوپاں دا ستھر پے گیا۔ لکھی کسے ویلے اوہدیاں گڈیاں کڈھ بہہ۔ رووے۔ کسے ویلے اوہدے زیور کڈھ بہہ۔ بندہ ہک لکھی دا بیلی آ گیا۔ بندہ تجربے کار ہا۔ لکھی دے پیو اوس نوں دکھریاں سدیا۔ اوس آکھیا، ”ایہہ نوں سوہرے نوں گجھ سمجھا۔ سوانی ہائی مرگئی تے میں مڑ ایہہ نوں پرینا ہاں۔“

ایہہ گچھ تھہرا مے لگے۔“ اوہ بندہ وکھریاں لے کے بہہ رہیا۔ اوس پچھیا، ”ہلا بھر جائی نوں
کیہ ہویا؟“ لکھی آ کھیا، ”میرا بیڑا تاں ایس پیو بوڑیا ہے وسدے رسدے دا۔ سوانی آ کھیا
ہویا ہا بڈ کے مرگئی۔“ ”دھرک کتھوں مار یوس؟“ اکھے، ”ایہہ وی پتہ کوئی نہیں۔“ ”لاش
کتھوں نی نیس؟“ اکھے، ”پنی وی کسے نہیں۔“ اوس آ کھیا، ”گندے دے گندیا! کدی انج
وی مونیان ہین جیویں توں مرینا ہین۔ سوانی نکلی تیرے مگروں۔ اگوں کسے دل تے پے گئی
تے گھر بنا بیٹھی۔ توں سٹھ ستر کوہ چاں بھوں۔ بے سوانی تینوں نہ لکھے تاں میرا نک وڈھ
لئیں۔“ گل گچھ لکھی دے وی دل لگی۔ بھائی کوئی نشان تاں ہوندا اوس موئی ہوئی دا۔ بلی
نوں آ کھیوس، ”میں مڑ کیہ کراں؟“ اکھے، ”امیر نوں کوئی نہیں وڑن دیندا گھر وچ۔ فقیر بن
کے ٹر پٹو۔ ہک واری ستران دے وچ وی نظر مار چھوڑیائی تاں اگلیاں ایہو گچھ آ کھنا ہے
چبل دی چبل آ کدے وڑیا آ وندا ہین۔ امیر جھات چاں گھتے اگلیاں اوہدا سر وڈھ لینا
ہے۔“ لکھی چاں نائی سدیا۔ سر بھر بھٹے، مچھاں داڑھی مٹا کے، بھھوت مل کے، کشتکول
چاکے فقیر بن کے ٹر پیا۔ شکاری ہا تازن گئی، ہک آندی ہاوس، اوہ ڈور کر لئیس بھئی
کدائیں تماشا ویکھ کھلا۔ ایہہ کدو خیرات لے کدو نہ لے جھاتی گھتے۔ سال گزر
گیا۔ اوس بلی نوں دعائیں دیوے بھئی گھرتاں میں ہوواں ہاں تاں ہن تائیں رورو کے
میں مر جاواں ہا۔ ون ون دے دیس ویہناں ہاں۔ کڑیاں گھرو ویہناں۔ جنگل پہاڑ
ویہناں۔ دل گچھ وچلی گیا۔

سال دے بعد ہک نگری دے وچ آیا ہے۔ آ کے صدا کیتی ہے۔ ”الکھ بابا جی
الکھ۔“ اندروں آواز آیا ہے کہ فقیر اندر آ کے خیر لے لے۔ آواز جیہڑے ویلے کنال تے آیا
ہے تے ایہہ یقین ہو یا ہے آواز میری عورت ستوتی آرہے۔ آ کھیوس: چلو ویکھیے تے سہی۔

ہک توہیں جیہا میرا یار آ ہا

ہک آپ سوہنا، دُوئی چال سوہنی، ترینا سوہنیاں دا سردار آ ہا
ویکھ تاں لینے۔ اندر آیا ہے۔ جے تکیا ہے تاں دھنھ جیڈا جماونا ہے تے اوہ گھوئیں
بیٹھی کڈھدی ہے۔ اوہا سگوس۔ حیران ہو گیا۔

اساڈے دل وچ ہور ہائی، کر سجاں ہور وکھائی

سجاں نال کر بندے ٹھگیاں، تھیندے جرم قضائی

میں کیہ خیال کیتا ہو یا ہے اوہ دیکھن لگ پئی ہے۔ ایہہ فقیر سرمنا ہے۔ داڑھی مجھ مُنا
 ہے بھر بھٹیاں تائیں۔ کجھ ایہدے نقش لکھی آر پوندن۔ عورت انجے وٹا دگیا ہے:
 سنا فقیرا ! اوس نگری کی بات
 لکھی آکھیا ہے:

بھلا نہ کیتا ہے دوستاں میریاں زلفاں لئیاں نیں کاٹ
 اسانوں چھڈ کے وچ پردیس دے آپ اُٹھ گئے کچھلی رات
 مینوں جیس دن دلبر چھوڑیا مینوں دُکھاں پائی ہے جھات
 کیہ دساں بھیڑیے اوس نگری دی بات
 ”لکھی ہیں؟“ اُکھے، ”ہاں“ عورت روون کڈھ ڈڑھی ہے۔ اوس آکھیا، ”میرے نال
 توہیں دھوکھا کیتا ہے چھری رُومال دے سناہ تے۔ ایہہ چور سنھ ماری بیٹھا ہا۔ ایہہ لے
 کے اوہراں لگا آیا۔ میں تیری ہاں۔ مویاں مٹی وی تیری غلام ہوئی۔“ اُکھے ”مڑ ٹُڑ۔“
 اوس آکھیا، ”اوہدی ہے واری کھوہ دی امدی راتیں۔ ہن اوہدے آون دا ویلا ہے۔ توں
 لک جا۔ ایہہ بڑے قاتل ہن۔ بڑے ڈاکو ہن۔ مری جاسیں۔ اوہ آوسی کنگ پی کے
 تماکو لے کے وگ جاسی۔ مڑ ساری رات ہے۔ ایہہ گھوڑا کھلا ہے نکل جاسیں۔“ اوس
 آکھیا، ”مڑ کدے لگاں؟“ ستونتی کھلڑ آن دتا۔ کھلڑ اوس زمانے ہوندے ہائیں جیویں
 ایہہ اسیں بوجھیاں بنندے ہاں آٹے آلیاں۔ آٹے آلے کھلڑ وچ ایس آکھیا، ”وڑ جا
 مونہہ میرے آل چاں کر۔ گلاں کریندا رہو۔ جیس ویلے میں سیٹ مراؤ“ اوس ویلے سر
 پچھانہہ چھک لئیں۔“

گلاں کریندے رہن تاں جوں ہکے واری سنے لئراں دے بولن دا آواز آیا
 ہے۔ ستونتی سیٹ ماری۔ لکھی سر پچھانہہ چھک لیا۔ جٹ لگھ آیا۔ لکھی تکیا تاں ملوم ہو یا کٹا
 کھلا ہے۔ سارے جُٹے تے پشتم ہے۔ آوندیاں ہی اوس آکھیا، ”کیوں رنے! مینوں جوں
 آکھیا پنھا کاتے تماکو گھلیں۔“ اوس آکھیا، ”ہن رڑک رہی ہاں۔ لسی پی لا۔ تماکو میں دینی
 ہاں۔“ مکھن جھپ کے سوانی کڈھ لیا۔ جٹ جماونا وڈنڈی تھلے دی تے چاں رکھیا۔ پیٹھ
 ہو گیا جیویں کھڈنوں پانی لہندا ہے۔ سارا مکا کے جیہڑی چھنڈک مچھاں تے لگی ہا، اوہ

چوپ لئی بھئی نور خدا دا ہے۔ جٹ اوس ویلے ڈکار لیا جیویں گدوں ہینگدا ہے۔ سوانی نوں آکھیا، ”تماکو؟“ اوس آکھیا، ”اوس کھلڈ وچ ہئی تماکو۔“ لے بھئی لکھی آکھیا، ”مر تھاں گیا ہاں۔“ جٹ اگانہہ آیا ہے۔ لکھی پھڑکیا ہے۔ جٹ آکھیا، ”اوئے کیہ بلاں ہے وچ؟“ اکھے، ”اج گھر آلا آیا بیٹھا ہے۔“ جٹ ڈنگوری نپ تے کڈھ ڈڑھا۔ اوہ تاں منج کٹنی ہاوس۔ وچ تاں اگے وڑیا پیا ہا۔ لہو فرلاٹے دے کے نکلیا ہے۔ سوانی تھک وی سٹی تے آکھیوس، ”باہر جاسائیں مرلیں۔ سارا تھلہا چاں ترکایا ہئی۔“

ص: صفت کریئے اوہناں عورتاں دی، جہاں عورتاں خان نوا دتے
 راجے بھوج تے چڑھ اسوار ہونیاں، مار اڈیاں ہوش بھلا دتے
 راجا بھوج شودھا کون ہا، دہینسر جیہے وی ایہناں مروا دتے
 قادر یار دہینسر کون آہا، یوسف جیہے وی قید کرا دتے
 جٹ ایدوں ہک رسی نپی۔ کھلڈ دا مونہہ چاں بدھا۔ سرتے چا لیا۔ لے کے
 ٹرپیا۔ جنگل دے وچ ہک ڈل تاڑی ہوئی ہا۔ جا کے جٹ وچ چاں سٹیا۔ کتتی سوداگر دی
 مگر مگر کتتی چکر چاں بدھن اُتے ڈل دے۔ اوہ وگا کے وگ گیا ہے۔ دو حصیاں اج پانی
 ہے۔ ہک حصہ سُکا ہے۔ خدا جیہوں بچاؤ ہووے جیس ویلے انسان نوں ہر کوئی چھوڑ ویندا
 ہے اوس ہک ذات کدی نہیں چھوڑیا۔ سکے حصے دے وچ کھلڈ آیا۔ کتتی اُتوں دھرک چاں
 ماریا ہے۔ چکاں نال کتتی کھلڈ پاڑ سٹیا ہے۔ جین دے اُتے کھلڈ چاں سٹیا ہے۔ آپ اُتے
 بہہ رہیا ہے۔ کتتی جھولی اج چاں گھتی ہے۔ ہن خدا نوں پکارن لگ پیا ہے جیہڑے ویلے
 ہر کوئی انسان نوں چھوڑ جاوے اکھے ہن تاں اللہ آلی گلی رہ گئی ہے۔ اوس ویلے خالص اللہ
 دا ہو ویندا ہے۔ میریا اللہ! جیس رن دے مگر تیری یاد چھوڑی اج اوس ایس منزل تے
 پہنچایا ہے۔ میرے اُتے رحم کر۔ رووے۔ اُتوں پھٹاں نوں سُدگا ہے۔ اُتوں بخار ہے۔
 اُتوں پالا ہے۔

کنیں ڈنگ گزر گئے۔ کوئی سوداگر کسے ملک دا چڑھیا ہے۔ اوس جھاڑ ڈٹھے
 ہین بڑے پئے ہوئے۔ اوس آکھیا ہے ”اتھے اٹھ پہر کیئے۔ اٹھ جیہڑے ہین نا ایہہ مڑ
 چار دیہاڑے سفر چنگا کریں۔ کوئی پانی تلاش کرو۔“ ایدے آدے دھروڑے ہین۔

دل نظر آئی ہے۔ وچ وٹا وگایا ہے۔ پانی بولیا ہے اُتے آن کے اوہناں کھوڑی لا دتی ہے تاں جے ہوگ سنی ہے۔ اوہناں کڈھیا ہے کُتی نوں وی، ایس نوں وی۔ اوس سوداگروں ایس حقیقت کیتی ہے۔ اوہنوں ترس آ گیا۔ اوس علاج کیتن۔ ایہہ گھل گیا ہے۔ لکھی آکھیا ہے، ”چاچا! اگے وی بڑا احسان کیتا ہئی۔ ہک احسان ہوو چاں کر۔“ ”کیہڑا؟“ ”ہک چھرا فولاد دادے۔ میں اوس جٹ تے جاونا ہے۔“ چھرا سبز فولاد دا لے کے ٹرپیا ہے۔ اگانہہ آیا ہے۔ جٹ ستا پیا ہے جیویں اُکا نہہ نوں واء لگی کھلی ہوندی ہے۔ شوکاٹ پے آون۔

ستیاں دا کیہ مارنا ہے لوتھ منجی تے بوجھا
ایہنوں کیہ پتہ لکسی، مینوں کون پیا مریندا ہے۔ والاں چوں نپ کے لکھی جھوس دتی ہے:

اٹھی او مرجیا ستیا، تیرے سر سیال کھلے
اوہ پھڑکیا ہی ہے۔ ایس چھرا دھریا ہے۔ سرکٹ کے پرانہ۔ عورت پیراں اچ آن لگی ہے۔

ازحد محبت جیہڑی ہے ایہہ بے غیرتیاں کریندی ہے۔ کسے شے دی وی محبت کرے نا انسان، غیرت چھوڑنی پیندی ہے۔ محبت بہوں ہائی لکھی دی۔ اُکھ، ”آونی ہیں؟“ اُکھ، ”چل۔“ اوس آکھیا، ”ایہہ گھوڑا کھلا ہے۔ ایہہ زیور پیا ہے ایس دا۔ ہر شے کھر جی اچ سٹ۔ لکھی اگے چڑھ بیٹھا ہے۔ عورت نوں مگر چڑھا لیا ہے۔ جیہڑے ایلے انج ٹرے ہین نا، عورت آکھیا، ”ایہہ تاں آہا ہا میں مار آیا ہاں۔ توں بچیا کیویں ہیں؟“ اوس آکھیا، ”گھر گیاں میں تینوں ساری سُنیاں۔ بندہ قتل کیتی کھلا ہاں۔ نالے توں بندہ اوہناں دا ہاؤں تینوں لئی ویناں۔ بندے دے مُل دا گھوڑا لئی ویناں۔ گھر جا دسیاں۔“ عورت سمجھ گئی ہر گیا ہے۔ عورت آکھیا، ”یاں میں حال حال پئی گھتنی ہاؤں۔ ایہہ بھرا اودے سٹے ہوئے یاں گل دس۔“ لکھی گھوڑا ڈکیا ہے۔ گل سناون لگ پیا ہے، جیہڑے ایلے سنا رہیا ہے۔ عورت نوں سمجھ آئی ایس کُتی ایس نوں بچایا ہے۔ عورت آکھیا، ”گل ایہہ ہئی یاں میں حال حال پئی گھتنی ہاؤں یاں کُتی مار۔“ اوس آکھیا، ”بھیڑیے! ایس کُتی مینوں بچا

گھٹیا ہے۔“ ”ایہہ گل ہے۔ ایہہ سوکن ہو چکی ہے۔“ عورت سوکا نہیں پچا سکدی۔ ”تو ہیں ایہدی محبت کرنی میتھوں وی زیادہ۔“ جیہڑے ایلے لکھی سمجھیا ہے۔ ایہہ حال حال گھٹندی ہے۔ اوہو چھرا لکھی دے ہتھ اچ ہا۔ کُتی انتظار اچ کھلی ہا۔ سائیں حکم دیوے تاں ٹراں۔ ایس اچ نہوا جھرا دکایا ہے۔ جھرا کُتی نوں جھیاں چوں آیا ہے کند آلوں نکلیا ہے۔ اوہدی کوک نکلی ہے جیس کوک دا معنی ایہہ ہا لکھی بھیڑیا! ایس عورت دے آکھے لگ کے مینوں تو ہیں نہ مارنا۔

بادشاہ دیاں ہنجوں ٹپیاں۔ بادشاہ لیٹیا ہویا ہا۔ اٹھی بیٹھا۔ بادشاہ آکھیا، ”خواجہ سرا! اوس حرامی کُتی مار گھتی۔“ آکھے، ”جی ہا۔“ آکھے، ”بڑا خدمت پلٹ ہا۔“ اوس آکھیا، ”جی اوہ انجی ہا جیویں توں ہیں۔“ بادشاہ آکھیا، ”میں کیویں؟“ آکھے، ”جیویں اوہ ہا۔“ بادشاہ آکھیا، ”بے وقوفا! اوس تاں سوانی دے پچھے کُتی مار گھتی۔ میں کیہ کیتا؟“ خواجہ سرا آکھیا، ”میں سنائی ہے کہانی۔ پتہ نہیں سچی ہے یاں گُوڑی پر اوس جے ماری ہے تاں کُتی ای ماری ہے تو ہیں ایس دے آکھے لگ کے بیربل سٹھنگی تلوار پٹھوں ٹپ کے رات بیج دی چھڈ کے آیا ہے اوہ سپ اوس ماریا ہے۔ ویکھ لے۔ قطرے خون دے ویکھ لا ایس دی قمیض اُتے۔ اوہ پوکیندا کھلا ہا بھی زہر ایس نوں اثر نہ کرے۔ توں اٹھیندا لگا آیا ہیں میں چشم دید گواہ میتھوں پچھیا ای ٹونہ۔“ بادشاہ آکھیا، ”بیگم! میری اکھیں اکوں دُور ہو جا۔ جے اوہ مری گیا ہے تیری موت ہے۔“ قزلباش نوں بادشاہ بلایا ہے ”ہلا بھائی بیربل لینا ہے۔ زندہ لینا ہے تے ایسے وقت لینا ہے۔“ اوہناں آکھیا، ”تساں حکم نہ دتا مار گھتو۔ آنے وی اوہدے پیش کیتن۔ خون گردن دا وی۔“ بادشاہ آکھیا، ”کُجھ وی ہے۔ میں سٹھ بندہ موت سزا کریاں۔ تساں جیسے پتراں توں اوہ مردا ای نہ۔“ اوس ویلے بیربل آیا ہے۔ بادشاہ بڑے انعام کیتن بیربل نوں وی تے قزلباش نوں وی۔ ”شکر ہے مری ناہوں گیا نہیں تاں میں کیہ کراں ہا۔“

مُلاں دو پیازہ

مُلاں دو پیازہ نجد دا آدمی ہے۔ ایہداناں محمد عمر ہے۔ جیس ویلے شیرشاہ سُوری چکیا ہے نا ہمایون، پُتر بابر دے نوں تے طہماسپ بادشاہ کول ایران جا پناہ لئی ہے۔ مُلاں دو پیازہ دی ماں مرگئی۔ مترئی ماں ہاس اوہ بڑے ظلم کریندی ہا ایس نال۔ ایہہ ایس ماں توں بڑا تنگ ہا۔ پیو ایس دا ڈردا ہا مترئی ایہدی ماں توں۔ یمن دی ہک عورت نجد دے وچ پندی ودی ہے۔ کڑی بڑی ٹھکی ہوئی ہے۔ ایس نوں ماں نال ویر ہا بھی ہمشاں پیو کولوں مریندی ہے۔ جھڑکیندی ہے۔ ٹکر نہیں دیندی بھی ایس توں ویرتاں لئیں ہا۔ اوس یمن دی عورت نوں آکھیوں، ”پندی کیوں ودی ہیں؟ اوہراں رُڑ آ۔“ مترئی پکیاں دے گھر ہاس گئی ہوئی۔ اوس نوں لئی آیا۔ اوس نوں آکھیوں، ”ایہہ غُسل خانہ ہئی تے نھاویں نا۔“ مترئی دے کپڑے اندروں لئی آیا ”ایہہ پاویں نا۔“ گہنے وی چاں پائیوں۔ ”ایتھے ٹکر پکا اساڈے۔ آرام کرتوں۔“ اوہ پکا ون کڈھ ڈڑھی۔ ایہہ بھج و گیا مترئی نوں جا کے گل چاں لائیوں تے روون کڈھ ڈڑھا۔ ”میرا پُتر کیہ ہئی؟“ اکھے، ”قہر گھتیا ہے میرے پیو سوانی کائی پرنا لے آندی ہے۔ سارے گہنے تے زیور تیرے پوا چھوڑے پس۔“ اوہ چھٹا کو جیہی تے کوڑیل ڈاڈھی۔ اوہ بھج وگی۔ اوہ آن کے اوہدے ہتھیں پے گئی تے مارن کڈھ ڈڑھی۔ مُلاں آکھیا، ”توں کیوں بیٹھی ہیں؟ تیتھوں ہمتال ہے توں وی ماروس۔“ اوس آکھیا، ”مینوں ہے اُتوں نہ کوئی آ جاوے۔“ اوس آکھیا، ”ماں ہے سوئی کسے دی؟“ اوس پھدھ کے چاں ڈھاہی۔ چھٹا کونوں پنج پنج کے ایہہ دروازے دے اُتے بہہ رہیا۔ جیہڑا بھج کے آوے آکھے، ”او بھائی! اساڈی گھر دی گل ہے کسے دا

حق نہیں۔“ وڈھ وڈھ کے اوس چھوڑ دتی۔ اوتھوں ایہہ نس پیا تے اللہ تیری یاری۔ ایہہ ایران آنکلیا ہے۔

جیس ویلے ایران آیا ہے تاں ہمایون وچ مسجد ایران دی وچ بیٹھا ہے۔ ایہہ وی مسجد ال آیا ہے۔ ہمایون اوس نوں اپنے کول بُلا لیا۔ جیس ویلے طہماسپ بادشاہ ایہناں دی امداد کیتی تے دلی اُتے حملہ ہويا، مُلاں وُلی آ گیا۔ مُراکبر بادشاہ تخت تے بہہ گیا۔ چھ ماہ کر کے ہمایون تاں فوت ہو گیا۔ زمانہ اکبر دا آ گیا۔ ایہہ مُلاں نورتن وچ داخل ہے۔ ناواں رتن ایہہ ہے۔ اوس زمانے مغلاں آل ہک چٹنی بندی ہائی جیس نوں دو پیازہ سدیندے ہائن یعنی دو وصالاں آلی۔ جیویں اسیں آہنے ہاں مرچ چاں بنائیو وچ ہزار شے ہور ہوندی ہے۔ اوہنوں دو پیازہ سدیندے ہائن۔ مُلاں اوس چٹنی نوں بہوں پسند کریندا ہا۔ ہر دعوت وچ آہدا ہا دو پیازہ لیاؤ۔ جیس توں اکبر ایہدا ناں مُلاں دو پیازہ رکھ چھوڑیا۔ ناں ایہدا محمد عمر ہے۔

بیربل تے مُلاں دی ٹکر رہندی ہا کیوں کہ بیربل برہمن قوم ہويا ہے۔ اوہ چاہندا ہا ہندو عروج پکڑے۔ ایہہ چاہندا ہا شاہی مسلمان دی ہے ہندو کیوں عروج پکڑے۔ ایس وجہ توں ایہناں دی آپس وچ ٹکر رہندی ہا۔ بادشاہ اکبر جیہڑا ہے ایس نوں لے کے بیربل باغ وچ پھردا ودا ہے۔ بیربل مصور بڑا ہويا ہے۔ بیربل اگے وچ باغ دے دو تصویراں بنا گیا ہا۔ ہک مسلمان ہے اوہدا لہندے مونہہ ہے تے وٹ پکیندا کھلا ہے تے اودوں ٹکر کھاوندا پیا ہے۔ اوہنوں ساہمنے ہندو کھلاریا ہے۔ ہندو دے گل مالا ہے تے اوہ ہتھ جوڑ کے گزگا آل مونہہ کر کے تپیا کر رہیا ہے۔ اکبر اُتوں آیا ہے۔ اوہنوں آکھیا پيس، ”وکیھو جی! اپنا مذہب وی تے اساڈا مذہب وی۔ اوہ پرستش کر رہیا ہے تے جدے سجدہ کریندن اودائیں مونہہ کر کے وٹ پکا رہیا ہے تے اودوں ٹکر کھاوندا پیا ہے۔“ اُتوں مُلاں شپ کیتی۔ ”بادشاہ سلامت حیران ہوئے کھلے ہو۔“ اوس آکھیا، ”یار! ایہہ تماشا ویکھیا ہے۔“ ”نہیں، تساں سمجھیا نہیں۔ ایس تہانوں سمجھن نہیں دتا۔ ایہہ لُہی جیہی قوم ہے، جٹ ٹکر کھاوندا کھلا ہے۔ ایہہ ہتھ جوڑ کے ٹکر منگدا پیا ہے۔ اوہ پیا آہدا ہے ایہہ لے لا۔“ بادشاہ ہسدا ہسدا کدائیں گیا۔ اوس آکھیا، ”بالکل ٹھیک ہے۔“ انج ہو کے ایہناں دی ٹکر رہندی ہا۔

بادشاہ دے ایہہ نورتن ہن۔ گنگا دی سیر کرن گئیں۔ دریا گنگا دا پانی مٹھا ہے۔ صاف ہے، شفا یاب ہے۔ اتنیاں صنتاں دا مالک ہے اوہ پانی۔ ہندو دا مذہب ہے بھئی بہشت توں آیا ہے ایہہ دریا۔ جیس توں اوہ تپیا کریندن۔ گنگا دریا دے کنارے کنارے ایہہ رُدے آوندن۔ گنگا چنگی طاقت دے وچ کھلا ہے۔ پَن ہک بوٹی ہے جیہدے پھل گنگا دے اُتے تر رہن۔ اوتوں سورج چمک رہیا ہے۔ بادشاہ ایہہ تماشا ویکھدا آوندا ہے تاں جوں دو جٹ بھرا ہین۔ پارا وہناں ٹھلنا ہے۔ اوہناں بادشاہ دا سلام کیتا ہے۔ بادشاہ آکھیا ہے، ”ٹھل کے جاؤ ہو۔“ اکھے، ”جی۔“ اکھے، ”گنگا طاقت اچ کھلا ہے۔ ایتھوں دھرک مارو میں تہاڈے ٹھلن دا تماشا ویکھنا ہے۔“ دوواں بھراواں دھرک چاں ماریا ہے۔ آدھی پادھی گئیں تاں نکوے لکھریا ہے وڈے نوں ”مینوں کپر پھلکیندا ہے۔“ اوس آکھیا، ”ترکڑا ہو۔“ اوس آکھیا، ”میں بولیا اوس ویلے ہاں جدوں میں کمزور ہو گیا ہاں۔“ جتھے پیا ویندا ہا اوہ ہٹ آیا ہے تے بھرا نوں اوس کندھیاں تے سٹیا ہے تے ٹھلن لگ پیا ہے۔ بیربل تے بھرا کوئی نہ۔ بیربل دیاں ہنجوں ٹپیاں ہین۔ ”وکیھنا بادشاہ سلامت۔“

واہ گنگا کا پانی واہ پَن کے پات

واہ سورج کیاں لاٹاں، واہ بھائیوں کا ساتھ

بادشاہ دیاں وی ہنجوں ٹپیاں ہین۔ ”بہت خوب۔“ نکلاں سڑ گیا۔ دُشمن بھائیں چنگی وی کرے۔ اوس آکھیا، ”سبحان اللہ! جتھے اکبر بادشاہ تے بیربل رن اوتھے سچ نمنا کنڈ کر کے لکھ ویندا ہے۔“ بادشاہ آکھیا، ”اوہ کیوں؟“ اکھے، ”ایس بیربل نوں گوڑ مارن دی عادت ہے۔ بادشاہ دستخط چاں کرے تاں گوڑ نوں گوڑ کاہیں آکھنا ہے۔ ہر کہیں واہ واہ چاں کرنی ہوئی۔“ بادشاہ آکھیا، ”ایس گوڑ ماریا ہے؟“ اکھے، ”ہک نہیں چار مارن۔“ ”اوہ کیوں؟“ اکھے، ”ایہہ آہدا ہے، واہ گنگا کا پانی، چھہاں تے کھلیاں ہویاں ترینہ لگے تاں گنگا تلاش کریندیاں تائیں بندہ مرنہ جاوے۔ پانی اوہ جیہڑا بغل وچ ہے۔ واہ پَن کے پات۔ ایس نمک حرام توں کچھ ونواڑھ دے پتر دی تعریف کرنی ہاس۔ جمنے توں مرنے تائیں کفن وی اوسے دا بندہ ہے۔ نیچ کچیندا ہے۔ پالے توں بچیندا ہے۔ گرمی توں بچیندا ہے۔ عبادت دے کم آوندا ہے۔ پَن کیہ صرف ہل چھوڑیندا ہے۔ ونواڑھ دی تعریف

نیہوں کیتی۔ تریپے نمبر تے ایہہ آہدا ہے، واہ سورج کیاں لاٹاں۔ انھے نوں ٹھٹھ دا پتہ ہے اُبھریا ہے یاں لہہ گیا ہے۔ لاٹ اکھ دی ہے جیہڑی رات نوں وی کم کریندی ہے۔ چوتھے نمبر تے آہدا ہے، واہ بھائیوں کا ساتھ۔ شادی کریندن تاں وکھرے کیوں ہو جاندن تاں معلوم ہوندا ہے ماں پیو چھڈاون آلی عورت ہے۔ عورت جیڈا ساتھ کوئی نہیں۔ بھراواں بھائیاں سبھ نوں چھڈوا دیندا ہے۔ ایس آکھنا ہا:

واہ بغل کا جِل واہ کپاس کے پات
واہ نیناں کیاں لاٹاں واہ مہری کا ساتھ

ساک تاں عورت دا ہے۔“ بادشاہ امینوں انعام دتا ہے۔ بیربل نوں سُرُن آئے۔ رات نوں اکبر بادشاہ سُتا ہے۔ سُتیاں بادشاہ نوں خواب آیا ہے بھئی ہک تھالی ہے۔ اوس دے اُتے سر پوش ہے۔ وچ اوس دے رینڈی ہے۔ رینڈی سچے چکر تے بھیں رہی ہے۔ ہک پاسیوں بادشاہ ویہدا ہے تاں ڈلیاں لہندیاں جاندین۔ دُوئے پاسوں ویہدا ہے تاں ثابت۔ حیران ہے بھئی ایہہ کیہ؟ ہے پھر دی پئی۔ ایدوں ثابت ایدوں ڈلیاں۔ فجر بادشاہ وزیراں نوں بُلایا۔ ایس خواب دی تعبیر۔ بیربل آکھیا ہے، ”خواباں دیاں تعبیراں دیونیاں اہل قرآن دا کم ہے۔ قرآن روحانی کتاب ہے۔ اوہدے وچوں روحانی چیزاں لبھدین۔ ایہہ کسے عالم توں کچھوں۔“ ریڈھ ہاس بھئی مُلاں توں کچھن۔ بادشاہ مُلاں نوں بُلایا ہے۔ ”ایہہ خواب دی تعبیر دس۔“ اوس آکھیا، ”جی سال دا عرصہ دیو میں پتہ کر آونا ہاں۔“ سال دا عرصہ لے کے اوہ گھر آ گیا ہے۔ عورت اپنی نوں آکھیا پس، ”ایہہ ہر شے تے امر اللہ دا تے میں سفر تے جا رہیاں۔ سال دا عرصہ تے ایہہ خواب ہے۔“

مُلاں ٹُر پیا۔ چلدا ویندا ہے تاں بندے کسے نوں آکھیا پس، ”اُڑیہہ دا مینوں راہ دسو۔“ مگروں ہک بندہ بولیا ہے۔ ”میں اُڑیہہ دا وسنا ہاں۔ آ مُرل کے سنگ کریے۔ میں وی اودائیں پیا جاندا ہاں۔“ کچھیا ہے بھئی توں کون ہیں؟ اکھے، ”میں صیقی گریاں۔ اُڑیہہ دے راجے دیاں توپاں ڈھالنیاں تے صیقل کرنیاں۔“ ”توں؟“ اکھے، ”میں درویش ہاں۔“ ٹُر پئے۔ راہ دے وچ ہک جھونپڑا ہے۔ اوس جھونپڑے دے وچ ہک بڈھا

بیٹھا ہے۔ تھوڑی جیہی واڑی ہے جیہدا را کھا اوہ بیٹھا ہے۔ اوہدے کول آن کے پانی پیتا
 نیں۔ مُلاں پچھیا ہے ”بابا! دور ہیں کہ نیڑے؟“ اکھے، ”پچیا! نیڑے ہاں۔“ ”دوہہ تے
 ہیں کہ تہنہیں تے؟“ اکھے، ”تہنہیں تے۔“ ”واہی پچھتر دی ہانیا اگتر دی ہانیا؟“
 اکھے، ”پچھتر دی۔“ اکھے، ”اللہ چنگی کر یسی۔“ صیقی گر آ کھیا، ”بابا! تساں تاں گل کر لئی
 تے میں بدھو بن کے بیٹھا ہاں۔ کیہ ایس آ کھیا ہے؟“ اکھے، ”بندہ کوئی دانا معلوم ہوندا
 ہے۔ میتھوں پچھدا ہے نظر دور پوندی ہایاں نیڑے۔ لنگاں نوں سہارا ترپئے سوٹے دادینا
 ہیں یاں لنگاں نال ٹرسکنا ہیں۔ اولاد جوانی دی ہئی یاں پچھیرے آ کے ڈھپی ہئی۔“ اوس
 آ کھیا، ”بہت خوب۔“ صیقی گریقین کیتا کہ بندہ کوئی دانا ہے۔ ٹر پئے۔

اگانہہ آئن تاں ہک جٹ بی وگیندا ودا ہے۔ مُلاں آ کھیا ہے، ”السلام علیکم۔“
 ”علیکم۔“ ”بی کھا دھا ہویا ہئی کہ کھاونا ہئی؟“ صیقی گر آ کھیا، ”کھا دھا ہویا کیوں وگنا
 ہاں، کھا دھا ہویا کدی جمیا ہے۔“ جٹ آ کھیا، ”نہیں توہیں گل نہیں سمجھی۔ ایہدا مطلب
 ہے جے قرضے دا بی ہئی تاں اگے کھا چکا ہیں۔ جے گھر دا ہئی تاں کھاونا ہئی۔“ تاں صیقی
 گرسر ماریا۔ ”بہت اچھا۔“ ٹر پئے۔ جیس ویلے شہر اڑیہ دا آ گیا ہے۔ مُلاں پچھیا ہے،
 ”کوئی فرزند ہئی؟“ اکھے، ”نہیں مر گیا ہویا ہے۔ پتر ہے کوئی نہ۔ ہک لڑکی ہے نوجوان
 کواری۔“ مُلاں آ کھیا ہے، ”گھر جاویں تاں دستک کر کے وڑیں۔ اطلاع دے کے
 جاویں۔“ صیقی گر آ کھیا، ”توہیں میری دھی نوں بد چلن سمجھیا ہے تیری بھین نوں۔“ اوس
 کڈھ کے اٹ ماری۔ سڀ تے طالب علم ایہناں وس نال سٹ کدی نہیں جھلی۔ اُستاداں
 دیاں سٹاں چکا ون دی ایہناں دی ورزش ہوندی ہے۔ اوس اٹ ماری۔ ایہہ جھک گیا۔
 اٹ اگانہہ لگی گئی۔ ایہہ مل گیا۔

اوسے طیش وچ صیقی گر گھر لگا آیا۔ اوس لت ماری۔ یو ہانھل گیا تاں دھی گر لانی
 کبھڑا ہیں میں ننگی خا رہی ہاں۔ ایس یو ہا بند چاں کیتا بڑا شرمندہ ہویا۔ اوس کپڑے کیتے
 لگھ آیا۔ ”اباجی! اج مونہہ تہاڈا بھیرا ہے۔“

نہ لگے مت دلال دی مُس گئے انجان

اوس آ کھیا، ”پچیا! راہ دے وچ انج انج گلاں ہوئیں۔ میں اٹ ماری ہے شکر

ہے لگ نہیں گئی۔ راہ دے وچ اوس بڑیاں سونیاں گلاں کیتین تے ہُن میں شرمندہ ہويا
 بیٹھا ہاں۔ ایس آلی تاں حد مُکا دتی سوں۔“ اوس آکھیا، ”بابا! معلوم ہوندا ہے بندہ سیانا
 ہے۔ جا اوس توں مانی منگ تے نالے روٹی آکھ۔ میں پکینی آں۔ توں اوہنوں لے آ۔“
 اگانہہ آیا تاں ہک مسیت وچ صلواتاں منڈی کھلا۔ درویش جوں ہا۔ جھاکا اگے لتھے ہويا
 ہاس۔ ”کیہ مانی باوا کائی روٹی۔“

چار دیہاڑے دُنیا دے اوڑک ہر کوئی مردا
 بھل وین گلزار چمن جد ڈٹھا مُونہہ قبر دا
 بے پرواہ تے غالب حاکم جیس دا ہیں بردا
 توں سمجھ اِلہ دے مسئلے نوں پہلا سبق فقر دا
 نیکیاں طرف دھیان کریں بدکار کدی نہیں تر دا
 حرام حلال دا فرق کریں سخت حکم پرور دا
 نال مومن دے رنج آوی پیویں جام صبر دا

صیقلی گر آکے پیر چاں پنے۔ ”مانی دے مسلمان بھائی ہاں۔“ اوس آکھیا، ”یار!
 پردیسی توں کیہڑیاں مافیاں منگنیاں ہونیاں۔ بھلا ہووی ایہہ وی تیری نیکی ہے۔ نہیں تاں
 میں تیرا کیہ ونجا سکدا ہام۔ پر ہک ہُن کریں۔ مینوں ہُن نہ لے جا۔ روٹی ہُن دی دیوا
 گھلیاے۔ صبح مینوں لے جاویں۔“ نوکر دے ہتھیں صیقلی گر دی لڑکی روٹیاں بنا دتیاں۔
 چودھاں پھلکے اوس دتے۔ دُونگا گوشت دا بھر کے دتا تے ایہہ اوس نوں آکھنا، ”چنوں
 چودھویں تارے بے شمارے دریا کن کنارے۔ ایہہ آکھ بُجھارت مجھ۔“ نوکر خیال کیتا
 بھئی ہک بندہ ہے۔ چودھاں پھلکیاں دی اوس جڑھ کڈھنی ہے۔ انجیں جُٹھا ویسی۔ ہر شے
 ونجا ویسی۔ اوس ست پھلکے رکھ لئے۔ ادھا گوشت پلٹ لیا۔ لے آئی۔ اوہنوں دتا۔ اکھے
 ”گھر دی سائن آہدی ہے چنوں چودھویں تارے بے شمارے دریا کن کنارے۔“ مُلاں
 آکھیا، ”اوہنوں آکھیں چنوں ستویں تارا کوئی کوئی تے دریا ترپ ہے۔“ اوہ بھجدی آئی
 تے اوس آکھیا، ”اوہ پیا آہدا ہے چنوں ستویں تارا کوئی کوئی تے دریا ترپ ہے۔“ اوس
 پھدھ کے چاں ڈھاہی تے اوس پکھیا، ”توہیں لیا وچوں کتنا ہے؟“ اوس من دتا وچوں

ادھ لیا ہے۔ اوس آکھیا، ”اباجی! اساڈے ملک دا رواج ہے لڑکی ڈٹھا ور لے سکدی ہے۔“ اکھے ”میں ڈٹھا تاں کوئی نہیں۔ نہ پتہ ہے عمر کتنی ہے۔ نہ پتہ ہے کوڑھا ہے سوہنا ہے۔ کالا ہے گورا ہے۔ امیر ہے غریب ہے۔ اوس دے علم دی خوشبو آئی ہے۔ علم آلی لڑکی جاہل دے نال عمر نہیں ٹپا سکدی۔ میری شادی کرنی ہا تاں ایہدے نال کر۔ ایہدے نال نہ کریں تاں میری شادی دا مڑ ناں نہ لیں۔ میں تیریاں کدھاں نال لگ کے مرجاساں۔“ اوس ویلے آندا سوں۔ جیس ویلے ڈٹھا ہے عورت۔

مرگئی بن ماریوں جان جہان گواہ ہے

صیقلی گر آکھیا، ”ایہہ لڑکی ہے میری جے توں رضا دند ہو جاویں تاں میں تینوں نکاح کر دینا ہاں۔“ ایہہ نمانے اگے حوراں کان مردے دے ہوندن۔ اوہ ڈھڈھ ہو گیا۔ اوہناں دی شادی ہو گئی۔ اوس نوں کچھلی گل ساری وِسر گئی، جیہڑے ویلے عورت دی محفل وچ آیا۔

وِسر گئے مسکین نمانے بیٹھا عدل کماوے

یاد وی کائی شے نہ۔ خواب وی یاد کوئی نہ۔ دیہاڑیاں دے بعد آکھیا، ”میری عورت میرے نال گھل۔“ اوس آکھیا، ”لے جا۔“ ایہہ لے کے گھر آ وڑیا۔

جوں سوانی تکیا ایہہ چھوہر جیہی ولالے آندی ہیس۔ اوس پٹ ڈنڈا لیا تے شائبش بھئی جا جا ڈٹھا ہے۔ اوس دھر کڈھے دوویں۔ ایہہ وزیر ہا ہور مکان وی ہان اودے لگھ گیا۔ نوکر نوکریں وی ہان۔ اوہ نماانی سڑے بیٹھی۔ سوکا۔ ایہہ جناب پُبارے وچ پیٹھن۔ بزار نالوں پیا لگھدا ہے۔ تکیا ہے تاں اکبر بادشاہ ہے نال وزیر ہیس۔ اوس ویلے خواب یاد آیا۔ دیہاڑے گئے ہیس تاں سال چوں دیہاڑ کھو رہندا ہا۔ دیو بھرے حاضری ہیس۔ ایہہ روون کڈھ ڈڑھا ہے۔ عورت نوں آکھیوس، ”سواری دینا ہاں۔ پیسے دینا ہاں۔ نوکر نوکریں۔ توں پکیاں تے چلی جا۔ دیو بھرے میں مری جاونا ہے۔“ اوہ وی رووے۔ ”گل تاں دس کیہ ہے؟“

میں لاہی ہے لنگی مجھ بدھا وچھونا

میریاں تلیاں نوں مہندی چڑھ چوکی تے خاونا

ویلاں دین سہیلیاں اوہناں نمھا نمھا گاونا
میں سنب کھلوتی ہاں چونہ کہاراں ہے چاونا
میں پرنی جانی ہاؤں ڈھولیا مُڑاودوں کاہیں لیاونا

پھلاں دی سیج ہے آن سُتی ہاں باگے
سُتی نوں ڈھول پیا ملدا ہے خوابے
میں ماراں سد وراگ دے کول ہووے تاں جاگے
میری لگی پریت دے اج تروڑی جانداے دھاگے

سُتی پئی ہاں لے کے ڈھول کلاوے
دھم نہ دھیمیے ڈھول اُٹھی نہ جاوے
او ککڑا! دیویں نہ بانگاں تیری ستیا جاوے
میرا یار پردیسی ہے گھر خیریں آوے

باگ لوبنی آں وچ لوبنی آں گوندی
نینہ کدی نہ لیندی مینوں خبر وچھوڑے دی ہوندی
میں پپنیاں دے وٹاں دھاگے ہنجوں ہار پروندی
وکی تاں پپر بہانہ ڈکھ ڈھولے دے روندی

اوہ آکھے، ”گل دس مینوں۔ ہر مرض دا علاج ہے۔ ہر کم دی کوشش ہے۔“ اوس آکھیا،
”انج انج خواب آیا بادشاہ نوں۔ انج اوس بھارت گھتی ہے میتھے۔ میں سال دا عرصہ لیا۔
اگوں توں جھل گئیوں۔ ہر شے وسر گئی۔ اج سال دا ایہو دیہاڑا ہے۔ دیو بھرے میری
حاضری ہے۔“ ”خواب کیہ ہے؟“ اوس آکھیا، ”تھالی ہے، اُتے سرپوش ہے، وچ رینڈی
ہے۔ اوہنوں چکر ہین۔ ہک لاہے ڈلیاں لہندیاں ہین ہک لاهموں ثابت ہے۔“ اوس
آکھیا، ”افسوس! پہلے دیہاڑے دسیں ہاں میں سوال دے مگر ودا ہام۔ تینوں دساں ہام

چاں، پر تیرے نال شادی کائی ناہی کرنی۔ مینوں سمجھ آ گئی ہے توں ذہن ہیں۔ ذہن تو تا وی ہوندا ہے۔ دانا نہیوں۔ دانا اوہ ہوندا ہے جیہڑا جی گل وی پٹ کے مارے۔ ایہہ کوئی خواب ہے جیہدے مگر بھٹا ورتا ہیں۔ روند اہیں تے چھوچھ بنیندا ہیں۔“ اوس آکھیا، ”تھال زمین ہے۔ سرپوش اسمان ہے۔ ریڈی خلق خدا ہے۔ چکر اوس دا رتیں دا پھرنا ہے۔ جیہڑیاں ڈلیاں لہندیاں جاندین، کنیں مردے جاندن۔ ثابت ہوندی جاندی ہے، اوہ جمدے جاندن۔ نہ جیندیاں دا مویاں نوں پتہ ہے نہ مویاں دا جیندیاں نوں پتہ ہے۔“ اوہ اٹھیا اوس سرچم لیا۔ خوش ہو گیا۔

وزارت دا لباس پہن کے دربار بادشاہ دے وچ۔ بادشاہ بڑا ملیا بھنی ملاں تیرے کان تاں بڑا دل اوریا ہویا ہے تے بڑے دیہاڑے کدائیں لائے نی۔ بادشاہ نوں گل و سری ہوئی۔ بیربل آکھیا، ”خوش تاں انج ہے جیویں تہاڑے خواب دی تعبیر آندی سوں۔“ اوہ یاد دیواؤ ہا۔ بادشاہ آکھیا، ”جی بیان کرو۔“ اوس بیان کیتا۔ بادشاہ آکھیا، ”انتا انعام دیو۔“ بیربل آکھیا، ”نہ جی ادھوں دوگنا۔“ ”اوہ کیوں؟“ اکھے، ”ادھا ایس داہے۔ ادھا اوس دا ہے جیس ایس نوں دسیا ہے۔ دراصل حقدار تاں اوہ ہے۔“ ملاں آکھیا، ”میں آپ نکھیا ہے۔“ بیربل آکھیا، ”جدوں بادشاہ تیتھوں پکھیا ہے اودوں ہوویں نابالغ تاں من و بندے ہاں۔ بھیڑیا! کیوں اوس شخص دا احسان ونجیندا ہیں، جیس تینوں دسیا ہے۔ اوہدا ناں نہیوں لینا چاہندا۔“ بادشاہ تے ایہہ سارے جٹ ہو گئے۔ اخیر اوہنوں دسناپیا۔ بادشاہ انعام دتا۔ بیربل پچھے آکھیا، ”ایس عورت دے وچوں بچے جمن تاں ہند دا ملک سمحال سکدن۔ ایس ملاں چوں جیہڑے جمنے ہین ایہناں آدم نوں وڈھ وڈھ کے کھا چھڈنا ہے۔ ایہہ شاہی محل دے لائق دی عورت ہے۔“ بادشاہ آکھیا، ”گل تاں ٹھیک ہے پر ایہدا اثر مسلماناں وچ بہت ہے۔ ملک وچ غدر پے جاونہ ہے۔“ اوس آکھیا، ”میں ایسا وٹ دیساں غدر پوے ای نہیں۔ ایہہ عربی باشندہ ہے جنگجو قوم چوں ہے۔ ایہنوں فوج دا جرنیل چاں کر۔ قندھار یا کی ہویا کھلا ہے۔ ایہدا دھاوا چاں کرا۔ ہر شے کمزور چاں دیس۔ ایس ویندیاں مری جاونہ ہے تے عورت تیری۔“

بادشاہ بلایا بھئی اٹھارھاں ہزار سپاہی دا تینوں منصب دار کیتا گیا ہے۔ قندھار

تے دھاوا کر۔ جاندا ایہہ کجھ نہیں۔ ہر شے کمزور دتی پئس۔ ایہہ گھر آیا ہے۔ ”اللہ اللہ! میں قندھار تے دھاوا کیتی ویناں۔ اللہ نوں سوئے او۔“ ایہہ چڑھ پیا۔ بیربل بادشاہ نوں آکھیا ہے: ایہہ ہے اُڑیہ دی عورت۔ ایس اچانک سُننا ہیں گھر والا مری گیا ہے۔ ایس ہے گھر و ہندیاں رہنا۔ راجپوت بچہ بچہ گواہ پھڈیسن تینوں اوہناں دیونی کائی نہیں۔ ہُنے قابو کر۔ بادشاہ پیغام بھیجے شروع کر دتے۔ بادشاہ پیغام عشقیہ لکھے۔ اکوں اوہ قیامت دے حوالے لکھے۔ بادشاہ آکھیا، ”میں تیتھوں مسئلے نہیں سُننے۔ میں تینوں بے عزت کریاں۔ نہیں تاں توں میرا آکھیا من۔“ اوس آکھیا، ”میں کنجری نہیں ہاں۔ توں کھانا میرا منظور کرتے رات آ رہو۔“ بادشاہ کھانا منظور کیتا۔ اوس ست کھانے تیار کیتے۔ بادشاہ دے پیش کیتے۔ ستاں دی رنگت آپو آپ ہے۔ خوشبو آپو آپ ہے۔ جنس آپو آپ ہے۔ پہلے کولوں لگ کے ستویں تائیں ساء بکو ہے۔ بادشاہ وجہ پچھی۔ اوس آکھیا، ”جی! اگے وی عورتاں ہین تہاڈے گھر۔ ساڈی شکل دا فرق ہوئی۔ عقل دا فرق ہوئی۔ بولی دا فرق ہوئی۔ لباس دا فرق ہوئی مگر میں وی اوہا عورت ہاں۔ خدا ایہہ حُسن کدی نہ دیندا مینوں۔ اج ہک بیگانے مرد دا ہتھ مینوں جھلٹا پوندا ہے۔ جیہڑی عصمت میں بچائی رکھی ہے اج اوہ تباہ ہو رہی ہے۔“ عورت روون کڈھ ڈڑھی۔ بادشاہ نوں رحم آ گیا۔ بادشاہ آکھیا، ”توں میری دین دُنیا دی بھین تے واسطہ خدا دا ای۔ آہنی ہیں رات کٹیناں نہیں تاں لگا جاناں۔“ اوس آکھیا، ”بھرا بن کے ساری عمر بیٹھا رہو۔“ تیج وچھا دتی اوس مُلاں دی۔

نجر بادشاہ قاصد دوڑاؤن بھیجی شے اوہدے کول کائی نہیں۔ جے جنگ شروع ہوگئی تاں اوس مری جاونا ہے۔ بادشاہ لکھیا کہ میں جنگ دا ارادہ ملتوی کر دتا ہے۔ واپس ہٹ آؤ۔ مُلاں حیران ہے بھی بیربل کائی چال چلیا ہے۔ میں عہدے توں کیوں گرایا گیا ہاں۔ اپنے گھر آیا ہے تاں تکیا پئس اپنی تیج تے دو چھلے نیلم دے، بادشاہ دے ہتھ دے پئے نیں۔ کدائیں لاہے بادشاہ تاں یاد نہ رہے۔ اوہ چھلے پکڑ کے عورت آلوں ڈٹھوس۔ باہر نکلیا۔ آواڈھ گواڈھ توں پچھیا۔ اوہناں دسیا۔ بادشاہ رات رہیا ہے۔ ایس نوکریں نوکر، ہر شے چوا کے اگلی کول۔ اوہ بندے بندے نوں آکھے، ”ہُن جھل کے لُتر آیا کھلا ہئی۔ اساڈے نال ریاں۔ مونہہ نہیں ڈٹھا۔“ صیقلی گر نی بندے گھلن لگ پئی بھی گُوڑے دا

بیان تاں سُنیدا ہے چاں۔ ہک واری میرے بیان سُنے چاں۔ اوس آکھیا، ”میں تینوں
 وکھنا ای نہیں چاہندا۔ تیرا کلام سُننا ای نہیں چاہندا۔ توں میری ہے ای نہیں۔“ شے ہے
 اوہدے کول کائی نہیں۔ فاقیاں توں فاقے آون لگ پئے۔ رات نوں ارادہ کرے بھئی میں
 صبح نکل کے سوال کراں۔ میں بھکھ تے مرنی ہاں۔ صبح آکھے پیو دے گھر پتر جمیوئی کوئی
 نہ۔ ہونیوں توں۔ پیو تیرے سُننا ہے بھئی میری لڑکی پردہ چاک کیتا ہے۔ بیٹھے دی جند نکل
 وینی ہے۔ مرجا پیونوں ذلیل نہ کر۔

جد اپنی ول دھیان کرنا خاندان نوں داغ لواونا نہیں
 باہر کسے مجبوریوں پوے جاونا پردہ شرم دا مول اٹھاونا نہیں
 سمجھیا ہے اج میری موت ہے۔ رٹھ کے چڑھی ہے بھئی توڑا ہک واری پیکے وطن دی
 ہوا میں لے لئیں۔ پیکے وطن آل مونہہ ہے۔ ہنجوں دے نیر چلے ہوئے نیں۔ ”اے بابا!
 تینوں کون دے تیری لاڈلی دا اج کیہ حال ہے؟“

سسوں دے مونہہ دسن لگے یاد آوے سے ماواں
 راوی دے لڑ دسن لگے رہ گئیاں دور چھواواں
 ایہہ روندی بیٹھی ہے تاں جوں کہے واری اٹھ رڑیا ہے۔ ایس تکیا ہے اڑیسہ دا
 راجا ہے۔ بادشاہ دا سلام کر کے اوہ ایسے گلی چوں پیا لگھدا ہے۔ ایس آکھیا ہے، ”مہا راجا!
 تسلیمات عرض۔“ اوس اٹھ ڈکیا ہے۔ بڑے غصے نال اوہ بولیا ہے۔ اوس آکھیا، ”مینوں
 بدماش توہیں سمجھیا ہے۔ کیوں سلام کیتا ہئی؟ میں راجپوت ہاں۔“ ایہہ بھڑوے وی اودوں
 انج ہوئے۔ اوس آکھیا، ”مہا راجا! توں اڑیسہ دا راجا ہیں تاں میں فلاںے صیقی گردی لڑکی
 ہاں تے اتھے میری شادی ہوئی ہے۔“ راجپوت دیاں ہنجوں ٹپیاں۔ ”اونمانیاں دھیاں او!
 تہاڈا وطن جوں کوئی نہیں ہوندا۔ مینوں کیہ پتہ میری دھی اتھے پرئی ہوئی ہے۔“ اوس جیب
 وچ ہتھ ماریا جتنے پیسے ہاں ”بیٹی! ایہہ روٹی ہے تیری جے پیو آل گجھ آکھنا ہئی تاں دس۔“
 اوس آکھیا، پیو میرے نوں آکھیں:

اے راہیا راہ جانیا میرا لئیں سنیہڑا سُن
 اکاں نوں کھادھا مکڑاں، لکڑاں نوں کھادھا گھن

میرا ان پانی نہیں تھڑیا پر قسمت گئی ہے تھڑ

ساہے پئے موت دے کہ دن جاسن رُ

صیقلی گر اوتھوں بھج و گیا۔ لڑکی نوں آن ملیا ہے۔ اوس ساری کہانی چاں سُنائی۔ انج
ایس انعام لے دتا۔ انج ایس دی جان بچائی۔ انج ایس دی عزت بچائی۔ ہٹ تے آیتے
ایہہ کار۔ اوس آکھیا، ”بچیا! ایہہ اوہدا قصور نہیں۔ ایہہ تیرا ہے یاں بادشاہ دا۔ بادشاہ جوں
بھین سدی ہائی تاں کجھ تاں تیرا پتہ کرنا ہاس۔ توں اوہنوں دسیں ہا چاں ایہہ ایہہ واقعہ
ہے۔“ اوس آکھیا، ”میں تاں حیا توں نہیں دسیا۔“ صیقلی گر بادشاہ کول لگا گیا۔ اوس آکھیا،
”میری لڑکی نوں بھین سدیا ہئی؟“ اکھے ”ہا“۔ اکھے، ”اوہناں دا ایہہ ایہہ حشر ہے۔ توں
صفائی نہ دیویں تاں اوہناں دا گھر برباد ہے۔“

بادشاہ تے صیقلی گر، صیقلی گرنی دے مکان وچ آگئے۔ اگانہہ آئے تاں مُلاں
دو پیازہ دیاں کنیں کتاباں رہ گئیاں ہان، اوہ چنیدا ودا ہا۔ عورت دا کدھ آل مُونہہ ہے۔ اوہ
رورہی ہے۔ نہ اوس اوہنوں بلایا ہے۔ نہ ایس اوہنوں بلایا ہے۔ اُتوں بادشاہ وڑپیا ہے۔
بادشاہ نوں ویکھ کے اوہدے تن بدن نوں اک لگ گئی ہے بھئی گل ہُن حق تے پہنچ گئی
ہے۔ بادشاہ دا سلام کیتا بیس۔ بادشاہ آکھیا، ”مُلاں“۔ اکھے، ”جی“۔ ”ایہہ تیرا سوہرا
ہے۔“ اکھے، ”جی آ“۔ اکھے، ”ایہدے نال بازی شطرنج دی کھیڈیے۔ آہدن: ایہہ شطرنج
بڑی کھیڈ دا ہے۔“ صیقلی گر آکھیا، ”شطرنج تے تاں سال سال وی لگ جاندا ہویا تے
میں مزدور آدمی ہاں۔ تُساں چالا میرا ویکھنا ہے چوہڑ گھنوں۔“ چوہڑ پے گئی۔ بادشاہ آکھیا،
”مُلاں تے میں آں۔ توں دوہری وار لیندا رہیں۔“ صیقلی گر آکھیا، ”نہیں جی میری لڑکی
میتھوں سرسا کھیڈ دی ہے۔“ مُلاں بھی سڑ گیا۔ ایڈا کنجڑ ہے بادشاہ دے مقابلے تے ہُن
دھی بہاؤ ہے۔ پر چلو میری تاں ہے جوں نہ۔ اوہ پیو دھی ہو گئے۔ ایہہ وزیر تے بادشاہ۔
صیقلی گر انج ڈالیاں نپ کے جھولیاں۔ اوس آکھیا، ”ہلا بھئی۔“

لئی توں رتجھ سوجھ کس اوگن چھوڑی

نکلیوں رنگ محل چوں وت دید نہ موڑی

دُھل وے پاسیا دُھل

عورت ڈالیاں اٹھائیاں۔ اوس آکھیا:

چرخہ پونی کتدیاں میری کدی نہ تڑٹی ہے تند
کیہ جاناں کیہ لکھیا کنت چاں کیتی موم کنڈ
ڈھل وے پاسیا ڈھل

اوس ویلے ملاں سمجھیا ایہہ چوڑ نہیں۔ ملاں ڈالیاں پیاں۔

جھتے شیر پانی پی گیا بکری تے مرند
لیھے اوس نوں پانی کیوں کردی ہے سنگ

اوس ویلے بادشاہ ڈالیاں پیاں۔ بادشاہ آکھیا:

بھائی کالے کالے کیورے کالے جیس کے نین

تم اپنا دھرم بچھا دو ہم بھائی وہ بھین

اوس ویلے ملاں بادشاہ دے پیر نین لگا۔ بادشاہ آکھیا، ”جے مانی منگنی ہاتاں اوسے

عورت توں منگ جیس میں جیسے توں بھین سدایا ہے۔“ اوہ رس گئے۔

تان سین

اکبر جلال دین بادشاہ دے دربار دا گویا ہا تان سین۔ اوہدی بڑی مشہوری ہا کہ ایہدے مقابلے دا گویا کوئی نہیں۔ اللہ دا امر ایسا بنیا کہ اٹھ گویے ہور آ گئے رل کے، اساں اج نا تان سین دا مقابلہ کرنا ہے۔ ایہناں اٹھاں آ کے بادشاہ اگے درخواست کیتی۔ اسیں ہاں اٹھ گویے پھلانے پھلانے سنھ دے رہن آ لے۔ جیہڑا تہاڈا گویا ہے تان سین، اساڈا تھوڑا جیہا دل ہے ایہدے نال اڑن کان۔ بادشاہ اگے چاہندے ہاں رونقاں بھئی دربار اساڈے سچے رہن۔ اکبر جلال دین آ کھیا، ”ٹھیک ہے آ جاؤ۔“ اوہناں آ کھیا، ”جناب! اساڈی ہک ہور وی التجا ہے۔“ اوس آ کھیا، ”دسو۔“ اوہناں آ کھیا، ”جیہڑے ہین نا پہلے ٹائم اساں اٹھاں پہلے بولنا ہے۔ اساتھوں ناواں نمبر ہوونا ہے تان سین دا۔ نالے جیہڑا راگ اساں بولنا ہے اوہ تان سین نہیں بولنا۔“ اکبر جلال دین ایہہ گل وی اوہناں دی من لئی۔ ”ٹھیک ہے تئیں پہلے بول جاؤ۔ بعد وچ میرا گویا تان سین بول جاسی۔“ جیہڑے ہین، نا ایہہ راگ، ایہہ بنے ہین ٹائماں چوں۔ اٹھ پہر ہین۔ صبح ہوئی صبح دا راگ ہو رہے۔ پہر دینہہ دے بعد دوا۔ پھیر ترینیا۔ پھیر چوتھا۔ اٹھاں پہراں دے اٹھ راگ ہین۔ اوہناں صلاح کیتی بھئی اسیں جیہڑے ہاں نا اٹھ گویے اساں ٹائماں دے اٹھے راگ بول چھڈنے۔

جدوں اوہ گویے آئے نا اوہناں نوں ٹائم پہلے ملے۔ پہلا بولیا۔ مُڑ دوا، مُڑ ترینیا۔ مُڑ چوتھا۔ جییں ایلے اوہ اٹھ دے اٹھ بول گئے ہُن راگ تاں رہیا کوئی نہ۔ تان سین نوں حکم ملیا توں سُناتیرا ٹائم ہے۔ اوس سوچیا: اٹھاں پہراں دے راگ تاں ایہناں

بول چھوڑے ہیں۔ ہُن میں کیہ بولاں؟ تان سین موقعیا تے اٹھاں راگاں چوں نچوڑ نپ کے، کوئی نکتہ ایدوں نپ، کوئی نکتہ ایدوں نپ، اوس تیار کیتیاں سُمریاں۔ اوہ جناب سُمریاں بولیاں۔ تان سین ودھ گیا۔ اوہناں اوس نوں خطاب دتا کہ توں غوث تان سین ہیں۔ توں تاناں دا غوث ہیں۔ اوہناں اٹھاں آکھیا، ”جناب اساڈی ہک عرض ہے۔“ اوس آکھیا، ”دسو۔“ اوہناں آکھیا، ”جیہڑا راگ ہے نا دیپک اوہ سُنا دیوے۔“ دیپک ہے جیہیں تے اک عاشق ہے۔ تان سین سوچیا ہُن میری موت ہے۔ اکبر جلال دین دا حکم ہو گیا ہے۔ ہُن نہ بولاں تاں اکبر وی مینوں سزا دیونی ہے۔ اوہناں جیہڑا کرنا ہا میرا کر چھڈیا نیں۔ تان سین آکھیا، ”چو بچا ہوا نیو پانی دا۔“ چو بچا بن گیا۔ وچ سپرنگ آلی گُرسی رکھی گئی۔ تان سین گُرسی دے اُتے بہہ گیا۔ چونچے دے اُتے چوگردوں دیوے رکھ چھڈے مٹی دے۔ سرہیوں دا تیل پا کے وچ روں دیاں وٹیں گھت کے اک لاچھوڑی۔ تان سین گُرسی اُتے بہہ گیا۔ تان سین راگ شروع کیتا دیپک دا۔ جدوں گر مارے نا تاں بتیاں اگوں اڈ کے تان سین نوں چمبڑ جاوے۔ جدوں بتیاں چمبڑن اوہ مارے جھونسا سپرنگاں آلی گُرسی تے، پانی وچ لہہ جاوے۔ اوہ پھیر گُر مارے پھیر بتیاں چمبڑ جاوے۔ اوس راگ پورا کیتا، پر جیہڑا ماس ہائی نا بدن دا، اوہ اوہناں ساڑ چھڈیا۔ سجا سجد اوی رہیا۔ اودوں سڑدا وی رہیا۔ ماس سارا گل گیا۔ اوہ گویے سارے غوث تان سین دا القاب دے کے وگ گئے۔

غوث تان سین دا اکبر جلال دین علاج کرویندا رہیا۔ تان سین نہ بچیا۔ اوہدے بدن اچ کیڑے پے گئے۔ جداں کیڑے پے گئے نا تاں وزیراں آکھیا، ”جیہڑا ہے نا غوث تان سین ایہنوں دلی چوں کڈھ۔“ بے دلی رہیا تاں بیماری پھیل جاسی۔“ تان سین نوں اکبر جلا وطن کر چھڈیا۔ ٹُردا ٹُردا منزلاں بہ منزلاں طے کردا وتیا۔ پھر دا وتیا جنگلاں وچ۔ ایدے بھوں، ایدے بھوں، چھیاں مہینیاں دے بعد چلدا چلدا تان سین، ایہہ جیہڑا چنیوٹ لہور روڈ تے اڈھ ہے بُرجیاں، ایہدے کولوں سڑک جاندی پئی ہے بنگلے بیراں آلے نوں۔ ایہدے نال لوک ہے مٹھے دھاڑیوال دا، ہُن وی کھلوتا ہے۔ ایس سنھ وچ جنگل ساندل بار ہو یا ہے، اتھے تان سین آ گیا۔ جنگل دے وچ چوراہیا ہے، اوہدے وچ آ کے تان سین بے سُر اہو کے ڈھے گیا ہے۔ پیا۔

کچھ ٹائم ہو یا ہے تاں ایدوں چار لڑکیاں اوہ پانی بھر کے آ رہئیں۔ اوہناں دی ایہدے کول آ کے میل ملاقات ہو گئی۔ جیہڑی ہائی نا لڑکی ہکلی امی پئی اوس دُوئی نوں آ کھیا، ”بڑیاں بے وقوف ہائے بھئی تساں اتنی ڈھل لائی ہے پانی تے۔ تسیں کیہ کردیاں رہیاں او؟“ اوہناں آ کھیا، ”ہور کجھ وی نہیں کیتا، اسیں گئیاں ہاں پہلے کھوہ تے پانی بھرن کان۔ جیہڑا کھوہ ہائی نا اوہ ہائی بے ٹائما بولیندا پیا۔“ جیہڑے ایہہ راگ الاپے گئیں نا ایہہ کھوہ ہاں دے جھنگاٹاں توں الاپے گئیں۔ ”مڑ آئیاں دُوئے کھوہ تے۔ اوہ وی بے ٹائما، بے گرا، اوتھوں وی پانی نہیں بھریا۔ چار کھوہ بھگتاؤن، پر پانی نہیں بھریا کیوں کہ کھوہ بے ٹائے تے بے گرا پئے بولیندے ہاں۔ جدوں اسیں آئیاں ہاں نا پنجویں کھوہ تے، اوہ پورے ٹائم تے راگ الاپ رہیا ہائی۔ پوری آواز لے رہیا ہائی۔ اوتھوں پانی بھریا تے تہاڑے کول امیاں پئیاں۔“ ایہہ گل غوث تان سین سنے پیا اوہناں دی۔ اوتھائیں جوں کھلوتیاں ہائیں۔

اوس لڑکی آ کھیا، ”تساں تاں مڑ پانی بھریا نا ٹائم سنجان کے، جیہڑا ایہہ بندہ ہے، ایہہ دپک دا سڑیا ہو یا ہے۔“ اوس ایلے غوث تان سین سوچیا: جیہڑا حکیم بغیر دے دے مرض دس چھڈ دا ہے، اوہدے کول علاج وی ہوندا ہے۔ اُٹھیا غوث تان سین تے اوس لڑکی دے پیراں تے ڈھے پیا۔ اوس آ کھیا، ”جیویں جانتی ہے نا واسطہ خدا دا ہئی میرا علاج کر۔“ اوس پچھیا: دس توں ہیں کون؟ تیرا گھر کتھے ہے؟ توں کیویں وناہیں؟ کیہ بنیا ہئی؟ اوس آ کھیا، ”میں اکبر جلال دین دا گویا۔ میرا ناں ہائی تان سین۔ مڑ گویاں آ کے کیتا مقابلہ۔ میں اوتھوں ودھیا۔ اوہناں میرا ناں رکھ چھڈیا غوث تان سین۔ جیس ایلے ایہہ لقب دے رہے۔ اوہناں آ کھیا: اسانوں راگ دپک سنا۔ جداں میں دپک سنا یا۔ دپک مینوں ساڑ چھڈیا۔ مڑ علاج میرا شہنشاہ کریندا رہیا ہے۔ مینوں شفا نہیں ملی۔ میں نہیں گھلا۔ نہیں بچیا۔ اخیر تے آ کے اکبر جلال دین میتھوں نفرت کر گیا۔ اوس مینوں جلا وطن کر چھوڑیا بھئی جا چلا جا میرے مُلک اچ بیماری پھیلدی ہے۔ میں سفر بہ سفر منزلاں بہ منزلاں طے کردا رُدا پھر دا اتھ آ گیا۔ اتھ تھیں رل گئیاں ہو۔ میرے مقدر گھلے کھلے ہاں۔ تساں ایہہ گل کیتی ہے واقعی میں دپک دا ای سڑیا ہو یا ہام۔ ایہدا علاج کر۔“

اوس لڑکی آکھیا، ”اوہ ساہواں میرا بنگلا ہے۔ اسیں اوتھے جا رہیاں ہاں۔ توں
ایتھوں بار چوں سکے گوہیاں دا مگرا لے کے بنگلے اچ آ جا۔“ بار دے سکے گوہے ہوندن
بری آنگ۔ ڈھورائے گوہا کیتا تے اوہ اوتھائیں سک گیا۔ لڑکی آکھیا، ”ہک وعدہ کرتاں
تیرا علاج کرنا ہے۔“ تان سین آکھیا، ”دس۔“ اوس آکھیا، ”میں تیرا علاج کرنا ہے تے
توہیں گھل جاونا ہے۔ توہیں دلی نہیں جاونا۔ اکبر کول واپس نہیں جاونا۔ جے سر پر وگ وی
جاویں تے اکبر دے دربار نہ بھلیں۔ مڑ میرا ناں ٹونہہ لینا اکبر کول۔ پھلانے سنھ تے میرا
علاج ہو یا ہے۔“ تان سین آکھیا، ”تیرا میرا وعدہ ہو گیا۔“ اوس آکھیا، ”اوتھے بہہ جا۔“
بہہ گیا۔ اوس اگوں منجی تانی۔ پردہ بنایا۔ اوس آکھیا، ”گوہے کول رکھ لے۔ میں راگ
شروع کرنا ہے ملھار دا۔ جداں میں گر مارنا ہے تاں بارش کڈھ جٹنا ہے۔ جداں بارش پوی
نا بدن تے جُٹھ دھپ جاوی، ایہناں گوہیاں نال اُتوں کھریڈ پٹنے نی۔ خون وگدا رہے۔
توہیں کھریڈ سارے لہنے ہن۔ میں ایدوں راگ شروع کرنا ہے۔ راگ مکھیاں تانیں
آپنے جُٹے توں ایہہ کھریڈ پٹ چھڈنے نی۔“

غلام فاطمہ ہا مٹھے دھاڑیوال دی دھی۔ اوس بہہ کے راگ الاپے۔ دُونیاں ساز
شروع کیجے۔ غلام فاطمہ ملھار شروع کر دتی۔ جدوں ملھار دا گر مُکا نا تاں کھریوں بنی بدلی
تے بارش کڈھ جٹی۔ جیویں بارش پئی تان سین تے اوہ گوہیاں نال کڈھ بھاتا تے آن رگڑیا۔
اوہ تاں اوس کھریڈے لاہے تے خون آ چھٹا۔ بندہ نھاو وی لگے نا تاں سارے جُٹے تے
بندے دا ہتھ نہیں پہنچدا۔ غلام فاطمہ سوچیا: جتھے ایہدا ہتھ نہیں پیا پہنچدا، میں ایہدا علاج پئی
کردی ہاں، ایہہ وی کرنا فرض ہے۔ ثواب ہے۔ اوس مڑ شرم نہیں کیتا کہ ایہہ بے پردہ ہے۔
غلام فاطمہ گوہے نپ لئے۔ دُونیاں ساز وگیندیاں رہیاں۔ غلام فاطمہ ملھار وی گمدی رہی
تے اوہدی کند توں کھریڈ وی لہیندی رہی۔ جداں خون رُکیا تے ککا پانی آ گیا۔ اوس ایلے
اوس ملھار بند کر دتی تے نوکریں نوں آکھیا، ”ایہنوں بند کر لیبو کپڑیاں اچ۔ ایہنوں پُجھ
کے اندر کر لیبو۔“ اندر ہو گیا۔ غلام فاطمہ علاج دوا شروع کر دتا۔ چھ مہینیاں بعد غوث تان
سین گھل گیا۔ نشان اڈ گئے۔ برُوڑیاں دے پُٹ وی نہ رہے۔

چھ مہینے مڑ رہیا۔ جداں غلام فاطمہ کول پورا سال رہ گیا غوث تان سین تاں

اوبھنوں اکبر دے دربار یاد آون۔ غلام فاطمہ آکھیا، ”غوث تان سین! توں بولیا تاں تونہ، پر میں تیرے مونہہ توں پڑھ لیا ہویا ہے۔ تینوں ہُن دلی یاد امدی ہے۔“ اوس آکھیا، ”جی گل تاں ایویں ہے۔“ غلام فاطمہ آکھیا، ”ہُن میں تینوں زیادہ وی قابو کراں تاں توہیں میرے کول رہنا وی کوئی نہیں۔“ اوس آکھیا، ”میں جاندا نہیں تیرے حکم توں بغیر۔ توہیں آکھنا ہے تے میں جاونا ہے۔“ اوس آکھیا، ”وگ جا پرہک گل ہئی۔ میرا ناں تونہ لینا اکبر کول کہ میرا پھلانی عورت علاج کیتا ہے۔ اکبر تینوں مجبور وی کرنا ہئی۔ دسنا تونہ۔ جدوں سمجھیں دسے توں بغیر قتل کردا ہے اودوں میرا ناں دس چھوڑیں۔“

غوث تان سین دلی چلا گیا۔ جداں دلی گیا تاں اکبر جلال دین اُٹھیا۔ اوہ تھپا گھت کے ملیا۔ اوس آکھیا، ”آ غوث تان سین! کتھے رہیا ہیں؟“ اوس آکھیا، ”جی ایویں نکل گیا ہام۔“ اوس آکھیا، ”علاج کیہندے کولوں کروایا ہئی؟“ اوس آکھیا، ”اللہ علاج کر چھوڑیا ہے۔ آپ کنیں نسخے نشانے لا کے علاج ہو گیا ہے۔“ اکبر آکھیا، ”میں رُوئے زمین دا ڈاکٹر کوئی نہیں چھڈیا جیس تیرا علاج نہیں کیتا۔ توں نہیں گھلا۔ اوہ کیہڑے حکیم تیرا علاج کیتا ہے۔ جتھوں گھل گیا ہیں۔“ اوس آکھیا، ”جی ایویں رب توں سدھ ہو گیا ہے۔“ اکبر آکھیا، ”گل سچی دس۔“ اوس آکھیا، ”سچی گل ایویں ہے جیویں کریندا پیا ہاں۔“ اکبر جلال دین آکھیا تان سین نوں، ”یاں حکیم دس یاں میں تیرا سر قلم کرنا ہے۔“ اوس آکھیا، ”تحصیل چنیوٹ ہے۔ تھانہ وی چنیوٹ ہے۔ ضلع جھنگ ہے۔ اوتھے مٹھے دھاڑیوال دا لوک ہے۔ اوبدی دھی ہے غلام فاطمہ اوس ملھار گاویا ہے تے میرا علاج کر چھوڑیا ہے۔“ اکبر جلال دین گل سُن کے چپ کر گیا۔

اوس سوچیا: ایہہ رشتہ لینا چاہیدائے۔ اکبر جلال دین لاگی ٹورے بھئی رشتہ طلب کرو مٹھے دھاڑیوال کولوں۔ لاگی جیس ایلے آئَن نا مٹھے دھاڑیوال کول تاں اوس جواب دے چھوڑیا۔ ”میں نہیں اکبر نوں جاندا۔ میں نہیں رشتہ دیونا۔“ لاگی واپس چلے گئے۔ جداں لاگی واپس دلی گئے تاں اوہناں دسیا: اوہ ساک نیہوں دیندا۔ اکبر جلال دین کاوڑ ایچ آ گیا۔ اوس تیاری کیستی فوجاں دی میں جبری جا کے رشتہ لینا ہے۔ جدن اکبر دی فوج آئی تاں اکبر وی نال آیا۔ اوس مٹھے دھاڑیوال دے لوک دی لاہم تے قیام کیتا۔ مٹھے

دھاڑیوال آل بندہ گھلیا ”مینوں شام تک ڈولا دے دھی دا۔“ مٹھے دھاڑیوال آکھیا، ”ہُن مرگیوم۔ انھا سڈھا ہے۔ ایس پیہہ چھڈنا ہے۔“ اوس اپنے جدی میراٹی نوں سدیا۔ میاں احمد اوہدا ناں ہو یا ہے۔ اوس آکھیا، ”دادا احمد۔“ اوس آکھیا، ”دس مٹھیا!“ اوس آکھیا، ”لاگی آئے ہان اکبر دے۔ ایہہ چھوہر غلام فاطمہ دا ساک منگدے ہان۔ میں جناب دے چھوڑیا۔ ہُن اکبر فوج لے کے آ گیا ہے۔ ہُن ایہہ کائی پٹی بنھ۔ انج بے عزتی نال رشتہ دپے تاں پلے کچھ نہیں رہندا۔“ اوس آکھیا، ”بہو۔ میں کر لیناں۔“ میاں احمد چلدا چلدا اکبر جلال دین دے تمبو اچ پہنچ گیا ہے۔ سلام دتا۔ بہہ گیا۔ اکبر کچھیا: کون ہیں؟ اوس آکھیا، ”جناب! مٹھے دھاڑیوال دا جدی میراٹی ہاں۔“ ”کیویں آیا ہیں؟“ اوس آکھیا، ”آیا تاں ایس واسطے ہاں جی، جیہڑا تساں پہلا کم کیتا ہانا لاگیاں آلا، اوہ کم تساں ناہی کرنا۔ مٹھے دا دل ہا اکبر خود چل کے آ کے ساک منگے میتھوں۔ ہُن توہیں چنگا کیتا ہے آ گیا ہیں۔ ہُن دینہہ دیوار بنا لے۔ اوس تارخ تے جج لے آ۔ اوہ تاں چاہندا ہے تینوں ساک دیونا۔ لاگیاں نوں اوس ساک ناہی آ دریا۔“ اکبر جلال دین دینہہ دیوار بنا کے چلا گیا۔ مڑا اوس تارخ تے غلام فاطمہ پرنا کے لے گیا۔

رادھا بھٹیانی

اکبر جلال دین بادشاہ کچہری لا کے بیٹھا ہے۔ سچے پاسے محمد خان پٹھان ہے
 کھجے پاسے احمد خان بھٹی بیٹھا ہے۔ برنے دا درخت ہا اوہدے پتے ڈھمن لگ پئے۔
 کنیں نجومی نجوم والے کنیں مُلا تے کنیں میانے
 پر خدا دیاں باتاں خدا ہی جانے

اوس آکھیا، ”نجومی“۔ ”جی“۔ ”ایہہ پتر پے ڈھندن۔ ایہدے پٹھ میں چھاں لئی
 ہے۔ کوئی طریقہ ہے کہ درخت سبز ہو جائے؟“ اوس ایلے نجومی بول کے آکھیا، ”بادشاہ
 سلامت! بی بی ہووے پنج وقت دی نماز۔ تہج خوان۔ قرآن دی منزل۔ جتی سستی تے سخی۔
 اوہ ساری رات ایہندے پٹھ بندگی کرے۔ پڑھ کے کلمہ نبی دا بھرے پانی دی کرولی۔
 مارے چھٹا درخت ہرا ہو جائے۔“ بادشاہ بول کے آکھیا، ”بھری کچہری دے وچ کوئی ہے
 ایسا بندہ جیہندی بی بی وچ ایہہ پنج صفتن۔ اُنگل کھڑی کر دیوے۔“ اک واری وی بادشاہ
 آکھیا۔ دوجی واری وی۔ جیس ایلے تزکیجی واری آکھیا بادشاہ احمد خان بھٹی اُنگل کھڑی کر
 چھڈی۔ احمد خان نال بادشاہ دا اگے وی بڑا پیار ہا۔ اوس آکھیا، ”احمد خان! تیری بی بی وچ
 ایہہ پنج صفتاں ہین۔“ اوس آکھیا، ”جی میں تاں ای اُنگل کھڑی کیتی ہے۔ جے اوہدے وچ
 ہاسن۔“ اوس ویلے بادشاہ بڑا راجی ہو یا۔

محمد خان پٹھان سچے پاسے بیٹھا۔ اوس بادشاہ دے کن اچ گل کیتی۔ بادشاہ
 سلامت! ایہہ احمد خان گوڑ پیا مار دا ہے۔ اوہ جی دو ترائے سال ہو گئین میرا دوست سی۔
 پتہ ایہنوں کوئی نہیں۔ اوس ایلے بادشاہ دا رنگ ہو رہا گیا۔ احمد خان بھٹی کچھیا: اکبر جلال

دین بادشاہ تیرے چہرے دا رنگ اگلا نہیں رہیا۔ اوس آکھیا، ”احمد خان! گل میری سُن لے۔ راجی میں بڑا ہویا ہاں، پر ایہہ محمد خان تاں مینوں سروں لے گیا ہے۔“ ”کیوں؟“ اوس آکھیا، ”میری زبان طاقت نہیں پئی دیندی۔ ایہہ محمد خان پٹھان آپ گل کرے۔“ محمد خان پٹھان بول کے آکھیا، ”گل ایہہ وے ترائے چار سال ہو گئیں اوہ میرا دوست ہے۔ توں کتھوں اُن گل کھڑی کرو ہیں؟“ بھٹی ڈولیا گجھ نہیں۔ قطرہ ہک نہیں ڈولیا۔ اوس آکھیا، ”ہوسی گل منن آلی تاں نہیں، پر میرے گھر دی کوئی نشانی لے آویں مڑ بھٹی مناں۔ اٹھاں دناں دا وعدہ۔ جے محمد خان پٹھان میرے گھر دی نشانی لے آ دیوے میرے بازو قلم کر کے ایس دلی دے دروازے تے ٹنگے جان تے جے نہ لیا دیوے ایہندے بازو قلم کر کے دلی دے دروازے تے ٹنگے جان۔“ اٹھاں دناں دا وعدہ ہو گیا۔

محمد خان پٹھان ہک مکاراں ڈھوڈھی۔ سُن آہدن نا مکاراں اسمان نوں پاڑ کے ٹاکی لا آئی۔ سُن اسمان نوں تاں ٹاکی نہیں لگدی۔ ایہہ اکھان ایڈا ہے۔ مکاراں ڈھوڈھی پنج سو روپیہ دینا کیتا۔ آکھیا محمد خان نوں، ”تمبوقتاں کول ہون۔ بھٹیر دے وچ میں جا کے اوتھے سارا بھیت لے آواں گی، پر تیرے تمبوقول ہون۔“ حاجن بنی۔ ہتھ وچ سوٹی۔ گل وچ تسبیاں۔ سرتے ٹوپی۔ شلوار چھوٹی تے نیت کھوٹی۔ اگے جناب چار بندے تنکیاں تلواراں دا پہرا ہے احمد خان بھٹی دے بُو ہے دے اُتے پیٹھن جوں اوس آکھیا، ”میں کے دی حاجن ہاں۔ ستویں حج تے جاندی پئی ہاں۔ میں سُنیا ہے میںیں احمد خان بھٹی دی بیوی پنج وقت دی نماز۔ تہجت خوان۔ قرآن دی منزل۔ جتی ستی تے سخی۔ میں اوہندی زیارت وی کرنی ہے تے میرے رستے دا خرچ مک گیا ہے تے گجھ فی سبیل اللہ میں منگنا وی ہے۔“ اوہناں آکھیا، ”مائی گل سُن! اسیں چار بندے پہرے دار ہاں۔ نر چڑے نوں آڈر نہیں اندر جان دا۔ ساڈی جرات نہیں ایہہ گل آکھن دی۔“ تھوڑی دیر توں بعد نوکر کوئی سبزی گوشت لین نکلی۔ اوس ایلے اوہنوں آکھیں نوکر نوں آکھ۔ اوس نوکر نوں سدیا۔ اوس آکھیا، ”اپنی بیوی نوں آکھ، میں ستویں حج تے پئی جانی ہاں۔ میں سُنیا ہے پنج وقت دی نماز۔ تہجت خوان۔ قرآن دی منزل۔ جتی ستی تے سخی۔ میں زیارت وی کرنی ہے تے گجھ فی سبیل اللہ منگنا وی ہے۔“ اندر گئی گولی۔ اوس اندر جا کے رادھا بھٹیانی نوں آکھیا، ”انج

انج دی بی بی حاجن ہے۔ آہدی ہے میں زیارت کرنی ہے۔ گجھ سبیل اللہ منگنا بھی ہے۔
 ترے چار دیہاڑے میں گھر رہنا ہے۔ آکھوتاں میں لے آواں۔“ بیوی ہائے عقل نہ
 رہیانا۔ بھاویں بی بی ہائی کیہ لوڑ ہائی۔ اوس آکھیا، ”چلو بی بی ہے۔ آجان دے۔“
 مکاراں اندر وڑ گئی۔ سرمونہہ چمیا۔ توں میری بھینٹی۔ میں تیری ماسی۔ میں تیری
 زیارت نوں آئی ہاں۔ گل کرن دی تاں ایہناں نوں بڑی جاچ ہوئی۔ اوس ایلے جناب
 اوس آکھیا، ”میں ترے دیہاڑے تیرے گھر رہنا ہے۔ ستویں جج تے میں پئی جانی ہاں
 تے گجھ فی سبیل اللہ منگنا وی ہے۔“ رات گزاری۔ صبح دا ٹائم۔ جاگ کے بی بی نے اپنے
 احمد خان بھٹی دی بیٹھک دا جنڈرا لاہیا۔ اگے جناب بیج وچھٹی پئی ہے۔ سونے دا مُندرنا ایڈا
 بیج اُتے پیا ہے۔ جا کے اوس مکاراں نے اوہ مُندرنا چایا۔ اوس آکھیا، ”ایہہ مُندرنا کیہندا
 ہے؟“ بیوی بول کے آکھیا، ”میرے احمد خان بھٹی دا ہے جد آوے اوہ پاوے۔ جدوں
 اوس آونا ہے پاونا ہے۔ بکے بیج دے اُتے پیا رہنا ہے۔“ اوس آکھیا، ”جے ڈھک پمدی
 ہئی تاں فی سبیل اللہ توں تخی وی ہیں تے بیج وقت دی نماز۔ تبت خوان وی ہیں۔ ایہہ
 مُندرنا مینوں دے۔“ اوس ایلے بی بی دل انج خیال کیتا مُندرنا نہ دیواں سخی نہیں رہندی۔
 اوس آکھیا، ”مائی چالے۔“ چا کے مُندرنا بکسے دے وچ قائم کیتا۔ سر ہاندی آ لے پاسے الحمد
 توں لے کے والناس تائیں قرآن مجید لکھیا ہويا اوس چادر تے۔ اوس جیوں ایلے چائی۔
 اوس آکھیا، ”ایہہ کیہندا ہے؟“ اوس آکھیا، ”ایہہ احمد خان بھٹی دا ہے جد آوے اوہ منزل
 کردا ہے۔ اوس توں بعد میں کرنی ہاں۔“ اوس آکھیا، ”جے ڈھک پمدی ہاتاں بیوی فی
 سبیل اللہ ایہہ چادر وی۔“ اوس آکھیا، ”جا چالے۔“ اوہ وی بکسے دے وچ قائم کر لئی۔ گھر
 دے یو ہے بیار دے، اُتے سونے دی جڑ تل۔ ہر مقام ہر یو ہا ڈٹھا۔ پھلانے کوٹھے دا یو ہا
 ایس پاسے۔ رگن رگنتر کے دن ترتیجا چڑھیا اوس ایلے بیوی آکھیا، ”حاجن! توں مصلے
 تے نماز پڑھ۔ اذان ہو گئی ہے پیشیں دی۔ میں خالواں میں وی پڑھنی ہاں۔“ حاجن
 پڑھدی ہا کوئی نہ۔ جیوں ایلے مصلے تے کھلی بیوی کپڑے لاہ کے رکھے۔ بیوی جیوں ایلے
 صابن لایا۔ بی بی مصلے توں اٹھ کے لگی گئی۔ اوس یو ہا کھولیا۔ اوس آکھیا، ”بیوی پتہ نہیں انج
 تائیں تیری کسے کنڈ مٹی ہے یا نہیں۔“ اوہ اوس آکھیا، ”بھیت محرمادس نہ ہے۔“

بیٹھ جیو دے نال صلاح کیتی پایا دوستاں جدوں سوال میاں
 قصے عشق دے نوں ہوش نال کہنا ذرا رکھنا پیر سمبھال میاں
 عشق وچ مصیبتاں بہت مشکل بندہ کون جھلے ایہدی جھال میاں
 لکھاں پیر ولی عشق ڈوب دتے گل پا پریم دے جال میاں
 جیناں نال ایس عشق نے نیونہ لایا ساری عمر کیتی حال حال میاں
 فضل شاہ مریدے عشق خونی کئی کھوہنیاں سٹیاں گال میاں

بیوی نوں گوڈے توں اُتے، کھچ توں اُتے ہک روپے جتنا ٹھپا لگا ہے۔ اوس اُبھڑ بھا
 کپڑے نوں ماریا ہتھ۔ حاجن نوں اوس پھدھن دی کوشش کیتی۔ اوہ جی نکل گئی۔ مونہ
 تے، اکھیں توں صابن شاہن کڈھیاں نوکراں توں اوہ اگانہ نہ نکل گئی۔ ایہہ تاں بھیت
 پائے آئی ہا۔ گل تاں مک گئی۔ خبرے کیہڑی گل دی، قصہ کہانی میرے نال ہُن کیہہ ورتیسی؟
 جا کے محمد خان پٹھان اوہ وی دتا تے مُندرنا وی۔ کھچ توں اُتلے سنبھے روپے
 جتنا ٹھپا ہئی سچے پاسے۔ ایہہ کپی نشانی ہئی۔ لے کے محمد خان پٹھان دلی۔ اٹھویں
 دیہاڑے کچہری لگی اکبر جلال دین بادشاہ دی۔ اگے احمد خان کول بیٹھا ہے۔ محمد خان
 پٹھان بول کے اوہ مُندرنا تلی تے رکھیا۔ آکھیا، ”احمد خان بھٹی ایہہ سیہان مُندرنا کیہندا
 ہے؟“ بھٹی آکھیا، ”میرا ہے۔“ اوس آکھیا، ”ایہہ چادر الحمد توں لے کے والناس تائیں
 قرآن مجید لکھیا ہے۔ ایہہ کیہندی ہے؟“ اوس آکھیا، ”میری ہے۔“ اوس آکھیا، ”سچے
 پٹ، کھچ توں اُتے روپے جتنا ٹھپا۔“ اوس ایلے بھٹی کرسی چھڈ دتی۔ مُٹھیں میٹ کے
 زمین دے اُتے بہہ گیا۔ آکھیا، ”اکبر جلال دین بادشاہ! جلا دسدو۔ میرے دوویں بازو
 قلم کر کے دلی دے دروازے اُتے ٹنگ دیو۔ میں گُوڑا تے ایہہ سچا ہو گیا۔“ بادشاہ
 آکھیا، ”اٹھ دیہاڑے اگے گزر گئیں احمد خان تے اٹھ دیہاڑے فی میرے تے اپنی واہ
 لالے۔ جو گجھ لگدا ہئی۔“

بھٹی جناب گھوڑے دے اُتے اسوار ہو گیا۔ بھٹنیر دے وچ آیا۔ سوتا ڈھلدا پیا
 ہے۔ گھوڑا گھر لی دے اُتے آبدھا۔ اگاڑی پچھاڑی لا کے سجا بازو پھدھ کے آکھیا:

امب جوں لایا ہا میں چھاویں یہساں
 پھل جو لکسی میں کھوہ کے کھاساں
 ہار قسمت دی انج روایا ہے
 کدن بجن کول آ رل کے یہساں

نوکراں پُچھیا، ”کون؟“ آکھیا، ”میں احمو بھٹی۔“ اوہناں آکھیا، ”توں احمد خان ہیں۔“
 اوس آکھیا، ”پتہ نہیں میں احمو وی رہنا ہے یا نہیں۔“ اوہناں آکھیا، ”پتہ نہیں جی مُڑکیہ رنگ
 ہے تیرا؟“ اوس ایلے آکھیا، ”گل میری سُن لیو۔ ست پیڑھیاں کھا دھانیں اج میرے
 نال وعدہ کرو۔ دینہہ کسے بندے نوں ایہہ گل نہیں دسی کہ احمد خان بھٹی بھٹیر وچ آیا
 ہے۔“ اوہناں آکھیا، ”جی ٹھیک ہے۔“ جنڈرا باری دا لاہیا۔ اگے بیوی اوسے پلگھ دے
 اُتے۔ ہسی تائیں رضائی ہے۔ شمعداں دی، رانی دے چہرے دی لاٹ ہک۔ تلوار میان
 چوں کڈھی۔ آکھیا ماراں تلوار سر لاہ چھڈاں۔ آکھیا، پتہ نہیں ایہہ گناہی ہے یا نہیں۔ تلوار
 میان انج گھتی چاقو جیب اچوں کڈھیا۔ آکھیا نک وڈھ دیواں۔ آکھیا، دل انج دلیل آئی۔
 بندے آکھسن اوہ ویکھو نانک وڈھی دے گھر آلا پیا ادا ہے۔ مُونہہ دے اُتے لائی ہے
 کالک۔ بھٹی نکلیا ہے۔ گھوڑے دے اُتے ہویا ہے اسوار۔ دن دی ٹکی نکلیاں دلی جہانا
 باد دے وچ آگیا ہے۔

بیوی تجت دے ٹائم اُٹھی۔ سرہاندی آلے پاسے بندے جیڈا شیشہ۔ آکھیا
 گر کی اج تائیں میرے مُونہہ تے کالک نہیں آئی ایہہ کتھوں لگ گئی۔ اوس نوکراں نوں گل
 کہیتی۔ ”اے نوکر۔“ اکھے، ”جی۔“ ”گل کرو۔ راتیں گھر ٹر گئے ہاؤ۔ سیں گئے ہاؤ۔ کون
 اندر وڑیا ہے؟“ اوہناں آکھیا، ”بیوی گل چھڈ۔ اسیں جاگ کے پہرا پے دینے ہائیں۔
 کسے دی جرات ہے اندر وڑن دی۔“ اوس ایلے نوکر نوں آکھیا، ”جلادسد۔ ایہناں چواہاں
 دے سر لاہ لے۔ ایہہ گل سچی نہیں پے دیندے۔“ اوس ایلے ہک بولیا۔ اوس آکھیا، ”میاں
 ہے کول کوئی نہیں۔ ایہہ ہے بیوی۔ ایس سر لہا چھڈنا ہے۔ تسیں گل دس چھڈو۔“ اوہناں
 آکھیا، ”میاں احمد خان آیا ہا۔“ اوس آکھیا، ”کچہری دے وچ میری صفت کر بیٹھا ہے۔
 مُونہہ مَکالا میرا کالا ہے۔ مَن پتہ مینوں کوئی نہیں۔ ایہہ کیہڑی گل بنی ہے؟“ اوہدے بعد

بیوی روٹی نہیں کھا دھی صرف پانی تے بندگی خدا دی ہے۔ اوس مردواں ولس کیتا۔ گھوڑی تے کاٹھی پوائی۔ گھوڑی اُتے سوار ہو گئی۔ ”اے نوکر۔“ ”جی۔“ ”لکھ کے دتی جان دی ہاں۔ جے آگیو سے تاں ساڈی۔ نہ آئے تاں ہر شے تیری پر پتہ نہ لگے نئی بیوی گھر ہے یا نہیں۔“

گھوڑی کدھی ہے۔ گھوڑی سدھی دلی جہانا بادنوں کر۔ بے موڈھے نال قرآن مجید۔ کجے موڈے نال ڈھال تلوار۔ پانی آلی کونہی ہنے دے نال۔ گھوڑی سدھی دلی جہانا بادنوں۔ پچھدیاں پچھاندیاں ہک جنگل گزریا۔ دو بے جنگل دے وچ ہک ٹاہلی ہے۔ ٹاہلی دی بڑی نگھی چھاں۔ بیوی لتھی دن غروب ہو گیا۔ اوس جاہ دے اُتے گھوڑی چاں بدھی ہے۔ کاٹھی لاہی ہے۔ وضو کیتا ہے۔ مصلّا عبادت دا وچھایا ہے۔ عبادت شروع کر دتی ہے۔ ادھی رات پئی ڈھلدی ہے۔ شیر رہندا ہا او تھے۔ اوس ٹاہلی دے پٹھ آکے سدا ہا۔ اوہندا اوہ گھر ہا۔ شیر ماری ہے بھٹ۔ اوس ایلے اوس آکھیا بھٹیانی نہ بن بھٹی بن۔ تلوار میان دے وچوں چھکی۔ شیر نے ماری ہے بھٹ پنجاں پیراں نوں کر کے یاد، کلمہ نبی دا پڑھ کے، بھٹیانی ماری ہے تلوار شیر دی سری ٹپ کے منے۔ اوس ایلے وضو کر کے، صبح دی نماز پڑھ کے، گھوڑی دے اُتے کاٹھی، پانی آلی کونہی، قرآن مجید بغل دے نال۔ ڈھال تلوار کجے پاسے۔ دلی جہانا باد دے وچ دے وچ بھٹیانی آئی۔

کمرہ پچھیا گھوڑا پنھن نوں۔ اوہناں آکھیا، ”بادشاہ سلامت! کمرہ ہے۔“ گھر لی۔ اگاڑی پچھاڑی۔ جناب کمرہ بڑا سوہنا۔“ اوس ایلے اوس آکھیا، ”جی ایہہ کرایہ۔“ آکے گھوڑا بدھا۔ اوس آکھیا ہُن بھونہ دانہ لے آواں۔ نویں گل جیہڑی ہے نا اوہ ہر مقام تے چھوڑی ہوندی ہے۔ اگے جناب چار بندے پیٹھن۔ اوہناں آکھیا، ”ایہہ بندہ بڑا سوہنا ہے۔“ کسے آکھیا، ”چھڈو پرانہ۔ احمد خان بھٹی دا کل دینہہ بازو قلم ہو جانا ہے۔ اٹھواں دیہاڑا ہے۔“ اوس ایلے ہک بولیا: اُنگل نہ کھڑی کردا اوہدی بیوی بچ جوں انتیاں صفتاں نامیاں۔ تزکھے آکھیا، ”پتہ نہیں رنگ کیہ ہو جانا ہے۔“ چوتھے آکھیا، ”پتہ نہیں محمد خان دے بازو قلم ہو جان۔ ایہہ اللہ نوں پتہ ہے کہ احمد خان سچا وی ہو جائے۔“ ایہہ گل بیوی سُن لی۔ دوجی ہٹی تے وی ایہا گل پئی ہوندی ہائی۔ بھونہ دانہ لیا آکے گھوڑی دے اگے

پایا۔ راتیں سُتی۔ دن صبح ٹائم اُٹھی۔ ہک ننھا بچہ سد یوس۔ ”ارے لڑکا! ایہہ روپیے دس تینوں انعام۔ جیس ایلے اکبر جلال دین بادشاہ تخت دے اُتے آجاسی مینوں دسنا ہے۔“ ننھا لڑ گیا۔ اکبر جلال دین بادشاہ تخت دے اُتے آ بیٹھا۔ اوس آکھیا، ”بادشاہ سلامت! اکبر جلال دین بادشاہ تخت دے اُتے آ گیا ہے۔“

اوس ایلے جی قوال بنی ہے۔ آکے کچھری وچ السلاما لیکم۔ ”اکبر جلال دین بادشاہ میں سنیا ہے توں بڑا شاعر ہیں۔ بڑا ننھی ہیں۔ بڑا باانصاف ہیں تے میں کسے ملک دے بادشاہ دا کلاؤت ہاں تے جے اجازت ہووے تاں میں تھوڑی جیہی قوالی کر لوں۔“ جیس ایلے اوس قوالی شروع کیٹی ہے تاں بادشاہ دیاں لتاں لگ گئیاں۔ کچھو اُڈ دے کھلو گئے۔ اوس ایلے جناب بارہاں دا ٹائم ہو گیا۔ محمد خان پٹھان بول کے آکھیا، ”بادشاہ سلامت!“ ”جی۔“ ”دن بارہاں تے آ گیا ہے۔ احمد خان بھٹی دے بازو قلم کر کے دلی دے دروازے تے ٹنگے جان۔“ اوس آکھیا، ”محمد خان! ایہہ حضور دی قوالی پیا پڑھدا ہے۔ جناب محمد مصطفیٰ داناں پیا لیندا ہے۔ قیامت نوں اللہ سارے گناہ بخشے گا پر ایہہ نہ بخشے گا کہ میرا ناں تے میرے حبیب داناں لیندا ہے۔ توں بھلکے کر لئیں۔“ ٹائم ختم ہو گیا۔ بیوی گھر لڑ گئی۔

صبح دا ٹائم دس روپے پھیر ننھے نوں دتے۔ اوس ایلے جناب جا کے حافظ قرآن بنی۔ ننھے دسیا اکبر جلال دین بادشاہ تخت تے آ گیا ہے۔ بیوی نے قرآن پڑھنا شروع کردتا۔ محمد خان پٹھان آکھیا، ”اکبر جلال دین بادشاہ بارہاں دا ٹائم ہو گیا ہے۔ احمد خان بھٹی دے بازو قلم کر کے دلی دے دروازے تے ٹنگے جان۔“ اوس آکھیا، ”محمد خان! اوئے کوئی احمد خان تیری کڈھی ہوئی تاں نہیں۔ ایڈی کوڑ ہا تاں بھلکے کرلا۔“ دوجا ٹائم وی ختم۔ اوس ایلے بیوی پچھیا بادشاہ دی کسے بی بی نال وی محبت ہے۔ اوہناں آکھیا، ”چڑھدے پاسے کنجری ست بجے توں لے کے پنج بجے تاں ٹائم کردی ہے۔ جمعے دا دیہاڑا۔ نر چڑا نہیں پھٹک سکدا۔ کول فوج ہوندى ہے۔“ بیوی نے کُلا، صاف۔ بی بی نوں مردواں ولس بڑا سوہنا لگدا ہے۔ جیس ایلے کنجری ڈٹھا۔ اوس بڑھ جلال دین دی سیج وچھائی۔ کنیں گوشت ووشٹ، قورمے، فرنیاں، کھانے جناب کنجری لا چھڈے۔ اوس

آکھیا، ”کھانیاں دی بڑی لوڑ ہے، پر میں ہک گل کرنی ہے۔ جیہڑا ٹائم دینہہ تیرا ہے۔ اوہ توں مینوں دے۔ جیہڑا انعام ڈھیوے اوہ تیرا۔“ ”ہائیں۔“ اوس آکھیا، ”انعام ڈھیوے اوہ تیرا۔ ٹائم توں مینوں دیونا ہے۔“ اوس آکھیا، ”مٹر میرے نال نکاح کرسیں؟“ بیوی ہسی۔ اوس آکھیا، ”ہا۔ میں کردیاں گا۔ کراں گا تیرے نال نکاح۔“ ٹائم دے دتا۔

بھنڈ ٹر گئے۔ ڈھولکاں وگ گئیاں۔ کنجری دی بھین آئی ہے جیس مڑا کرنا ہے۔ تخت بادشاہی لگا۔ اوہ دُنیا تماش گیر بھی اج احمد خان بھٹی دے بازو قلم ہو کے دلی دے دروازے تے ٹنگے جانے۔ جیس ایلے کچہری دے وچ آگئی، ہُن دُنیا۔ دوکانداراں دوکاناں چھڈ دتیاں۔ جتھے جتھے بیوی لکھے دُنیا مگر۔

چھتی بھمی ہے ٹاہلی پٹھ کنجری دا ڈیرا

جی کنجری پئی کردی ہے مُجرا

اوس ایلے محمد خان پٹھان بول کے آکھیا، ”اکبر جلال دین بادشاہ! بارہاں دا ٹائم ہو گیا ہے۔ احمد خان بھٹی دے بازو قلم کر کے دلی دے دروازے تے ٹنگے جان۔“ اوس آکھیا، ”کھلو جا۔ مٹھا رہو۔“ اوس ایلے بیوی بولی۔ اوس آکھیا، ”اکبر جلال دین بادشاہ! میں سُنیا ہیں توں انصاف ہیں۔ توں بے انصاف ہیں۔ تیرے اج غیرت کوئی نہیں۔ توں بے غیرت بادشاہ ہیں۔“ اوس آکھیا، ”اللہ دیا بندیا! میں بولیا وی تیرے نال نہیں تے ایہہ گل کیہ ہے؟“ اوس آکھیا، ”میرا چور تیری ایس کچہری اج ہے۔ ترائے دیہاڑے ہو گئین مینوں آوندیاں تے توں ایہہ نہیں کچھیا کہ کیہڑے مطلب نوں اللہ دیا بندیا آونا ہیں۔ میرا چور تیری ایس کچہری دے وچ بیٹھا ہے۔ اوہندے کولوں مینوں چوری لے دے۔“ اوس آکھیا، ”کیہڑا تیرا چور؟“ اوس آکھیا، ”محمد خان پٹھان۔“ محمد خان پٹھان بولیا۔ اوس آکھیا، ”بادشاہ سلامت! مینوں اللہ تے اللہ دے نبی دی قسم ہے میں ایہندی شکل توں وی نہیں واقف۔ میں ایہندے ناں توں ای نہیں واقف۔ مینوں ایہندے پنڈ دا ای نہیں پتہ۔“ اوس آکھیا، ”بادشاہ سلامت! ایہہ گل لکھ۔“ اوس آکھیا، ”بادشاہ سلامت! میں ہُن ایہندے بوجھے چوں کڈھنی ہے ہر شے۔“ اوس آکھیا، ”بادشاہ سلامت! ایہہ بندہ گوڑ پیا ماردا ہے مینوں ایہندے گھر دا ہی نہیں پتہ۔“ اوس ایلے اوس آکھیا، ”اوہ مُندرنا تے چادر۔ الحمد

کولوں والناس تائیں قرآن مجید لکھیا ہو یا ہے۔ اوہ کدوں لئی ہے؟“ اوس ایلے محمد خان پٹھان دے فرشتے وی چھڈ گئے۔ اوس ایلے اکبر جلال دین بادشاہ بولیا۔ اوس جلا داداں نوں سدیا۔ ”محمد خان پٹھان دے بازو قلم کر کے دلی دے دروازے تے ٹنگے جان۔“ اوس آکھیا، ”نہیں بادشاہ سلامت! میں اوس احمد خان بھٹی دے گھروں بھٹیانی آں۔ میرا جتنے تائیں خاوند نہ آوے ایہندے بازو قلم نہ کیتے جاوے۔“ دو بندے گئے۔ دو بندیاں دے موڈھیاں تے ہتھ رکھ کے بھٹی سچے پاسے گُرسی، آ کے اکبر جلال دین بادشاہ دے کول بیٹھا۔ اکبر جلال دین آکھیا، ”میاں صاحب! ساہمنے ویکھو۔“ اوس ایلے بیوی بولی:

لوک گلاں کریندے رہندن

سو سو شرطاں لگیندے رہندن

گل جوں کائی نہیں توں نہ جھڑکیں

تے باز جھاٹاں مریندے رہندن

اوس ایلے جناب محمد خان پٹھان دے بازو قلم کر کے دلی دے دروازے تے ٹنگے گئے۔ اوس ایلے احمد خان بھٹی نوں اوس آکھیا، ”آہُن گھر چلیے۔“ اوس آکھیا، ”نہیں جتھے شرط لگی ہے۔ ساری رات کریں بندگی۔ تہت پڑھ کے، صبح دی نماز پڑھ کے، قرآن دی منزل کر کے، پڑھ کے کلمہ نبی دا، بھریں پانی دی کرولی، ایہہ درخت ہرا ہو جاوے تاں میں جانا ہے۔“ اوس آکھیا، ”بھٹیا! ایہہ ازمودہ لے لئے۔“ ساری رات بندگی کیتی۔ تہت پڑھیا۔ صبح دی نماز پڑھی۔ پڑھ کے قرآن دی منزل کیتی۔ پڑھ کے کلمہ نبی دا بھری پانی دی کرولی۔ ماریا چھٹا درخت ہرا ہو گیا۔ اوس ایلے اکبر جلال دین بادشاہ آکھیا، ”احمد خان بھٹی! ایہہ تخت دی تیرا تے تاج۔“ اوس ایلے بیوی بولی: ساڈاں تیرے تخت نوں تخت ساڈا گھر ہے۔ دوویں گھوڑیاں تے چڑھ کے اوہ جی بھٹنیر پیٹھن تے اسیں ایہہ بیٹھے ہاں۔

سعد اللہ خاں چنیوٹی

ایہہ قصبہ جیہڑا چنیوٹ ہے، ایہدا پہلاناں چندن وٹ ہے۔ چندن ہک رانی ہوئی ہے تے وٹ سنسکرت وچ دھولرٹوں سدیندن۔ چندن وٹ یعنی رانی چندن دا دھولر۔ ایہہ چنیوٹ پرانا قصبہ ہے۔ شاہ جہاں بادشاہ دا وقت ہے۔ بادشاہ دلی توں چڑھیا ہے بھئی میں سارے پنجاب تے پھرنا ہے۔ چنیوٹ آیا ہے۔ مخلوق اکٹھی ہے۔ بادشاہ جوں آیا ہے۔ صبح دا وقت ہے، بادشاہ بازار دے وچ وگیا آوندا ہے۔ لڑکا ہک بیٹھا ہے، بڑا نھاتا دھوتا ہویا، خوبصورت جیہا۔ ستھرا جیہا۔ اوس آ کے آکھیا ہے بادشاہ ٹوں، ”السلام علیکم۔“ بادشاہ ٹوں اوس دا سلام دا دیونا بڑا پیارا لگا ہے۔ پیار دتا ہے بادشاہ۔ کچھیا ہے بادشاہ: لڑکا کون ہے؟ اوہناں آکھیا، ”جی، ایہہ تھہیم ہے تے ناں ایہدا سعد اللہ خاں ہے۔ سلطان دا پتر ہے۔“ پیو اوہدا کول کھلا ہا۔ اوس سلام دے کے آکھیا ہے، ”جی میرا بچہ ہے۔“ بادشاہ شکل صورت اوہدی وکھ کے آکھیا ہے، ”میں تینوں ہک گل دساں۔“ سلطان آکھیا، ”جی آ۔“ اکھ، ”دماغ ہک بند صندوق ہے۔ ایس ٹوں جب تک علم دی کجی نہ لگے گھلدا نہیں۔ قدرت بڑے بڑے دماغ پیدا کیتے مگر اوہناں دماغاں ٹوں اگوں علم دا سامان نہ ملیا تے اوہ گھلے نہ۔ جے کدی ایہہ بچہ مینوں دے دیویں میں ایہنوں دلی لے جا کے پڑھائیں۔ ایہہ اپنا ناں کدھسی وچ دُنیا دے۔“ اوس آکھیا، ”لے جا۔“ بادشاہ ایس سعد اللہ خاں ٹوں لے کے دلی چلا گیا۔

چار پتر ہین بادشاہ شاہ جہاں دے۔ شاہ دارا، شاہ اورنگ زیب، شاہ مراد، شاہ شجاع۔ ایہناں چواہاں کان بادشاہ ایران دا استاد منگولایا ہویا ہا، جیہڑا ایہناں چاراں ٹوں

پڑھیندا ہا۔ بادشاہ آکھیا ہے، ”استاد جی! ایہہ پنجواں بچہ وی میرا سمجھیاے۔ ایہنوں وی پڑھاؤ۔“ قدرت خدا دی ہے ہوشیار بچے نال اُستاد تُوں محبت ہوندی ہے۔ گند ذہن ہووے جیہڑا، بھاویں بادشاہ دا پُتر کیوں نہ ہووے، اُستاد دی کاوڑ نہیں لہندی۔ اوہ اُستاد دے اندر دا ساڑا ہوندا ہے نماں۔ جیس ویلے پڑھن لگ پین، اوہ دیہاڑیاں دے بعد بادشاہ دے پُتراں دا مانیٹر بن گیا ہے۔ ایہہ اوہناں تُوں سبق دیوے۔

ایہدا طالب علمی دا وقت ہے۔ غزنی دے بادشاہ خط چاں لکھیا ہے دلی دے بادشاہ تُوں کہ توں شاہ ہند سدوا، شاہ جہاں تاں توں ہے نہیں۔ ایڈا بادشاہ ہو کے کیڈا جھوٹا ناں ہے تیرا۔ کوئی ساری دنیا دا بادشاہ ہیں توں۔ بادشاہ کول ایہہ خط پہنچیا ہے، دنگ رہ گیا ہے بادشاہ۔ درباریے سبھ اکٹھے کیتن۔ دربار سارے دے وچ خط پھیریا گیا ہے کہ جواب دیو۔ اوہناں آکھیا، ”جی ناں دعا ہوندی ہے، جیہدا ناں شیر ہووے ضروری تاں نہیں اوہ شیر جتنا دلیر ہووے یاں شیر جتنی طاقت رکھدا ہووے۔ بس ایہہ دعا ہے۔“ بادشاہ آکھیا، ”اتنا جواب کافی نہیں۔ اتنا تاں اوہ وی جاندا ہے۔“ ایہہ گل چلدی چلدی درس وچ آ گئی۔ سعد اللہ خاں آکھیا، ”جواب تاں میں دیواں ہام پر مینوں بادشاہ کولوں شرم آوندی ہے۔ تئیں شہزادیو اپنا ناں لئیو تاں میں لکھنا ہاں۔“ اوہناں آکھیا، ”لکھ۔“ اوس آکھیا، ”ابجد دے حساب نال جتنے عدد شاہ ہند دے ہن اتنے ہی شاہ جہاں دے ہن۔ ایس واسطے ہند دا بادشاہ شاہ جہاں سدوا سکدا ہے۔“ اوہناں گنے تاں برابر۔ بادشاہ دے پیش ایہہ گل کہتی گئی۔ بادشاہ کچھیا، ”جواب دتا کاہیں ہے؟“ شہزادیاں آکھیا، ”جی اساں۔“ اوس آکھیا، ”گھر جمیاں دے دند پٹ کے نہیں گنیں۔“ انج ہوو ہا تاں مینوں وی پتہ ہووے ہا۔“ اوہناں آکھیا، ”چنیوٹی لڑکا ہے اوس دسیا ہے۔“ بادشاہ آکھیا، ”ہا، پہلے دیہاڑے لاء دی نظر میری اوس تے ہائی۔“ بادشاہ اوس تُوں بلوا کے دربار وچ شاہی کُرسی دا حقدار کہتا ہے۔ نواب سعد اللہ خاں دا خطاب دتا ہے۔ غزنی دے بادشاہ کول خط اپڑیا ہے تے اوس آکھیا ہے، ”جے وزیر ہے تیرا تاں ٹھیک ہے نہیں تاں اوہراں بھیج، میں وزارت دینا ہاں۔“ ایہہ اچے ایہدے لڑکپن دا زمانہ ہے۔

دیہاڑیاں دے بعد ایران دے بادشاہ دا دل بنیا ہے کہ میں دلی تے حملہ

کراں۔ وزیرِ نون بکلا یا پيس کہ میرا ايہہ دل ہے۔ کیوں؟

اول دلی توراں، کر اپنی پائی
وت لئی چوہاناں، گجھ مُد وسائی
وت لئی غوریاں، گھت تلوار کٹائی
وت پٹھاناں گھدی، گھر چوتھے آئی
تد بابر کے چوغطیاں، انگ خوب لگائی
دلی سدا نوزنی، رت دھڑی لوائی
ہک مرے دواسر دھرے، نت حُسن سوائی
ايہہ ماس کھاوے رچ پُتراں، جیوں بکر قضا ئی
ایس لکھ کوہائیاں کھوہنیاں، ذرا مہر نہ آئی
ایس دلی توں شہزادیاں، کھاہ ہوندى آئی

دل میرا چاہندا ہے تختِ دلی دا ہووے، ملک ہند دا ہووے۔ وزیر اوس نون آکھیا ہے،
”پہلے اوہدے نال اپنی طاقت ماپو، جے طاقتوں ودھیک ہوویں تاں وت ہلا بول۔ ايہہ
تیمور لاء بادشاہ ہن۔ بادشاہی دے ايہہ وٹ جاندن۔ امیرت تے آون تاں امیر ايہناں
جیہا کوئی نہیں۔ جے سپاہ گری تے آون تاں ايہناں جیہا سپاہی وی کوئی نہیں۔ سفر کرن
تے آون تاں ايہناں جیہا پیادہ وی کوئی نہیں۔“ بادشاہ آکھیا، ”لڑائی دے سوا میں طاقت
کیویں ماپاں؟“ اوس آکھیا، ”جی میں ماپ سکناں۔“ ”اوہ کیویں؟“ ”میں بوہڑ دے
دودھ نال خط لکھناں۔ جیہا کاغذ چٹا، جیہا دودھ چٹا۔ جے علم نہیں نیں تاں پڑھ نہ سکسن۔
جیس کول علم نہیں اوس کول کجھ وی نہیں۔ اسیں حملہ کر دیسائیں۔ جے لین پڑھ تاں میں
چار جوان لکھن بھی ایدے گھلو اساڈے نال مقابلہ کرن۔ اسماں جلسہ رکھیا ہويا ہے۔ میں
چار جوان اوہ لکھن، جیہناں دے سر اُتے تخت کھلا ہے۔ جے اتھے آکے اسانوں ہرا جاون
تاں حملہ دا مطلب کوئی نہیں۔ جے اوہ ہر جاون تاں دھاوا کر دیسائیں۔“ اوس پچھیا،
”چار جوان کیہڑے لکھسیں؟“ اوس دسیا، ”ہک میں لکھنا ہے پہلوان بھی پتہ لگے ودھ
تون ودھ طاقت جواناں وچ کتنی ہے۔“ اودوں ہتھ پھادھویں ہتھیاراں نال لڑائی ہوندى

ہائی۔ ”دو آ میں لکھنا ہے شطرنج باز۔“ اوس زمانے شطرنج دی سکھائی ہائی، جنگی سکھائی۔ جیہڑا شطرنج دا چنگا کھلاڑی ہووے ہا اوس نوں جرنیل لایا جاندا ہا۔ ”اودے کولوں پتہ لگسی کہ فنون جنگ کتنا جاندن۔ تریئے نمبر تے میں لکھنا ہے تیر انداز بھئی ایہناں لوکاں دی شست کتنی تھاہری ہوئی ہے۔ چوتھے نمبر تے میں لکھنا ہے چابک سوار بھجی گھوڑے توں کم کتنا لے سکدن میدان جنگ وچ۔“ بادشاہ اپنے وزیر نوں انعام دتا ہے۔ خط بھجیا ہند وچ تے نال تحفے تحائف بھیجے۔

شاہ جہاں بادشاہ کول ایہہ آئن۔ اوہنوں اطلاع دتی گئی ہے۔ ایران دے بادشاہ انج تحفے بھیجی ایہہ خط ہے اوہناں دا۔ اوس زمانے ریشم دے لفافے ہوندے ہان، جیہناں دے وچ خط ہوندے ہان۔ بڑا خوش ہويا ہے بادشاہ بھئی دوستی کرو ہے میرے نال۔ جیہڑے ویلے لفافے چوں خط کڈھیا ہے تاں خط تے نقطہ وی کوئی نہ۔ دربار سارے دے وچ پھیریا گیا۔ اوہناں آکھیا، ”جی، مخول کیتا بیس۔ خط لکھیا ہويا کوئی نہیں۔“ بادشاہ آکھیا، ”سعد اللہ خاں نوں بلائیو۔“ اوس خط تلی تے جھپ کے آکھیا ہے، ”کون آہدا ہے، خط نہیں لکھیا ہويا۔ کاغذ دے وجود نالوں وزن زیادہ ہے۔“ وزیر ایس نوں آکھیا ہے، ”اساڈی بے عزتی کرن کان توہیں ایہہ گل کیتی ہے۔ پڑھ کے سنا۔“ نوکر نوں نواب سعد اللہ خاں آکھیا ہے، ”جا اک دیاں لکڑیں لے آ۔“ اوس لیاندین۔ اگ لائی دھواں اٹھیا ہے۔ دھوں دے اُتے کاغذ کھلا ہے۔ لکھیا ہويا دین لگ پیا۔ وت ہر کوئی پڑھن لگ پیا۔ بادشاہ بڑا خوش ہويا۔ ”ہلا۔“ بادشاہ آکھیا، ”کیہ لکھیا ہے؟“ اوس آکھیا، ”جی، لکھیا ہے چار جوان بھیج، جیہڑے اوتھے جا کے اوہناں نوں ہرائن نہیں تاں تخت دلی دا پٹھ تلوار دے ہئی۔ حملہ کرو ہئی۔“

بادشاہ اوس ویلے تیر انداز بلائن۔ اوس آکھیا، ”ہلا، تہاڈے وچوں تیر اندازی وچ کیہڑا سرسا ہے؟“ اوہناں آکھیا، ”جی اساڈے وچ سعد اللہ خاں جیہا تیر انداز کوئی نہیں۔“ ”بیچ سعد اللہ۔“ اکھے، ”جی ہاں۔“ ”ہلا پک تاں ایہہ ہو گیا۔“ شطرنج باز بلائے۔ اوہناں آکھیا، ”اساڈے وچ وی ایس جیہا کوئی نہیں۔“ چابک سواراں آکھیا، ”اساڈے وچ وی ایس جیہا کوئی نہیں۔“ بادشاہ آکھیا، ”جے پہلوانی جاننا ہیں تاں پکو گھل دیوے۔“

اوس آکھیا، ”جی ایہہ چیریاں ترکلیں آلیاں دا کم ہوندا ہے۔ میرا کم ایہہ نہیں۔ میتھوں ایہہ کم ہوندا ہی نہیں۔“ بادشاہ لکھ دتا ہے کہ اسیں چارے جوان بھیج رہے ہاں، پر بادشاہ نوں پہلوان لیھے کوئی نہ۔ ایران آلوں خط توں خط آوے۔ گھلو جی مڑ۔ ایہہ تاں پتہ لگ گیا ہے بھئی خط پڑھی گیا ہے۔

کلل آئیاں ہن پیبیاں، مجھ چھوٹے پانی

بادشاہ بڑا حیران ہے۔ پریشان ہے۔ کیہ کراں؟ بے طاقت آلوں وی اساڈا پہلوان ہرے تاں وی اساڈے ملک دی بے عزتی ہے بھئی کمزور لوک ہن۔

اوس زمانے کوئلہ فتح اللہ شاہ، شاہ جیونے، توں پروں کھلا ہے۔ سے سال ہو گئیں دریا ڈھاہ لائی ہوئی ہا، میرا خیال ہے دریا بُرد ہو گیا ہے۔ کوئلے فتح اللہ شاہ دے وچ سید بخاری ہوئے دو بھائی۔ سید الیاس وڈا ہويا ہے تے سید عمر چھوٹا ہويا ہے۔ بڑے صاحب جائیداد ہوئے۔ اوس علاقے دا ٹکالے کے تار بندے ہاں۔ ماں پیو مر گئیں۔ سید عمر اُتے سید الیاس چھاں چاں کیتی۔ ایہہ نوں پتہ نہ لگے کہ میرا ماں پیو مر گیا ہے۔ دُکھ آوے، سکھ آوے، اپنے اُتے۔ بھراؤں اوس تلی دے چھالے آر رکھیا ہے۔ دوواں بھراواں نوں پک پک مرض ہائی۔ سید الیاس سخی ہويا ہے تے سخی نوں پتہ ہوندا ہے میرا گھر ایہہ کجھ ہے۔ اوہ اپنی روٹی وی دے چھوڑیندا ہے۔ تن دا کپڑا وی دے چھوڑیندا ہے۔ سید عمر نوں گھول دا شوق ہا۔ بس کھاونا تے پیونا تے کسرت تے ایہہ چیزاں۔ سید الیاس ٹکے تارن تریا ہے۔ مُلک وچ کال پیا ہويا ہے۔ غرباں نوں پتہ لگا ہے کہ سید ٹکے تارن لہور پیا ویندا ہے۔ غریب ملن لگ پین بھئی بچے بھگھے پئے مردن۔ سید دیون لگ پیا ہے لہور توں اوہراں ہائی کہ اوہناں گھوڑا وی لے لیا ہے۔ پیدل تڑ کے گھر آ وڑیا ہے۔ ”تار آیا ہیں؟“ ”ہاں تار آیاں۔“

ہرکارے بادشاہ دے آئن، بنھ کے سید نوں دلی دربار وچ جا پیش کیتاں۔ بادشاہ آکھیا، ”اوہ ٹکے بھئی تیرے آل۔“ اوس آکھیا، ”ملک بھگھا پیا مردا ہا۔ رعایا تنیاں دی ہا۔ میں سبھ کجھ غرباں وچ ونڈ چھڈیا ہے۔ چچہ خون دا جتھے آکھیں اوہ بھر کے تیتھوں قربان کر چھڈنا ہے۔“ بادشاہ ایس نوں عمر قید سزا سنا چھڈی ہے۔ اوس زمانے سیاسی

قیدیاں کان پنڈت خانے دی جیہل ہوندی ہا۔ اوہ زمین دوز ہوندی ہا۔ ایہہ پنڈت خانے دی جیہل وچ، جتھے وڈے نواباں دے، راجیاں، رانیاں دے لڑکے۔ داروغہ وچ جیہل دے پھر دا آوند اہے تے آہدا آوند اہے، ”بھیڑیو! ایڈے راٹھاں تے نواباں دے پتر ہو کے قید جھلیندے پئے ہو، عمر قید۔“ اوس ویلے عمر قید تا زندگی ہوندی ہا۔ ”کوئی ملک دی عزت رکھو ہا چاں۔ ایران دے پہلوان نال گھلو ہا چاں۔“ سید الیاس اگے بھرا دے دکھ نون روند ا بیٹھا ہے کہ غریب بالکل انجان، نہ اوس نون ماما تارن دا پتہ ہے۔ نہ اوس نون واہیاں کراون دا پتہ ہے۔ نہ سانگیاں دا پتہ ہے۔

ب : باغ دے وچ کھلوڑی نون، پھل چندی نون، کنیں چور پئے نی اگے ہک قضیے نون روندی ساں، اتوں لکھاں قضیے ہور پئے نی نپ سوئی دی سار نہ جاندی ساں، مینوں لکھنے تیر تے مور پئے نی علی حیدرا وے ساتھوں سوئی چنگے، جیہڑے کل جے اج گور پئے نی ایہہ روند ا بیٹھا ہے بھرا دے وچوڑے وچ۔ اوس ویلے سید الیاس ہر کارے نون آکھیا ہے، ”اتھے میرا بھرا سید عمر ہوندا تاں ایران دا پہلوان نہ بلائے ہا، پر ایہہ راجے رانے تاں نہ ہوئے، رناں ہونیاں۔“ داروغے جا کے بادشاہ نون گل کیتی ہے، جیہڑا جھنگ دا نواب سید آیا ہو یا ہے، ایہہ اوس گل کیتی ہے۔ بادشاہ سید نون بلوایا۔ بادشاہ آکھیا، ”ٹکے ماف۔ قید رہا۔ ہٹ حوالے۔ نوکر نوکریں مکان ہر شے تیری۔ بھرا نون بلا۔ میں خوش ہو گیا ہاں کہ تینوں ملک دی غیرت آئی ہے۔“ شتر سوار دوڑایا پس۔ بھرا آل خط لکھیا پس۔

بکرا خوراک ہا سید عمر دی۔ بھن بھن کے نوکریں اگے رکھیا ہے۔ پہلا لقمہ ہی سید اٹھایا ہے باہروں نوکر بھیج کے وڑ پئی ہے۔ اوس آکھیا، ”ولی دا شتر سوار ڈیرے تے لتھا کھلا ہے تے تہانوں بولیندا ہے۔“ سید دے ہتھ چوں لقمہ ڈھے گیا ہے۔ بھرا میرا مر گیا ہے۔ زندگی وچ تاں نہ اوہ چھٹ سکدا ہا، نہ اوہ مل سکدا ہا۔

اگے سر جا بیٹھا ہے پیٹھکے، ہس ہس تنکے لا اوہنوں کسے ونج آکھیا، ٹریا جاندا ہی خان بھرا اوہدا نشہ اٹھارھاں سال دا، جھبڈے ترٹ گیا

دورا مار مڈاٹھ تے، دتوس بھن گنوا
 جیہڑا چاہیں پوست گھوٹیا، دتوس خاک ملا
 پنج پتر راء وچھل دے، اگے تریہیں نوں ملی قضا
 تینوں واسطہ گھنتا رب دا، مرزیا جوڑی بھنگ نہ پا
 لقمہ ڈھے گیا ہے۔ ہنجوں فر فر۔ ڈیرے تے آیا ہے تے دوروں ہی بلایا ہے، ”شتر
 سوار! سید الیاس فوت ہو گیا ہے؟“ اوس آکھیا، ”واہ بھئی واہ، میں مبھارک لے کے آیا
 کھلا ہاں۔ ٹکے ماف۔ قید رہا۔ ہٹ حوالے تے تینوں پہلوان ایران دے کان بلایا
 گیا ہے۔“ سید سجدے وچ ڈھٹھا ہے واہ میرے اللہ۔

سمندر وچ پہاڑاں وچ بیاباناں اُجاڑاں وچ
 پُکارے کوئی کسے ویلے مصیبت ہر مٹیندا ہے
 مولا ایہہ وقت وی آونا ہا۔ اساں بھراواں زندگی وچ وی ملنا ہا۔ چڑھ بیٹھے۔ لہوری
 دروازے دی دے وچ اپڑن تاں تکیا ہے کہ بھرا، بھرا دا انتظار کر رہیا ہے۔
 م : مدت گزری راہ نکدیاں نوں، اجے تیک نہیں یار دلدار آیا
 جیہناں بیلیاں دے نکھر جان بلی، اوہناں کدی نہیں چین قرار آیا
 سڑے باغ کدی نہ ہرے ہوندے، بھاویں جیڑا وقت بہار آیا
 گھر پیٹھڑی نوں کوئی آن آکھے، علی حیدرا اوہ تیڈا یار آیا
 بھراواں تکیا ہے ہک دوئے نوں، ملن۔ جدائی دے داغ ہنجواں دھوتن۔ مکان تے
 آگٹن تے ساری رات۔

ا : اج دی رات سہاگ والی، بھلکے پتہ نہیں کیہڑا رنگ ہو سی
 کتھے توں ہو سیس کتھے میں ہو ساں، کتھے شمع تے کتھے پتنگ ہو سی
 کائی گل دسو جیہڑی یاد رکھاں، جدوں تاں باجھوں دل تنگ ہو سی
 تیرے باجھ پیاریا جانیا وے، میرا کیہڑا بھلیڑا سنگ ہو سی
 ساری رات ایہناں سمجھی ہے، جیویں سہاگ دی ہے۔ فجر نھا دھو کے، لباس تبدیل کر
 کے، بادشاہ دے دربار وچ سلام کیتا نیں۔ آہدن: جییں ویلے سید وڑیا ہے سید عمر،

مخلوق دنگ ہوئی ہے۔ معلوم ہوندا ہے جوان دے بازو فولاد دے بنے ہوئے۔ بڑا خوبصورت ہے۔ قد آور ہے۔ جوان ہے پورا۔ بادشاہ مسکرا کے آکھیا ہے، ”سید الیاس! تیرا بھرا ڈٹھیاں دل خوش ہو گیا ہے۔ واقعی جوان ہے۔ دیو بھرے رستم ہند نال ایہدا گھول ہوسی۔ اوہنوں ڈھاہ لوے تاں مڑ پاس ہے وت ایران جاوے۔“ سید عمر گرسی توں اٹھیا ہے تے اوس آکھیا، ”شہنشاہ سلامت! بھرا وڈا ہے۔ میرے پیو دی تھاہر ہے، پر میرے کسب دا ایہنوں پتہ کوئی نہیں۔ ترائے سوٹھ ونگ گشتی دا ہے، جیہدا میں ماہر آں۔ مینوں تساں بلایا ہے ایران دے پہلوان کان۔ پہلوان ایران دا مینوں ڈھاہ جاوے تاں موت سزا لے لیاں۔ گولی وگا چھوڑیائے۔ ہند دے پہلوان نال میں نہ گھلساں۔“ بادشاہ آکھیا، ”نہیں، میں ازمائے پناں تینوں کیوں گھلاں۔ تینوں گھول کرنی پوسی، کیوں جوں میں حکم دے چھڈیا ہے۔“ سید آکھیا، ”تیرا حکم کوئی خدا رسول دا حکم ہے؟ بندہ ای ہیں۔ میں نہ گھلساں۔“ بادشاہ آکھیا، ”سید الیاس ہک جانگی جیہا آن کے دربار توں گھتیا ہئی، جیس توں شاہی آداب دا علم ہی نہیں بھئی بادشاہ نال گل کیوں کر بندی ہے۔ ایہنوں رات توں سمجھا، دیو بھرے جے ایہہ انکار کر لسی تاں میں ایہنوں حکم عدولی دے وچ موت سزا کر چھوڑیاں۔“

سید الیاس بھرا نوں لے کے ٹر پیا ہے۔ اوہنوں یقین ہے ہن لہندیوں اُبھر جاوے ایس گھول کائی نہیں کرنی۔ بادشاہ حکم دے چکا ہے کہ ایہنوں موت سزا ہے۔ میں چھٹم پر بھرا دے کے چھٹم۔ ایہہ مری گیا ہے۔ رات نوں جیہڑے ویلے کھانا تیار ہو یا ہے، سید عمر، سید الیاس توں آکھیا ہے، ”آکھانا کھاویئے۔“ اوس آکھیا، ”راتیں ایس ویلے میں تیری لاش دفنیں دیاں کھلیاں ہونا ہے۔ مینوں کیہڑے کھانے یاد ہن۔“ سید عمر ہسیا تے اوس آکھیا، ”قید وچ رہ رہ کے شاید ایمان تیرا کمزور ہو گیا ہے۔ موت حیاتی دی وارث اوہ پاک ذات ہے، جیس پیدا کیتا ہے انسان توں۔ ایہہ آپ نمانا موت اگے بے وس ہے۔ بادشاہ موت چاں آکھے مڑ مر جاویندا ہے۔ اگانہہ آ، کھانا کھا۔“ اوس آکھیا، ”بیڑا ٹھل جاوی مدت دے بعد ملیا سے۔ میں تینوں عرض کریناں گھل چاں۔“ اوس آکھیا، ”عرض نہیں، ہوندا تاں تیرا حکم ہے۔ ایہہ گل دس بادشاہ نوں پتہ کوئی نہیں، جیس جوان میرے مقابلے تے آدنا

ہے، اوس مر جاونا ہے۔ توں کیہ چاہنا ئیں میں تینوں راضی کرن کان دوزخ وچ جاواں۔
 بھئی ہک ناحق بندہ ماراں۔ تیرے حکم کان۔“ اوس آکھیا، ”ایران آلے تیرا تھڈا لٹاڑیا ہويا
 ہے۔ اوہ مریندا ہیں۔ ایہہ نہیوں مریندا۔ آپ موت سزا ہونا ہیں۔“ اوس آکھیا، ”بھائی
 جان! دفاع اسلام وچ جائز ہے۔ جے میں اوہ نہ ڈھاہیں تاں ہند تے حملہ ہو جاسی۔ کئی
 جاناں ضائع ہو جاسن۔ جے کوسو مر یوے تاں ملک بچ جاسی۔“ اوس ویلے سید الیاس اٹھیا
 ہے تے بھراؤں ہاں نال چاں لایا ہے تے آکھیا پس، ”خدا راکھا ہو سیا۔ پر ہک گل کر۔
 تینوں عادت ہے کچھلی راتیں پھر سوا پھر رات دا لے کے عبادت جا کرینا ئیں دیا تے۔
 دریا جمنا ایہہ لگھدا پیا ہے نالوں دلی دے۔ استھے شیر مراؤ ہے۔ آدم خور ہے، جیہڑا شیر
 انسان دے گوشت تے پل جاوے اوہ ہور گوشت پسند نہیں کریندا۔ بڑے نقصان کریندا کھلا
 ہے۔ بادشاہ بڑے انعام کڈھے ہوئیں۔ اوہ دے گل پوند اکوئی نہیں۔ ماہی گیر او تھے مچھیاں
 پنن نہیں ویندے۔ راج گھاٹ دے پتن ہٹا لے ہن، شیر دے ڈرتوں۔ دریا تے نہ جاویں
 کسے وہندے سرتے عبادت کریں۔ شینہ دے ہتھوں مریوں تاں میرے ہتھیں لاش ای
 نہیں آونی۔ توڑا بادشاہ مریسی ہا تاں کفن دفن جنازے کچھ کر ہساں۔“ اکھے، ”چلو نہ
 ویساں۔“ سیں پے دوویں بھرا۔

کچھلی رات دا وقت ہے۔ اپنی عادت مطابق سید اٹھیا ہے۔ اوس فقیری لباس
 پہنیا ہے۔ اوس زمانے کوئی قلندری طریقہ لگا آیا ہے پیراں تے ہتھیں نوں زنجیر مار کے
 دربار الہی وچ پیش ہوونا۔ مطلب کیہ کہ جیویں قیامت نوں میں ملزم ہو کے کھلا ہاں۔ جیہڑا
 نماز وچ بانہاں بھنیاں ہن، ایہہ وی ملزم دا طریقہ ہے۔ سید کڑ زنجیر چالین۔ تلوار ڈھال
 چالئی ہے تے ٹر پیا ہے۔ ہک وہندے سر اُتے آیا ہے، کھوہ تے۔ جھنگار تے لذت
 نہیوں آئی۔ تلاں تے آیا ہے تاں بدبو آئی پس۔ آکھیوس، بلے دے ڈرتوں میں خدا
 دی عبادت توں کنڈکیتی وتنا ہاں تے خدا دا وعدہ ہے زمین اسمان دی ہر شے دی حفاظت
 کرینا ہاں تے میری حفاظت نہیں کر سگدا۔ سدھا لگا گیا ہے دریا دے اُتے جانھاتا دھوتا
 ہے۔ وضو کیے پس۔ پیراں نوں بیڑی لائی پس۔ ہتھیں نوں ہتھکڑیاں لائیں کعبے آل
 مونہہ کیتا پس۔ روند کھلا ہے اپنے گناہواں نوں یاد کر کے۔ اتنے نوں شیر گجیا ہے۔ اللہ

تعالیٰ آہدائے: اپنے ہتھان نال اپنی موت نہ سہیڑو۔ ایہہ موت حرام ہے۔ سید کڑ سٹنے شروع کر دتے۔ شیر بگدا آوندہ ہے۔ دھرکیں لہندا آوندہ ہے۔ تلوار آل شیر نہیں پریتوں دتا۔ کڑتاں اوس سٹ لے پر شیر نیڑے آ گیا۔ شیر بگ ماری ہے۔ گیا ہے۔ ایس نعرہ تکبیر دا ماریا ہے دوشیراں دا مقابلہ ہے۔ ایدے نعرے دی دھروان آوندی ہے، اودے گج دی دھروان آوندی ہے۔ شیر دے کوئی مقابلے تے آوے تاں اوہ کھلا ہو جاندا ہے۔ شیر کھلا ہو گیا۔ ایہہ گشتی دے ونگ جاندا ہا۔ ہُن گشتی شیر تے ایس دی ہے۔ شیر ہتھ ماریا۔ ایس آوندہ ہتھ پنجے کولوں پیا ہے، نہواں توں بچن کان۔ دُوا پنج مارن لگا ہے تے شیر دا اوہ وی نپ کے، شیر دے پیٹھ وڑ کے دھوبی چھٹ ماریا ہے۔ جیویں دھوبی کپڑا چھٹیدا ہے۔ ایڈی پُنج آئی ہے اوس نوں شیر دا اُنچ اُنچ بول گیا ہے تے شیر بے ہوش ہو گیا ہے۔ ایس شیر دے ہتھ پیر چاں کڑے، اوہناں زنجیراں نال۔ تسبیحاں جیہڑیاں رہندیاں ہان اوہ پوریاں کیتیاں تے شہر نوں چا کے لے آندا۔ بادشاہ دی کچہری اگے سٹ کے ایس بھرا نوں جا گایا ہے۔ صبح دی اذان ہوندی پئی ہا۔

منزلاں ایہہ پڑھدے پیٹھن کہ اتوں اپلی بادشاہ دا آیا ہے۔ اپلی بادشاہ دے آکھیا ہے، ”بادشاہ یاد فرما رہیا ہے۔“ سید الیاس آکھیا، ”یار ابے تیک ڈنگل دا وقت ہی نہیں ہویا۔“ اوس آکھیا، ”ڈنگل بادشاہ نوں بھل گئیں۔ شیر مرانو ہے زنجیراں نال کڑیا ہویا ہے۔ بادشاہ دے تخت دے پیٹھ وڑیا بیٹھا ہے۔ بادشاہ نجومی اکٹھے کیتے ہون کہ برا شکون ہے کہ جنگل دا شیر ہے تے بادشاہ دے تخت دے پیٹھ آ وڑیا ہے۔ سید الیاس مسکرا کے بھرا آل ویکھیا۔ اکھ، ”گئے ہائے۔“ اکھ، ”جی آ۔“ رُپے۔ بادشاہ نقیب نوں حکم دتا ہے کہ اعلان کر کہ جیس جوان ایہہ نذرانہ پیش کیتا ہے اپنا ناں لے کے انعام لوے۔ نقیب نوں اگوں آواز کوئی نہیں دیندا۔ بادشاہ آکھیا ہے، ”انعام دا وقت وُجا رہے ہو، اپنا ناں لوو تاں رستم ہند سید تھپدیاں بولیا ہے،“ جناب! بادشاہوں کے دربار میں شیر قید کر کے لانا شیروں کا کام ہے۔“ نعرے وگ گئے۔ اوس آکھیا، ”انعام منگ۔“ سید آکھیا ہے، ”مینوں چھوڑ کے وکھا۔“ پہلوان دا مونہہ بوکے آر ہو گیا ہے۔ بلاں دے نیڑے کون جاوے۔ بادشاہ کچھیا ہے، ”ماجرا کیہ ہے؟“ اوس آکھیا، ”جناب! ایہہ تاں جگہ ہی نہیں وکھا

سگدا جتھے جوان تے شیر دی گھول ہے۔ ایہنوں تاں پتہ ہی نہیں۔“ سید آ کے شیر دے کڑ کھول دتے تے آ کھیوس، ”اکھیائے کجھ نہ، ایہہ ہُن مار نہیں مار سگدا۔“ شیر نُوں چھوڑ دتا۔ بادشاہ آ کھیا، ”پکڑوالیس سُر دے بچے نُوں، جیس میری عدالت دی توہین کیتی ہے جھوٹھ بول کے۔“ پہلوان آ کے سید دے پیراں تے ڈھے پیا ہے۔ ماف کردے۔

بھل گئی آں شیطان بھلائی آں میں

متیں دتیاں بہت نہنگ مینوں

بادشاہ آ کھیا، ”انعام منگ سیدا۔“ اوس آ کھیا، ”جی، ایس پہلوان نُوں ماف کر دیو۔“ بادشاہ آ کھیا، ”چلو، ماف تے پنج ہزار روپیہ تیرے کان انعام۔“ سید آ کھیا، ”پہلوان توہیں مافی منگی ہے تے گوڑ ماریا ہے توہیں انعام دے مگر۔ انعام توں لے لے۔“

بادشاہ آ کھیا، ”سید ایاس، بھرا تیرا پاس ہے تے ہن گھلینا ہاں۔“ بادشاہ حکم دتا ہے ہراول دی فوج چوں ہزار جوان تیار ہو جاوے ایہناں دے نال۔ بادشاہ آ کھیا ہے، ”جیہڑا حکم سعد اللہ خاں دیوے اوہ میرا حکم سمجھیا۔“ اللہ نُوں سوچے او۔“ ”سعد اللہ“ اکھے، ”جی۔“ ”ویندیاں ایران دے بادشاہ پچھنا ہیں سفیر۔ توں آ کھیں، جی میں۔ درباری آدمی ہیں، بادشاہ دے نال گل بات کر سگدا ہیں۔“ ایہہ جناب ٹر پئے۔ قندھار توں ایہناں پیغام گھلیا ہے، باڈر تے فوجاں پٹھین، اسیں چار جوان لئی آوندے ہاں تے ہزار فوجی اساڈے نال۔ اسانوں اجازت ہووے۔ بادشاہ وزیر نُوں حکم دتا ہے کہ ایہناں دا استقبال کر۔ توپاں دی سلامی کیتی گئی۔ عزت نال پیش کیتے گئے۔ شاہی باغ وچ تمبون نصب ہاں۔ ایہہ اوہناں نُوں جاوڑے۔ اوہناں تمبواں نُوں ایہہ پنچے ای ہن کہ اودوں کھانے آ گئے۔ سعد اللہ خاں پہلا حکم ایہہ دتا ہے کہ جیس ویلے میں کھانا بند کراں، ہر کوئی بند کر دیوے۔ تھوڑا جیہا کھا رہن تاں سعد اللہ خاں کھانا بند کر دتا۔ مطلب کیہ بھئی اسیں ہووے ملک تے آب و ہوا توں آئے ہاں بیمار نہ ہوویے۔ اسان جیہے کوڑی گئے کہ کھاوون کجھ نہیہوس دتا۔ جیہڑے ویلے کھانا کھا رہن تاں ایرانی لگے آئن کہ تہانوں ایران دی سیر کروانی ہے کہ بادشاہ حکم دتا ہے۔ نوشیرواں دے محل وکھائے گئے۔ جمشید دی جلوہ گاہ وکھائی گئی۔ اٹھ دیہاڑے ایہناں نُوں سیر تے ہو گئے۔ اٹھویں دیہاڑے ایہناں نُوں حکم ہو یا ہے کہ صبح آ

کے بادشاہ دا سلام کریں۔

دربارِ وِج حاضری دتی ہے۔ ایران دے بادشاہ پچھیا ہے ”خطرِ نَج باز کیہڑا ہے؟“ سعد اللہ خاں آکھیا، ”جی میں۔“ ”چابک سوار کیہڑا ہے؟“ سعد اللہ خاں آکھیا، ”جی میں۔“ تہاڑے وچوں تیر انداز کیہڑا ہے؟“ اکھے، ”میں۔“ تاں دربار سارا حیران۔ بادشاہ پچھیا ہے، ”ہند وِج ہور بندہ کوئی ناہی۔“ سعد اللہ خاں بولیا، ”ایہہ تاں اساڈا گھردا سوانج ہے کیہنوں کدے گلنا ہے؟“ ”پہلوان کیہڑا ہے؟“ اکھے، ”جی سید عمر۔“ اوہ اُٹھی کے کھلور ہیا۔ ”ہلا، وت دھمی اپنا پہلوان تیار کرو۔ گھول ہوسی۔“ اودوں بھیریں کُٹ گھتی ہوئی ہے۔ ایہہ ہزار بندہ اُٹھی کے پیٹھن۔ دل کجھ بھیرتا نیں۔ خدایا، خیر کریں مکاں دے متھن۔

سعد اللہ خاں پچھیا ہے، ”سید کدے؟“ اوہناں آکھیا، ”نماز پڑھ کے سُتا ہویا ہے۔“ سعدا لے پٹ اُٹھایا ہے۔ ”بھیریا! بھیریں تیرے سرتے ہن تے تینوں نیندراں یاد ہن۔“ اوس آکھیا، ”کیہ کراں؟“ اوس آکھیا، ”گھل کسے نال۔“ اوس آکھیا، ”تہاڑا تاں گڈا بنھ کے میں دریاوے وگا چھڈنا ہے۔“ اکھے، ”ڈنڈ پیٹھکاں کڈھ۔“ اوس آکھیا، ”دیو بھرے گھول ہے ہی کائی نہ۔ تسیں اٹھ دیہاڑے سیر کریندے وتے ہو، میں تہاڑے نال نہیں نا آیا۔“ اکھے، ”نہیں۔“ اکھے، ”میں پہلواناں دیاں پڑیاں ویہدا وتیا ہاں۔ ایران دے پہلوان سارے چُٹ کے دیکھن۔ اتھے تاں ماں جایا ہی کوئی نہیں، جیس میرے نال پنجہ ملاونا ہے۔“ حیران ہو گئے پردل نہ منے۔ صبح دا وقت ہک پاسے ہزار بندہ ہے تے ہک پاسے پورا ملک۔ پہلوان ایران دے کنیں ڈنڈوں پئے کڈھن۔ کنیں پیٹھکاں پئے کڈھن۔ گھیہاں پئے دیندن۔ ہتھاں دے بھار بُردے ودن۔

بادشاہ آکھیا، ”یار ہندی پہلوان اساں نہیں دیکھیا۔“ سید اُٹھیا ہے اکھے، ”جی میں آں۔“ ”چوتا کیوں نیہوں ماریا۔“ اوس آکھیا، ”جی میں ہمیشاں چوتے وِج ہوندا ہاں۔“ بادشاہ آکھیا، ”مڑا تار۔“ اوس آکھیا، ”جی میں پہلے چچھوں ہاں میری گھول کیہدے نال ہے؟“ بادشاہ آکھیا، ”ایہہ سبھ پٹھے ہن، شاگرد ہن۔ ایہہ رستم ایران کھلا ہے۔“ اکھے، ”رستم ایران۔“ اکھے، ”جی۔“ ”کتنی ہک طاقت دا مالک ہیں توں؟“ اوس آکھیا، ”میری

طاقت دانتوں پتہ لگسی۔ جیس ویلے میں تیرا ہتھ گھوٹیاں تے بانہہ تیری سیں جاسی۔“ سید آکھیا، ”نہیں، میں پہلواناں دے وچ ہاتھی ہاں۔ ہاتھی بیڑے چڑھن لکیاں ہک لت رکھ کے تڈ مریندا ہے کہ بھئی بھار سہندا ہے کہ نہیں۔ دُوا رکھدا ہے مُرتڈ مریندا ہے۔ تریپیا رکھدا ہے مُرتڈ مریندا ہے۔ جیس ویلے تریپے دی تڈ سہہ جاوے مُرتڈ چوتھا رکھدا ہے۔ میں دی ہاتھی ہاں پہلواناں وچ۔ تیریاں ماواں بھیناں ہوسن، بھرا بھائی ہوسن۔ جیس نُون میں ہتھ ماراں اوہ اُٹھیا کدی نہیں۔ پہلے توں تے میں طاقت ازما لینے۔ پکی کدھ ہے بادشاہ دی کچہری دی۔ توں تیر مار جے پکی کدھ وچ جاوے ٹھک تیرا تاں توں میرے نال پنچہ ملاویں۔ میں ٹھوک وکھساں۔“ ایرانیاں تاڑی چاں ماری ہے۔ اسانوں دھمکیاں نال ڈراؤ ہے۔ سید آکھیا، ”دھمکی تاں ہوئی جے وچوں کوئی وِتھ ہووے۔ پہلا وار ہے تساڈا۔ ایہہ تیر وگائے وت میں ٹھوک کے وکھساں۔“ بادشاہ آکھیا، ”ٹھیک ہے۔“ اوس تیر ماریا جھرتوں کر کے ڈھے پیا ہے۔ سید آکھیا، ”تیر کمان دیوے۔“ ایرانیاں حرکت کیتی ہے۔ اوہناں ہک سخت کمان تے تیر آکھیا ایہلا۔ سید نچن لگا ہے سعد اللہ خاں آکھیا ہے، ”رکھ چاں۔ اسیں اپنی تیر کمان ورتیندے ہاں۔“ ”کیوں؟“ سعد اللہ خاں آکھیا، ”سخت کمان ہے ایہدا چلا نہیں چڑھنا۔“ تیر انداز تیر اندازی کر لین ہا تاں ترائے ول کمان دے لاہ رکھدے ہان، جیہڑے ویلے تیر اندازی دا وقت آوے ہاوت ترائے ول دیندے ہان۔ اوہ دیونے پوندے ہان بھئی ہک پاسا کمان دا استھے رکھیا گردن نال، دُوئے ہتھ نال لپھا کے منڈ دتی۔ اوہ جیس دیہاڑے دی خزانے وچ آئی ہا، اوہدا چلا چاڑھیا وی کسے نہ۔ اوہ اتنی سخت کمان ہا۔ ایہہ تیر انداز ہا سعد اللہ۔ ”اسیں اپنی کیوں نہ ورتیے۔“ اوس آکھیا، ”نواب صاحب! اپنی طاقت تے پیا بھلنا میں۔ جے میتھوں چلا نہیں چڑھنا تاں میں پکی کدھ وچ تیر کیوں ٹھوکنہا ہے۔“ سید گوشہ کمان دا گردن نال لایا ہے۔ دُوئے ہتھ نال جیس ویلے چھکی ہے تاں چوگردوں کڑکی ہے۔ ترائے ول ایس دتن۔ جیہڑے تیر انداز ایران دے بیٹھے ہان، اوہناں دی ہا کر نکل گئی ہے۔ بادشاہ آکھیا، ”کیہ گل ہے؟“ اوہناں آکھیا، ”اساڈا پہلوان مر گیا ہے۔ جد دی ایہہ کمان آئی ہے ایس دا چلا اج چڑھیا ہے۔“ سید تیر بھرایا ہے چلے دے وچ۔ گوڈی دبائی ہے۔ نعرہ تکبیر دا پڑھ کے جیوں تیر چھڈیا ہے

تاں جیسی اٹ ٹوں لگا اوہ ڈک کے باہر جا پئی ہے۔

لڑائی ویکھ حیدر دی، نبی قربان ہوندا ہا

جیسی ویلے کوئی کم حد توں ودھیک ہو جاوے تاں دشمن ٹوں وی داد دیونی پوندی ہے۔

سارے دربار وچ سید زندہ باد، سید زندہ باد، بادشاہ دنگ۔

بادشاہ آکھیا، ”سیدا! اساڈا پہلوان تاں یقین ہے تیرے نال گھل نہیں سکدا۔

توں ایہہ دس کہ جن ہیں کہ انسان، اتنی طاقت۔“ سید آکھیا، ”جی، جن تے انسان دے

اگے شے کائی نہیں پر انسان اوہ درجہ رکھدا ہے جیسی ٹوں ملائک سجدہ پئے کریندن۔ چار

اصول ہن طاقت دے بادشاہ سلامت۔ پہلا ہے صحت، اج تائیں میرے وجود وچ کسے قسم

دی مرض نہیں۔ دوا خوراک اوہ وی اللہ پاک دتی ہے۔ ترییا ہے اپنے آپ ٹوں ڈکنا۔

اج تائیں مینوں عورت دی لذت دا علم نہیں کہ عورت وچ لذت کیہ ہے۔ ایہہ ترائے

چیزاں ہورناں پہلواناں وچ وی لہہ پوسن۔ چوتھی ایہناں دے اج کائی نہیں۔ جتھوں کچھلی

رات ہووے بستر تے میرے واسطے سنونا حرام ہے۔ میں رب دی بارگاہ وچ کھلا ہوندا

ہاں۔ ایہہ چوتھی چیز ایہناں وچ کائی نہیں۔ کسرت کریندے رہسن۔ جیسی خدا ٹوں یاد

کریناں، اوہ مینوں ایہو جیہاں توں ڈھبیدا ہے۔“ بادشاہ آکھیا، ”اسیں من گئے ہاں،

ایہہ میدان تہاڈی جت دا ہے۔“ سعد اللہ خاں گُرسی توں اٹھیا ہے۔ اوس آکھیا، ”نہ

جناب، پنچھی ہزار تاوان ادا کرنا پوسی یاں بندہ مرواؤ۔ ایویں اسیں آئے ہاں تے وت لگے

جاویئے۔“ بادشاہ آکھیا، ”پہلواناں او! تہاڈے خرچے وی بھراں، تہاڈے ٹبراں دے وی

بھراں تے جتھے گھل نہ سکوا تھے چٹی کان وی میں ہاں۔ ایہہ استاد مروائیو یاں پنچھی ہزار

ادا کرو۔“ پہلواناں پنچھی ہزار ادا کر کے، لکھ وٹیا جٹی جوں جٹ گھر آیا۔

اوہناں دی رات غماں چ پٹی۔ ہند آ لے خوش ہن۔ فجر بادشاہ حکم دتا ہے،

”ہاں بھئی اپنا سوار کڈھو۔“ مقابلہ سواراں دا لگ گیا ہے۔ سوار ایران دا چڑھیا ہے بادشاہ

دے گھوڑے تے۔ اوس ترپ چ اٹھایا ہے سرے میدان دے تائیں ترپاں چ لگا گیا

ہے۔ اودوں ہٹایا ہے ترپاں چ لگا آیا ہے۔ سعد اللہ خاں چڑھیا ہے۔ ایس ملاک رکھیا

ہے۔ ایس سرے توں اوس سرے تائیں۔ اوس سرے توں ایس سرے تائیں۔ بادشاہ

آکھیا، ”اساڈے سوار ترپ لوان تے توہیں مہاراجیاں آریویں ملاک چھڈیا ہے۔ ایہہ کیہ کیتوئی؟“ اوس آکھیا، ”جی ترپ تے الف سوار ہوندا ہے۔ ایہہ بال لویندن۔ مُلکاں دا متھا ہے۔ اخبارات پچھانہہ جا رہن شاہ جہاں بادشاہ کول۔ مینوں شرم آندا ہے۔“ بادشاہ آکھیا، ”توہیں کیہ وکھرا کیتا ہے؟“ اوس آکھیا، ”میرے گھوڑے دے کسب دا پتہ لکسی ایہدے گھرے ویکھو۔“ گھرے ڈٹھن تاں معلوم ہوندا ہے کہ اک واری گھوڑا گیا ہے تے ہک واری آیا ہے۔ سُن ب دے وِچ سُن ب ہے۔ بادشاہ سر ماریا ہے۔ اوس اپنے اسوار ٹوں آکھیا، ”کیہ کیتا ہئی؟“ اوس آکھیا، ”جی ایہہ کاہلا پیا ہے تے ایس سرے آلا کم وکھایا ہے۔ میں سرے آلا تہ وکھینا ہاں جے گھوڑے بُردو بردی۔ گھوڑا لینا دیونا۔ سعدالے آکھیا، ”ٹھیک ہے۔ تیرے پٹھ بادشاہ دا ہے میرے پٹھ اپنا ہے۔ جے دے گیوم تاں اپنا۔ جے لے گیوم تاں بادشاہ دا۔ دکھا سرے داکم۔“

اوس کھوہ توں کاٹھ رکھا چوا چھڈیا ہے۔ کھوہ دے اتے ہک لکڑ ہوندی ہے، جیہدے اتے نساہ ہوندی ہے۔ اوہنوں جھل سدیندن۔ جھل کھوہ دے اتے ٹور کے اوس گھوڑا لکھایا ہے۔ ایرانیوں یقین ہے کہ ہند آ لے ایس کم دا جواب نہیں دے سکدے۔ تاڑیاں وگ گنیاں۔ واہ واہ پئی ہووے۔ سعدالے خاں آکھیا، ”ایہہ مُر ٹپائے۔“ اوس آکھیا، ”اگے نہیں ٹپایا۔“ ایس آکھیا، ”اگے ٹپ گیا ہے ہُن میں مقابلہ کرنا ہیں۔“ اوس جھل تے گھوڑا چاڑھیا۔ اگوں ایس وی چاڑھ دتا ہے۔ گھوڑے دوویں ساہن اوہناں کن وٹے۔ ایرانی اسوار آکھیا، ”بیڑا بوڑیندا پیا ہیں۔“ ایس آکھیا، ”بیڑا توہیں بوڑیا ہے۔ ایہہ موت داکنواں ہے۔ ایہہ کسب شروع کیوں کیتا ہئی۔ ہاں راہ دے یاں راہ لے۔“ ایرانی بولیا، ”گھوڑا پچھانہہ ہٹائیں تاں وِچ ڈھندا ہے۔ جے اگانہہ کراں تاں اگوں تیرا گھوڑا کھلا ہے۔ راہ کدوں؟“ اکھے، ”مُڑ میتھوں راہ منگ۔“ اکھے، ”توں دے۔“ ایس گھوڑے ٹوں بدھا ہے۔ گھوڑے اگلیاں دوویں گوڈیاں سینے نال لائیاں ہوئیں۔ چتر گروں تھر تھر پئے کریندن۔ ناس دے پھر لاٹ پئے آوندن۔ ویکھن آلیاں دے دل دھک دھک پئے کریندن۔ ہر شے وِچ جاوئی ہے۔ گھوڑے ٹوں اوس پچھانہہ ہٹاونا شروع کر دتا۔ پچھلے پیراں تے ٹول ٹول کے گھوڑا پیر پچھانہہ رکھدا ہے۔ گھوڑا لہہ

آیا۔ بادشاہ آکھیا، ”کل پہلوان دا تاوان۔ اج پُنجھی لکھ دا میرا گھوڑا دتا ہے۔“ اوہناں آکھیا، ”جی ادھ گڈھیں چڑھ جساں۔ ساویں ہو جاسی۔ اے دو کم جوں رہندن۔“ جیہڑا نمانا ہرن لگے ہمیش اوہ ساویں آل تا نگھدا ہے۔

تیر اندازی دا مقابلہ شروع ہو گیا۔ ایران دے تیر انداز آگن۔ اوہناں کاغذ پکی کدھ نال لایا ہے۔ ہٹ کے بہہ رہن تے تیر وگاؤن لگ پین۔ اوہناں کاغذ چُٹھ چُٹھ کے مور دا نقشہ بنایا ہے۔ اکھ، نک، چُٹ، پورا مور جیویں پائل پائی کھلا ہے۔ ایہہ پک ہا اوہناں نُوں کہ ہندی ایس کم دا جواب نہیں دے سکدے۔ سعدا لے آکھیا، ”ہک کاغذ ہوو لے آؤ۔“ بندہ ہک ہے۔ تیر وگائے، لگے تاں کاغذ وچ پر کوئی پٹھاں کوئی اُتار نہ۔ کوئی کئی تے۔ اوہ تاڑیاں مرین بھی مور پیا بندا ہے۔ جیس ویلے سارا کاغذ چُٹھ رہیا ہے تاں ایران دے بادشاہ آکھیا، ”نے چیل نے مرغی۔“ جتھوں اکھان بنیا ہویا ہے نہ ہل نہ لگڑ۔ سعدا لے خاں آکھیا، ”جی مورت بناون آلے نُوں آکھیا جاونہ ہے ایس وچ جند گھت تے ایس دے بدلے اوس دوزخ وچ جاونہ ہے۔ میں سورۃ فاتحہ لکھی ہے کوئی صاحب پڑھنا چاہوے تاں پڑھ لوے۔“ تکیا نیں تاں سورۃ لکھی ہوئی ہے۔ تیر اندازاں تیر سٹ چھڈے۔

بادشاہ آکھیا، ”اگے ہن تائیں کمییاں تے وجدارہیا ہیں تے ایدوں ہن شطرنج باز میں آں۔“ شطرنج شروع ہو گئی۔ کھیڈ دیاں کھیڈ دیاں ساویں تے آکے کھیڈ ختم ہو جاوے۔ مُڑ مُڑھوں۔ بادشاہ دل وچ خیال کرے کسے چالوں میں تھوڑا کھلا ہاں ساویں جوں میں کرینا ہاں میں جتیندا کیوں نہیں۔ چار مہینے لگھ گئے بادشاہ شطرنج کھیڈا تھک جاوے تاں محلاں آل لگا جاوے تے سعد اللہ خاں اپنے تمبواں آل۔ صبح مُڑ شروع۔ بادشاہ رات نُوں ستا ہویا جا گیا ہے۔ شطرنج بازی چھت تے بنی ہوئی ہائی، سبق یاد کرن کان۔ بادشاہ سوچیا اوہو، میں بڑا چکا کھلا ہاں۔ میں پیادہ ہٹا کے سوار لگھائیں تاں اوہدا بادشاہ میں مار سگدا ہاں۔ ”سنتری۔“ اکھے، ”جی۔“ اکھے، ”نواب نُوں جا آکھ ہُن میرے نال کھیڈے۔“ نواب آکھیا سنتری نُوں، ”میں کپڑے وٹا کے آوندا پیا ہاں۔ بادشاہ نُوں میرے سنیہا دے چھوڑیں۔“ ”کیہڑا؟“ اکھے، ”بادشاہ نُوں آکھیں پیادہ وی ہٹاؤں ہیں

تے سوار وی لگھاؤ ہیں۔ دو واراں تینوں کا ہیں لین دیونیاں ہن۔ ایہو پیادہ ہی تیرے بادشاہ ئوں بچائی کھلا ہے۔ پیادہ پٹیسیں بادشاہ اگوں مری جاسی۔ واراگوں میری ہے۔ اپنی گوئی کھیڈنا ہیں میری وی چاں کھیڈ۔ دو واراں لئو ہیں۔“ سعد اللہ دربارئوں وڑیا ہے تاں بادشاہ بازی مودھائی بیٹھا ہے۔ ”ایہہ کیہ ہے؟“ اوس آ کھیا، ”جیہڑا میں چالا ساری رات سوچیا ہے توہیں او تھے پیٹھیاں دس دتا ہے۔ معلوم ہو یا تیری میری کھیڈ کا ئی نہیں۔“ سعدا لے آ کھیا، ”توں شطرنج جاندا ای نہیوں۔ ساویں تاں توں کرینا ہیں۔ میں صرف تیری وارا کیندا ہاں جے میں واراں ہاں تاں توہیں صرف گھنٹے وچ مری جاونا ہا۔“ بادشاہ آ کھیا، ”مڑ جتیا کیوں نہیوں؟“ اوس آ کھیا، ”تیتھوں جتے تاں شاہ جہاں جتے۔ توں بادشاہ ہیں۔ میں جان کے تیری بے عزتی نہیں کیتی۔“ بادشاہ اٹھی کے ہاں نال چاں لایا۔ ”جے میری بے عزتی کریں ہاں چاں تاں میں ہیرا چٹ کے مر جاونا ہا۔ ہن توہیں جتیا تے میں ہاریا۔ توہیں مینوں کوٹھیاں کر کے نہیں ہاریا۔“

بادشاہ ئوں ارمان کھا گیا۔ بادشاہ سوچیا، چلو جان دے چور دی پگڑی سہی۔ کوئی نقص ایس دا پکڑیوے ہا۔ انجیں ہسدا نہ جاوے۔ ہندیاں دے ہزار فوجیاں چوں اوس ہک دا عقل کڈھیا۔ ایہدا نقص دس چاں۔ ہزار روپیہ لے لے۔ ہندی نما نے مردن ایس گل تے۔ ”ہزار دیسیں؟“ اکھے، ”ذیباں۔“ اکھے، ”ایہنوں قلم گھڑن دا ول نہیوں آوندا۔“ آوندا ای ناہس۔

گھر بھیتر دہینسر ماریا، سڑ لنکا جائے

بادشاہ سوچیا، بڑا نقص ہے۔ ایڈا عالم تے درباری بندہ۔ شوا شے۔ بہت اچھے۔ بادشاہ قلمدان خالی کروا دتے۔ فجر میں آ کھنا ہے قلم گھڑ دے۔ سعد اللہ خاں ئوں خیال آیا۔ جیس دن دی میں بازی جتی ہے بادشاہ میرے کھاون، پیون، بھاون، پہنن، پڑھن تے پیٹھن تے چھاپے مرویندا ہے۔ مت مینوں چاں آ کھے قلم گھڑ۔ میں کیہ کریاں۔ سوچیوس، ہُن چاں ول سکھاں۔ تلوار توں چاقو دا کم لینا شروع کر دتا۔ کبیریاں کڈھ سٹیاں ہن تے تیراں توں کانیاں دا کم۔ ساری رات گھلدا رہیا ہے۔ فجر قلم گھڑ کے نماز پڑھی ہے۔ دھمی بادشاہ آ کھیا، ”نواب صاحب۔“ اکھے، ”جی۔“ اکھے، ”اج تہانوں اجازت دینے ہاں۔“

پر چھلا نشانی یار دی، چچی والا منگ
 اک اپنے ہتھ دی قلم گھڑ کے دتی جا۔ کدی یاد کر ہسائیں۔“ دلی آ لے بھیڑے پے
 گئے۔ ایس کوئی پھوڑا گھڑنا ہے تے اساڈی بے عزتی ہوونی ہے۔ ایس قلم گھڑ کے بادشاہ
 ئوں دتا ہے تاں بادشاہ دارنگ بھیج گیا۔

اوس آ کھیا، ”دلی دے بندے تاں چنگے ہان پر گھوڑے بڑے ہن۔“ سعد اللہ
 خاں سمجھ گیا۔ اوس آ کھیا، ”جیس آ کھیا ہے نا قلم گھڑن دا ول نیہسوں آ وندا، اوس گھوڑ نہیں
 ماریا۔ جا فلانیا، میرا ترکش چالے آ۔ ایہہ وکھ لوو۔ قلم گھڑیاں ہونییاں تے ساری رات
 میں سکھدا رہیا واں۔“ اوس آ کھیا، ”بھئی من گئے ہاں۔“ سعدالے آ کھیا، ”جے من گیا
 ہے تاں جیہڑا کجھ اوس ئوں آ کھیا ہئی اوہ دے۔ اوہ پیسہ جوں ہند دا ہے ایران ئوں تاں
 اسیں چکن نہیں دیندے۔ اگانہہ اسیں اوہنوں سزا دیسائیں یاں چھڈ دیسائیں۔“ بادشاہ
 آ کھیا، ”اوہ منگے۔“ نواب آ کھیا، ”منگو۔“ پرایہہ لعنت کھٹے کون۔ نواب سعد اللہ خاں اٹھیا
 تے لوکاں دیاں چھاتیاں تے ہتھ رکھنا شروع کر دتا۔ جدوں دن آ لے دی چھاتی تے ہتھ
 رکھیا تاں اوہ دھڑ دھڑ پئی کرے۔ اکھے، ”توں ہاؤں۔“ اکھے، ”جی آ۔“ ”بادشاہ کیہ آ کھیا
 ہائی؟“ اکھے، ”ہزار روپیہ۔“ اکھے، ”اٹھی ہزار لے لے۔“

ٹرن ویلے ایران دے بادشاہ سعد اللہ ئوں بڑے انعام دتن۔ اوہ سے پیسے نال
 چنیوٹ وچ مسجد بنوائی پیس۔ جدوں ہٹ کے ہند اپڑے تاں شاہ جہاں بادشاہ اوہنوں ہند
 دا وزیر اعظم بنا چھڈیا ہے۔

بھور سلطان

ایہہ غیرت خان پٹھان بیرمی نسل دا ہے۔ غیرت خان اعظم خاں دا، اعظم خاں خانخانے نواب دا ہے۔ ایہہ نسلی پٹھان ہون تے نمک حلال ہون۔ جتھے مغل دا پسینہ آیا ہے ایہناں خون وتا ہے۔ ایہہ غیرت خان جرنیل ہا شاہ دارے دا۔ ایس دا بڑا خطرہ ہا اورنگ زیب نوں۔ جیس میدان وچ ایہہ ہویا نا اوہ میدان مینوں مہنگا پونا ہے۔ اورنگ زیب چال چلیا ہے۔ خاٹی ہک تیار کیتا پیس۔ اوہنوں خط لکھ وتا پیس کہ اورنگ زیب آہندا ہی میں تیتھے بڑا راضی ہاں کہ توں میری اندرونی بڑی امداد کر رہیا ہیں تے میں فتح یاب ہو رہیوم تاں تینوں بڑے انعام کرن۔ اوس ایلچی نوں آکھیا کہ ایس طرز دا چل کہ توں دارے کول پکڑیا جاویں تے ایہہ خط تیرے کولوں ثابت ہووے۔ بہوں ڈوگھی چال ہے۔ اوس جوں پپونا ہا۔ اوہ ایسا ہو کے ٹریا جوں اگلیاں نوں شک پیا، اوہ نپیا گیا۔ خط جوں تکیا تاں دارے آکھیا، ”ہائے۔ میں تاں ایس توں ہر دا کھلا ہاں۔ غیرت خان اودے رل گیا ہے۔“ غیرت خان توں ہر شے کھس لئی تے آکھیا، ”نکل جا۔“ غیرت خان اخیر تائیں آہدا رہیا وچ کوئی وٹ لگا کھلا ہے تے تینوں وی غلطی پئی لگدی ہے۔ میرے تاں خون وچ ایہہ نہ ہویا کہ ہک لائے ہووئے تے دُونے پاسے رل جاویئے۔ اوس چک کڈھیا۔

جے سنگھ راجپوت نال جنگ ہوئی ہے اورنگ زیب دی۔ جے سنگھ میدان ہر گیا۔ جے سنگھ دھروڑ کے بیجاپور جا وڑیا۔ رانی پچھیس، ”جے سنگھ! میدان دی کیہ کھٹی؟“ اوس آکھیا، ”میدان ہر گیا۔“ اوس آکھیا، ”غیرت خان؟“ اکھے، ”بادشاہ کڈھ چھوڑیا

ہائی۔“میدان تیرے سر تے ہا؟“ اکھے، ”ہا۔“ عمر ساری اوس عورت خاوند نال گل نہیں
 کیتی کہ ایڈے بے غیرت مردنوں اپنی عزت پیش کراں تاں میں وی کوئی راجپوت دی
 لڑکی ہاں۔ نہیں۔

راجپوت وہی جس کی آنکھ میں شرم ہے
 راجپوت وہی ہے جو صاحب دھرم ہے
 راجپوت وہی ہے جو منگت کے آگے پٹ ریشم سے نرم ہے
 راجپوت وہی ہے جب میدان دیکھے تو گرم ہے
 عمر ساری اوس رانی، اوس راجپوت نال گل نہیں کیتی بھئی توہیں میدان کیوں چھوڑیا ہے
 تیری لاش تے اوتھے لکھنی ہائی۔ میدان فتح ہو گیا۔

غیرت خان دے نال ہک نوکر ہے۔ دینہہ رات اوہ گھوڑے دے اُتے ہن۔
 ہمالیہ پہاڑ وچ ایہہ دھکے کھاندے ودن۔ اٹھ پہر گزر گئیں نہ کوئی میوہ جنگل دا لدھا ہے نہ
 کوئی شکار لدھا ہے۔ ایہہ بھٹکھن۔ اچانک ہرن آگوں اٹھیا ہے۔ غیرت خان تیر ماریا ہے
 ہرن ڈھے گیا ہے۔ ذبح کیتا نہیں۔ اوہنوں مڑ سیخاں تے پونیا نہیں۔ مڑ اوس نوں بھٹنا
 نہیں۔ پہلی سیخ اٹھا کے ایس نوکر آل کیتی ہے تاں بگل چوگردوں بولن۔ اورنگ زیب آواز
 دتی ہے۔ غیرت خان توں فوج دے نرغے وچ آچکا ہیں تے چوگردوں تینوں گھیرے ن۔
 جیس پاسے میں بولیندا کھلا ہاں ایدے آجا نہیں تاں ہور دے چدے نکلسیں مری جاسیں۔
 غیرت خان نوکر نوں آکھیا، ”کھا۔“ اوس آکھیا، ”موت سر تے بولی کھلی ہے کھاواں کیہ؟“
 اوس آکھیا، ”میتھوں نہیں کھا جدا۔“ آواز آندے رہن۔ پٹھان کھاندا رہیا ہے۔ سالم ہرن
 کھا کے پٹھان اٹھیا ہے۔ لے پٹھان آکھیا ہے، ”میں پیا ہوں ویندا، جیہڑے ویلے میں
 اورنگ زیب دے کول ہے جاونا تاں میرے مارے دا ایہہ نشان ہئی بھئی دھونسے تے
 سٹ لکسی۔ بگل وچسن۔ عیداں منائیاں جاسن۔ ساری فوج میری لاش تے آونا ہے۔
 توہیں مڑ چدے نکلنا ہے نکل جاویں۔ گھوڑا کول ہئی تے جتنے تائیں بگل شادیانے نہ وچن
 اُتنے تائیں کدائیں نہ نکلیں۔ جے میں زندہ رہیوم تاں تینوں استھائیں ملساں۔“
 اگانہہ آیا ہے تاں اورنگ زیب کھلا ہے۔ سپاہ کول کھلی ہے۔ سپاہیاں آل مونہہ

کر کے آکھیا پِس، ”السلام علیکم۔“ بادشاہ آکھیا، ”مینوں سلام کیوں نہیوں دتا؟“ اوس آکھیا، ”جی! میں دارے دا نمک خوار ہاں۔ دارے دے قاتل نوں میتھوں سلام نہیں دپدا۔“ بادشاہ آکھیا، ”مڑ غیرت اپنی دا ثبوت تاں کوئی نہ دتوئی۔ غیرت خان انجیں ناں ہئی۔“ اوس آکھیا، ”ثبوت کداں دے لئیں ہاں، بادشاہ دارے دا قاتل میں اج پیا ویدھا ہو یوم۔ اگدوں ثبوت کیہڑا دیواں۔“ تلوار لے کے وجیا ہے۔ کئی بادشاہ دے جیوں ڈھاہ لئن، کئی کھپیوں ڈھاہ لئن تے باقی دے بھج گئیں۔ اوس ویلے بادشاہ تے وجیا ہے تلوار لے کے۔ تلوار اُلا ر کے پچھانہ سٹ گھتی پِس تے روون کڈھ ڈڑھا ہے۔ بادشاہ اورنگ زیب آکھیا ہے بھئی انج تلوار اُلا ر کے پچھانہ سٹئی تے روونا، ایہدی وجہ سمجھا۔ اوس آکھیا، ”تلوار اُلا ری ہام تینوں مارن کان، میری فطرت آواز دتا ہے کہ توں بیرم خانی نسل دا ہیں تے عمر ساری اسماں مغلاں دے خون دی حفاظت کیتی ہے تے تیرے ہتھ چوں خون مغل دا وہنا نہیں چاہیدا۔ کیوں جو اورنگ زیب جیہا مغلاں وچ ہے کوئی نہ تے روایں توں پیا ہاں کہ جیس ویلے توہیں میرے آل ڈٹھا ہے تیری اکھیں دی بھانور شاہ دارے آر پئی ہے۔ اوہ یاد آیا مویں۔“ اورنگ زیب آکھیا ہے بھرا مار بیٹھا ہاں تے تیتھوں مانی منگنا ہاں۔ تینوں میں وڈا عہدہ دینا ہاں تے توں میرے کول آجا۔ اوس آکھیا، ”نہ توں میتھے وِس۔ پتہ ای میں پٹھان آں۔ اج میرے عقل کم کیتا ہے بھلکے نہ کر لئی۔ وِس ای نہیں توں میتھے۔ میں تیرے کول رہ سگدا ای نہیں۔ توں دارے دا قاتل ایں۔“ اوتھوں ہٹ کے نوکر کول آیا ہے۔ آکھیوس، ”ایہہ گھوڑا تے ایہہ سامان ہر شے تیری تے اسیں گیا سے۔“ ”کدے؟“ اکھے، ”ایہا تاں دسی نہیں۔“

ایہہ چلدا چلدا اُچ بلوط جاوڑیا ہے سندھ اُچ۔ ست اُچاں ہن بخاری اولاد حسین دیاں۔ پہلی اُچ بلوط ہے ستویں شاہ جیونا ہے۔ بلوط دے وچ اودوں سید زین العابدین قطب کمال ہوئیں۔ اوہناں دی جا کے بیعت کیتی پِس۔ اکھے، ”ناں کیہہ ہئی؟“ اکھے، ”بھور سلطان۔“ بھور آپ بنیا ہیں تے سلطان دارے نوں بنایا پِس۔ ایہہ مڑ فقیری سکھن لگ پیا ہے۔ بھوئیں تے سنوئا، ذکر سکھنے تے پین دا گڑ کھاونا۔

ہک دیہاڑے پیر توں پچھوئیں۔ جٹ بندے میں ویہنداں ہک ہک ہوندن

تے وگ چھیڑی ودے ہوندن تے تہاڈے تریہہ درویش ہمیشاں گائیں نال چھڑدن۔ کتاباں ہتھ وچ تے گائیں اگے۔ ایہہ کیہ وجہ ہے؟ چاریاں پنج چھیڑو ہو جاوے۔ پیر آکھیا، ”جی شیر مراٹو پوندا ہے۔ اوس جال کیتی ہوئی ہے۔ کدی کدی کائی گاں ماروی ویندا ہے پر چوکھڑے ویکھ کے کجھ جھکدا شکدا وی ہے۔“ ”جال کتھے کیتی ہوئی پس؟“ اوہناں دسیا، ”جی، فلائی تھاہے۔“ بھور سلطان آکھیا، ”دیو بھرے میں چھڑساں۔“ گائیں ہکیاں۔ چک رکھیوس۔ دیگر کول بھانڈے آگئے بھئی گائیں آونا ہے پر گائیں تاں کوئی نہ آئیاں۔ شام دیاں اذاناں ہو گئیاں پر گائیں کوئی نہ۔ وچھیاں رڈاٹ گھتے ہوئے۔ حال حال۔ سوتے دیاں بانگاں مل گئیاں۔ جیہڑا آوے، ”پیر جی! کدو نہہ دا ہا گائیں وی لے گیا۔“ پیر آکھے، ”اجیہا ہاتاں نہیں عقل تاں نہیں مندا، بندہ تبدیل ہوندیاں کیہڑی ڈھل لگدی ہے۔“ ”کچھلا سوتا ہو یا ہے تاں گائیں رڈ دیاں وڑ پیناں۔ لے بھئی گائیں تاں آ گئیاں پر پیہ نہیں اوہ غریب کدے گیا۔ تکیونیں تاں بھور سلطان ہے تے شیر دی لاش مگراں تے سٹی ہوئی ہے تے پیر دے اگے آن سٹیوس۔ آکھیوس، ”ہن تائیں انتظار کریندا رہیاں ہمیشاں میتھوں چھڑیندا نہ۔ ایہہ ہن پیا ہے تے ڈنڈ کے نال میں ماریا ہے تے ہن آ کے کجھ سدھڑا ہو یا ہے۔“ نعرے وگ گئے۔

پیر گھر آکھیا بھئی ایہہ بندہ جوں اتنی طاقت دا مالک ہے تے ایہہ غریب تاں اتھے بھٹکھا مر گیا۔ اوس گھر آکھیا، ”سیر باداماں دا مغز، تے سیر مکھن ایس دا ناشتہ ہووے۔ پہاڑو ایہدی خوراک بنائیو۔“ ناشتہ آگیا۔ اوس واپس کر چھڈیا۔ پیر آپ چوا کے آگیا۔ ایہہ بھئی کھانا پوسی بھور سلطان۔ اوہ رو پیا۔ اوس آکھیا، ”جی! تسیں مینوں پورا جاندے نیہے۔ شاہ دارے دا جرنیل سُنیا ہو یا نیں غیرت خان پٹھان۔“ اکھے، ”بیرم خانی۔“ اکھے، ”جی آ۔“ اکھے، ”میں اوہو آں۔ جتنے تائیں امیرت کیتی ہے ایہناں باداماں دا تیل نکلیا ہو یا اساڈیاں ہانڈیاں پٹھ بلدا ہا۔ سیجاں پھلاں دیاں ہوندیاں ہان، جیس تے سوندے ہاسے۔ گلاب دے عطراں نال نھاوندے ہاسے پر جیہڑی چیز زمین تے سُنتیاں تے ایس مصلے وچ ہے ایہہ اوہناں محلاں وچ نہیں لکھی۔ جیہڑے سیر اتھے کیتن ایہہ اودے محلاں وچ نصیب ای ناہن۔ ایہناں چیزاں نوں میں ترک کر چھڈیا۔ بس ایہہ پین

دا ٹکرتے زمین تے سنونتا تے ذکر سکھنا۔“ مڑ اوہ اوتھے ای مویا تے اج تائیں اُچ بلوط
وچ بھور سلطان داروضہ کھلوتا ہے۔

”راج کہانی“ بارے کچھ گلاں

لوک کہانیاں وچ نرا جیاں دیاں خوشیاں، خواہشاں، سدھراں، محرومیاں، ہرکھاں، پڈکاں، ساڑے، پریت، وسیب، جیون، رسماں ریتاں دا دکھالا ای نہیں ہوندا سگولں ایہہ تخیل راہیں دی ہک جہان اُساں دیاں ہن، جیہڑا جیون ساویں وسیبی مورتاں اُگھاڑا ہے۔ ایہناں وچ اجیہی سک وی ہوندی ہے کہ شالا جیون انج ہوونجے۔ ایسے پاروں لوک کہانیاں دا گھیرا بہوں موکلا ہوندا ہے۔ لوک سیانیاں ایس وصال کھیترون ویاکھن پڑتالں کان ایہدی ونڈ کیتی ہوئی ہے۔ ایس ونڈ وچ لیجنڈز خاص طور تے اُچھتا رکھدیاں ہن۔ لیجنڈز دا مڈھلا دھرا تواریخ ای ہوندی ہے تے ایہدے گھیرے وچ نشا بھر پاتر، سنت، گورو، پیر، فقیر، سورمے تے رومانی کہانیاں دے پاتر وغیرہ آوندے ہن۔ لوک کہانی مڈھلے پکھوں کلا ای ہے۔ انج تخیل دی رگن وچ رنگیا ہونا اچنبھے والی گل نہیں ہوندی۔ لیجنڈز دابی بھاویں تارخ وچ ای ہوندا ہے پر ایہدے اُتے ہر پیڑھی دیاں سدھراں دالیپ چڑھدا رہندا ہے۔

”راج کہانی“ دا گھیرا پنجاب تیکر ای سنگڑیا ہویا نہیں سگولں ایہدے وچ بر عظیم دی رنگا رنگی ویکھی جاسکدی ہے۔ ”رام چندر“ دی کہانی متھہاسی ہے یاں اتھاسی، پر سنسکرت دے کلاسیکی ادب وچ ایہدی اُچھتا ہے تے ”رامائن“ دے پرچھاویں بر عظیم دیاں وڈیاں لکھتاں اُتے سہج سبھا ویکھے جاسکدے ہن۔ راجا کرنال دا سانگا بُدھ ادب نال ہے تے بُدھاں کول ایس سبھا دیاں کئی ہور کہانیاں وی ملدیاں ہن۔ کرنال دیاں اکھیں ٹیکسلے وچ کڈھیاں گئیاں تے او تھے بُدھ بھکشواں نے اوہدا ستوپا بنایا۔ مناکھے

پنجابی سُجھا کھے ہون دی پڈک لے کے اج وی اوتھے ویندن۔ کرنال نال ورتی صدیاں توں
 پنجابی لوک ریت دا انگ بن چکی ہے۔ راجا بیربل، مُلاں دو پیاڑہ تے تان سین اکبر دے
 درباری پاتر ہن، پر اپنے گُناں تے ذہانت پاروں بر عظیم دیاں لوک ریتاں وچ ایہناں دا
 مُہاندرا ویکھیا جاسکدا ہے۔ رادھا بھٹیانی دا پاتر وی اکبر داسکالی ہے، جیہڑا کتاباں دی
 ڈھاکے بھاویں گھٹ چڑھیا ہے، پر راجستھانی لوک ریت دے کئی پاتر ڈھول بادشاہ،
 جیمل، پھتا، سارنگ، کمال پنجابی لوک ادب دا انگ بن چکے ہن۔ بھور سلطان دلی دا واسی
 ہے تے اوہدا روضہ سندھ وچ ہے۔ سعد اللہ خاں چنیوٹی تے سید عمر ہی اجیہے پاتر ہن،
 جیہڑے پنجاب واسی ہن۔ سعد اللہ خاں ستارہویں صدی دے بر عظیم دا سرکڈھواں پاتر ہا
 تے شاہ جہاں دے بہت نیڑے۔ اوہ فارسی دا لکھاری وی ہا۔ سعد اللہ خاں تے اوہدی
 اولاد پیکے دیس چنیوٹ نال واہ رکھیا تے لوک ریت نے اوہنوں سینے نال لائی رکھیا۔
 شبدان دے ہیر پھیر نال فارسی لکھتاں وی اوہدی دانائی دا ہنگارا بھریندیاں ہن۔ اتھے
 بر عظیم دے سانجھے پاتراں نوں نروارن دی لوڑ ایس توں وی پئی ہے کہ ہک پیڑھی پہلاں
 ایہہ پاتر اُکا اوپرے ناہن تے مُلکی ونڈ مگر لیاں پیڑھیاں جیہڑا ”قاعدہ“ پڑھیا اوہناں کان
 وں سنباپے۔ اُنچ کلپنا تے اچیت اجیہاں ونڈاں دا بالا ملاحظہ نہیں کریندے۔

انگریزی راج توں پہلاں دے بر عظیم دی ایہہ وڈیائی ہا کہ اتھے ترینبے کلاسیکی
 زبانان سنسکرت، عربی تے فارسی دی سکالرشپ موجود ہا۔ سنسکرت تے فارسی تاں صدیاں
 تیکر ایتھوں دیاں سرکاری زبانان وی رہیاں۔ جیہناں جو ہاں وچ لکھتی تے زبانی دوویں
 ریتاں موجود ہون اوتھے ایہہ ساٹکا دولا ہوندا ہے۔ رام چندر لوک ریت چوں نکل کے
 کلاسیکی لکھت دا سرناواں بندا ہے تے وت ”رامائن“ دے پرچھاویں پٹھ لوک ریت دا۔
 انجیں وانگوں کرنال سنسکرت دا پاتر ہے وت بر عظیم دی لوک ریت دا انگ بندا ہے۔ مغل
 درباریاں وچ وی ایہہ گل سچ سچا ویکھی جاسکدی ہے۔ اتھے ایہہ گل چیتے رکھن والی ہے
 کہ ایہہ پاتر درباری ریت دا حصہ ہن ایسے پاروں سنسکرت تے فارسی نوں وارا کھاندے
 ہن تے لوک ریتاں نوں اپنے حساب موجب۔ اُنچ راج بولیاں وچ نمایاں دی بھٹک
 اوکھی ای پیندی ہے۔

موسیقی سارے جگ دی اُچھی تے سنجھی کلا ہے پر بر عظیم وچ ایہوں عبادت دا
 درجہ دتا گیا ہے۔ کُن آپوں وی الاء ہے۔ الاء ای سُر دا مُڈھ ہے۔ لوک الاون جدوں
 سگھڑاں تیکر اپڑدا ہے تاں ایہہ کلا دی ٹیسی مل بہندا ہے۔ جدوں سگھڑ شاہی تھا پڑے پٹھ
 آوندے ہن تاں لوکائی توں واڈھے تھی ویندن۔ تان سین درباری گویے دی کلا دا وی
 سدیاواں رنگ تدوں جدا ہے جدوں اوہ شاہی تھا پڑے چوں نکل کے وت لوکائی نال جُودا
 ہے۔ دُونیاں کلاواں وانگوں اتھے وی نوک تے کلاسیک دی سانجھ دوہری ہے۔ نوک
 توں کلاسیک پھٹدا ہے تے کلاسیک دی سدا حیاتی ایسے وچ ہے کہ وت لوکائی وچ آن
 رلے۔

اساڈی جاچے اُتلے میل دے درباری پاتراں کان لوک ریت دا بُوہا تاہیں
 گھلدا ہے کہ ایہناں دا سانگا بندیائی نال ہے۔ ایہہ اپنی سوجھ، ذہانت، محنت نال جیون
 دے وڈے دھارے دا حصہ بندے ہن۔ بیربل، مُلاں دو پیازہ، تان سین تے
 سعد اللہ خاں چنیوٹی مڈھوں نمائے گھراں دے جی ہن۔ شاہیاں تے وڈیاں تلوار دے
 ٹل اُتے نہیں کھلیاں ہوندیاں۔ ایہناں دے تھم علم، کسب، کلا تے کُن ہوندے ہن۔ انج
 میلاں نالوں وی ودھ وڈیا کُن دا ہوندا ہے تے ایہناں دے مقابلے اُتے بادشاہ چھوٹے
 لگدے ہن۔ کوئی وی وسیب بکواسا نہیں ہوندا تے اوہدے وچ جیون دی رنگا رنگی ہوندی
 ہے۔ نہ جی سادہ ہوندا ہے تے نہ ہی وسیب۔ ایہہ اپنے دُپیٹراں نال اگے نوں پنہ
 کردے ہن تے جیون دی امیری دا کارن بندے ہن۔ ایچھے پاتر راج و بہار دا حصہ بن
 کے لوک بھلے دی راہ کڈھدے رہندے ہن۔ سعد اللہ خاں دیاں فارسی لکھتاں وچ وی
 ایہہ مت دسدی ہے کہ بادشاہواں دی سنگت وچ تدوں ای خوشی لہج سکدی ہے کہ لوکائی دا
 بھلا کر سکیوے۔

ایہناں کہانیاں دا ہک وڈا کُن مذہبی وکریاں توں اُچیریاں ہونا ہے۔ بر عظیم
 صدیاں توں اڈواڈ مذہباں دا وسیب گنیا جاندا رہیا ہے۔ ظاہر ہے ایہدی نینہہ ایسے سوجھ
 تے اُسری ہا کہ دُونے دے مذہبی وچاراں دا آدر کیتا ونجے۔ ایہو کارن ہے کہ سنتاں،
 سادھواں، صوفیاں، فقیراں دی سوجھ نندیا دی تھاویں پریت اُتے کھلوتی ہے۔ عام جی

جیہناں دا جیون لا بھال وچ نہیں لیڑیا ہوندا اوہناں نوں ایہہ دھارا وارا وی کھاندی ہے۔
 اساڈے کتھیاں کول رام چندر، راجا کرنال، راجا بیربل تے تان سین ورگیاں کہانیاں
 لکھدیاں ہن، جیہڑیاں ایس گل دا ہنگارا بھریندیاں ہن کہ سانجھے وسیب وچ ایہہ سبھے پاتر
 آدر یوگ ہان۔ رام چندر دی کہانی نوں بھاویں ہندو متھاس نے سینے نال لایا ہویا ہے،
 پر اتھے کسے مذہبی بانے دی بندیاں سرانہا نہیں کیٹی گئی سگوں جیون دے وڈے معنے
 اُگھاڑے گئے ہن۔ ہک بیڑھی دے اوہلے مگروں اساڈے وسیب جیس اک دا بالن بنے
 ہن، ایہہ کہانیاں اوہناں ویکریاں اُتے ترونکے داکم وی پیاں دیندیاں ہن۔

”راج کہانی“ دھرتی دے اقداری نظام دی مورت ہے تے مُڈھلے انسانی
 جذبیاں آل اساڈا دھیان کرواندی ہے۔ جیویں ساڈا مُڈھ توں بندے نال جُویا ہویا ہے۔
 کیکنی تے شکنتلا ایس اک وچ دُکھدیاں رہندیاں ہن۔ مترئی ماں نوں وی سکیاں
 وانگوں جاننا تے اوہدے ظلمناں نوں سبھ کے وی آدر وچ بھورا فرق نہ پون دیونا۔ الزام،
 بہتان تے دھوکھا وسیب دا ہمیش توں حصہ رہے ہن۔ اجیہی صورت وچ سچ دا سنگ نبھاون
 والے اوکھی گھاٹی وچوں لنگھدے ہن، پر جت اوڑک سچ دی ہوندی ہے۔ ایس رویے دی
 نشا بھر مثال رادھا بھیشانی ہے۔ وِن دوسی سیتا دا اُدھالا تے پھیر رام دا اوہنوں سوانی من
 لینا وی سوانی آدر داسنیہا ہے۔ کجھ رام کہانیاں وچ ایہہ جاننیاں وی کہ سیتا وِن دوسی ہے،
 رام اپنی سوانی نہیں مندا۔ اوہدا آکھن ہے کہ بھاویں میں رام ہاں پر دھرتی اُتے بندہ بن
 کے اُتریا ہاں تے ایہتوں دیاں وسیبی قدراں دی اُلانگھنا نہیں کر سکدا۔ اُنچ رام کہانی آپوں
 ہک وکھرا جہان ہے تے متھہاسی سمیاں توں لے کے ہُن تیکر ایہدے نال کئی واقعے
 گنڈھے گئے ہن۔ اساڈی جاچے تاں ایس کہانی دا پرچھاواں اساڈے وسیباں اُتے اپنا
 گوڑھا ہے کہ اج وی کجھ ٹابریاں وچ باہیں مٹراون دی ریت دس پیندی ہے۔ گل کیہ کام
 دا اُبال، اقتدار دی خواہش، وفاداری، ذہانت دی وڈیائی، دیس پیار تے ہور کنے ای
 موضوعاں نوں ایہناں اپنے کلاوے وچ لیا ہویا ہے۔ جیون دے ایہہ رنگ اج وی دیس
 واسیاں دے گل اچیت وچ پے وکھالی دیندے ہن۔

کہانی وار فرہنگ

رام چندر:- سورج بنسی: راجپوتان دی ہک لڑی جیہڑی اپنے آپ نوں سورج دی اولاد دسدی ہے۔ اوتار: پریشور دا بندے دے روپ وچ دھرتی تے آونا۔ تھ: نیل گاڑی دی ہک قسم۔ بھنے: نسے۔ اوہراں: ایدھر۔ کاج: شادی، شادی دیاں رسماں۔ سوئمہ: کائی شرط پوری کرن گروں کڑی دا خاوند چن لئی ہک رسم۔ سانگ: نیزہ۔ راج کل: راجپوت گوتاں دی ہک ونڈ۔ بن باسی: جنگل واسی، جنگل وچ وسیرا۔ ڈھٹا: ڈگیا۔ غنیم: دھاڑوی، لٹیرا، ویری۔ ہٹ: تھک، تھکیرا۔ چکی جھوپ جانا: (مح) ساڑے توں سہمہ نہ سکنا۔ کڑا مارنا: کسے پوتر ہستی دا دائرہ مارنا تاں جو اوہدے اندر کوئی شے نہ آ سکے۔ جمیل: زنبیل۔

راجا کرنال:- تڑٹ: ٹٹ۔ مستجاب: پروان۔ پڑتنا پاڑنا: بھیت ظاہر کرنا۔ سورے: پکارے۔ بھیر: اوکھ۔ سدھا وسیں: توں سدھا ویں گا۔ ڈڑھی: ڈیہی۔ آدری: آدر کرتا گیا۔ سلجی خانے: اسلحہ خانہ۔ دل: لشکر۔ سگھر: چنگا گھر، دفاعی پوزیشن۔ اوجن: اوجے تک۔ چونڈا: سوانی دے سر دے والاں دا جوڑا۔ نکھوڑیا: نکھوڑیا، وکھ وکھ کیتا۔ کریہاں: کریہیل، پیوں دا اٹھ۔ ٹھل: تر۔ رسائی: صلح۔ قندیل: ہک قسم دی شمع۔ سدا: سوندا۔ تھپک: تھپک۔ دھوتن: دھیری۔ ڈھپوے: ڈھیوے، جسے۔ وگیندا: وجاندا۔ پرٹاکیاں: ٹاکیاں دے اُتے ٹاکیاں لگیاں ہونا۔ ڈک: روک، اوہلا۔ ہڈھاں: بچھاں۔ دھاوندی: دھاوا کردی، سرایت کردی۔ اورے: ہننے تاں۔ دیو بھرے: دینہہ اُبھرے، اگلا دن۔ النکھ جگاؤن: جوگیاں دا اک خاص انداز وچ خدا داناں لے کے بھیک منگنا۔ مسہری: اچھا پلنگ جیہدے پاسیاں اُتے پردے بنائے جاندے ہن تاں جو مچھردانی گھستی جا سکے۔ چنویا: چچی کے ڈھٹا۔

برک: چیک۔ اوتر: لاو لدر۔

راجا بیربل:- ویکھیندا: اُتانا: ستیاں اُتاناہہ ول نوں مونہہ ہونا۔ دمدے: قلعے دا بُرج۔ شوہ پر: چُھاں۔ ٹکا: مالیہ، ٹیکس۔ تلک: متھے اُتے رنگدار نشان بناونا۔ گُٹکھ: داغ، دھبہ، بدنامی۔ بادرے: بدل، بادل۔ گُچا: چھاتی، لپتان۔ ابھیمان: غرور، تکبر، گھمنڈ۔ کامنی: سؤنی سوانی۔ کوہی: شکاری پرندہ۔ ات: ایس پاسے، انج۔ پدھ: طریقہ، راہیں۔ دھرنگا: پنجر۔ گُندر: کھڈ۔ پلوا: بلی۔ سوہا سوہان: خبر رکھن والا، گُتا۔ کتیاں: غلیظ۔ گگن: آسمان۔ سس: چن۔ لسکانا: لٹکانا۔ اَدھراں: تھلے، پٹھاں۔ بھنیوس: ہوئیوس۔ مدرس: مٹھاس، مٹھاپن۔ داروگی: دا روغی۔ یاکی: باغی۔ دھڑل: بھاری شے ڈگن دی واج۔ لُوڈ: لاڈ۔ ڈھینا: ڈگنا۔ مینگھ: مینہ وساون والا بدل۔ رکل: کول دیاں سُرلیاں سُرراں۔ کھیوت: کھمن، بجلی دی لٹک۔ جُو لے: گھوڑ سواری سسے گھوڑے نال نال ٹورنے۔ دھانور: دھا آون۔ اہیلا: ایہہ لا۔ اگیرڑے: تھوڑا جیہا اگے۔ کلجگ: ہندو متھالوجی موجب دنیا دا اخیر لا دور، بھیڑا زمانہ۔ ست جگ: ہندو متھالوجی موجب دُنیا دا پہلا دور، چنگا زمانہ۔ پرنا: ویاہ۔ ایکھاں: ویکھاں۔ اٹاری: ماڑی، چبارا۔ گھھر: پسینہ، پھدھی: پھڑی۔ پپلا: تلوار دی انی یاں نوک۔ این: انی، شہتیریاں بالے دا سرا۔ چوکیدا: چوکدا، روٹی نال خون دا قطرہ پولا جیہا صاف کرنا۔ کوپر: کھوپڑ۔ آر: وانگ۔ سُنک: سنک، نک صاف کرنا۔ ہُت: آرام، سکون۔ اُچھڑ: مک، ویہلے۔ بوتھاڑ: بوتھا، چہرہ۔ اودائیں: اوسے پاسے۔ ہوڑیوس: اوس منع کیتا۔ کھچر: کھونچر، گھاگ۔ پنڈے: بینڈے، جھینگر۔ ٹونے: جنور دے گل بدھی ٹلی۔ تھہراے: تھراے، سکون، ٹھہرا۔ دھرک: چھال۔ بھر بھٹے: بھروٹے، بھواں۔ بھبھوت: بھبھوت، سواہ۔ وچلی: ورجی، بہلنا۔ سناہ: کسے نشانی یاں بیتی دا حوالہ دے کے سنیہا دینا۔ کنگ: پتلی لسی۔ کھلڈ: کھل، بوجھی، وڈی بوری۔ پنھاکا: پناک، پتلی لسی، لسی پیون دا شوقین۔ وڈنڈی: نکي کدھولی، کوٹھے دے بنیرے وغیرہ واسطے وی ورتیا جاندا اے۔ چھنڈک: تَبکا۔ ترکایا: گندا کیتا۔ ڈل: پرانا کھوہ، اُجڑیا کھوہ۔ جین: کھوہ دی گار۔ سُنکا: پھٹ وچ پانی پین مگروں چڑھی سوچ۔ ہونگ: پیڑ پاروں مونہوں نکلی ہوئی جیہی واج۔ اُکا نہہ: ہک رُکھ، ہوا گھلیاں ایہدے وچوں شوکر دی آواز آوندی اے۔ لوتھ: لاش۔ جھوس: جُجھ، جھٹکا۔ کھرجی: گھوڑے

دی کاٹھی نال بنھیا تھیلا۔ ونہوا: کوئی ہتھیار، ہتھوں چھڈ کے مارنا۔ بھیاں: بھجا دی جمع، پٹ تے مٹانے دے درمیان والی ہڈی۔

ملاں دو پیازہ:۔ پندی: بھیک مندی۔ جھڑکندی جھڑکاں دیندی۔ چھٹا کو: پھرتیلی۔ کوڑیل: کاوڑ والی، غصیلی۔ وٹ پکاونا: وٹاونی کرنی، مٹی دے ڈھیلے نال چھوٹے پیشاب دے قطرے روکنے لڈھی: لالچی۔ تپسیا: عبادت۔ پٹن: پانی وچ اُگن والا پھل۔ وٹاڑھ: کپاہ دا بوٹا۔ جل: پانی۔ مہری: سوانی۔ رینڈی: خربوزہ۔ ریڈھ: وٹ، ڈکھ۔ صیقی گری: ہتھیار صاف کرن والا، پان چاڑھن والا۔ بھیں: پھیر۔ اودائیں: اوسے پاسے۔ مٹس: ٹھگیا گیا۔ ولا: ولچا۔ وچھونا: مجھ بنھن دا عام جیہا کپڑا۔ جٹ: چمبڑ۔ چھوچھ: لمکے ہوئے بلکھ۔ اڈھوں: ایس توں۔ ساء: ذائقہ۔ آہنی: آکھنی، آکھدی۔ رڑھ: ہتھیاں تے گوڈیاں دے بھار اُتے ٹرنا، رینگ۔ رڑیا: اُٹھ مستی بھری آواز کڈھی۔ سرسا: چنگا۔ ڈھل: ڈھل، لڑھک، بازیے توں میری ہو جا۔ پاسیا: پانسیا۔ چوپڑ: چوپٹ۔ رس: صلح۔ پنپیاں: پکاں۔ پرنی: ویاہی۔ تروڑی: توڑی۔ جھل: ٹکڑا، ٹکڑا۔ ٹھوٹا: گھٹ ہویا۔

تان سین:۔ ستھ: تھاں، تھاہر۔ سُمریاں: سم، مقرر تال، جتھوں دوبارہ سُمریاں تال ول پرتی دا ہے۔ چوبچا: اولوں، نکاح۔ گُر: جتھے لے تے سُرمل کے مکدے نیں اوہنوں گُر سدیا جاندا ہے۔ جھنگٹاں: جھنگٹ، جھنگار، کھوہ وگن دی آواز۔ وٹا: وٹا۔ گرا: اتنا وزن جیہدا کپڑے وچ بنھ کے پشت اُتے رکھیا جاسکے۔ گوہے: پھوسی، تھاپی۔ کھریڈ: کھریڈ، پھٹ دا سکا چھلکا۔ وگیندیاں: وجاندیاں۔ گمدی: گاوندی۔ پونجھ: بروڑیاں: وڈی پھنسی یاں پھوڑا۔ لاہم: پاسا، طرف۔ دپے: دتا جاوے۔

رادھا بھٹیاہنی:۔ ڈھہندن: ڈگدے نیں۔ کرولی: گلی۔ بھنئی: بھانجی۔ مُندرنا: کن دا زیور۔ پمدی: پندی۔ جڑتل: نگینہ کاری۔ مریلے: مارن والے۔ کھونیاں گالنا: بہت زیادہ جانی نقصان ہوونا۔ کچ: گوڈے دا اندر لا حصہ۔ اُبھڑ بھا: اُبڑواہ۔ پھدھن: پھڑن۔ اگاڑی: گھوڑے دے اگلے پیراں دیاں رسیاں۔ پچھاڑی: گھوڑے دے پچھلے پیراں دیاں رسیاں۔ گرکی: غرق ہوونا، ڈُب جاونا۔ مرداواں: مرداں والا۔ کوئی: چمڑے دا نکا مشکیزہ جیہدا اسوار ہنے نال ٹنگدا ہے۔ کلاؤت: موسیقی دا ماہر۔ بھلکے: بھلک، آون والا کل۔

کڈھینی: کڈھاونی۔

سعد اللہ خاں چنیوٹی:۔ دھول: محل، ماڑی، راج مندر۔ کاوڑ: کوڑ، غصہ۔ اوہراں: ایدھر۔
مُد: مدت۔ چیریاں: چوڑیاں۔ ترکلیاں: لکاں۔ گھول: گشتی۔ تنیاں: تیری ای۔ لکھنے:
تصویراں بناونیاں۔ دورا: دوری، لون مرچ، بھنگ، سردائی گھوٹن والا بھانڈا۔ مڈاٹھ:
دروازے دی تھلے والی موٹی لکڑی۔ ہوئیں: توں ہوویں گا۔ ونگ: داء۔ مرانو: مریلا، مارن
والا۔ کڑ: کڑیاں، لوہے دے کڑے۔ دھوبی چھٹ: دھوبی وانگوں چھٹنا، کشتی دا ہک داء۔
بوکے: بوکا، چمڑے دا ڈول۔ سوانج: پروگرام۔ بھیریں: بھیر، وڈا نقارہ۔ تڈ: زور۔
جھڑوں: جھریٹ پا کے، ہلکی جیہی خراش نال۔ چلا: کمان دی تانت۔ ترپ: پچھلیاں
دوواں لتاں اُتے وزن دے کے تے اگلیاں لتاں سینے نال لا کے پٹنا، جنگی گھوڑیاں نوں
سکھائی ہک چال۔ ملاک: بہوں ترکھے ٹورے تے ہولی ٹورن دے وچکار گھوڑے دے
چلن دی ہک چال۔ نسا: کھوہ دا پاڑ چھا۔ جھل: کھوہ دے اُتے رکھی مضبوط لکڑی۔ چنھ:
تیراں نال کسے خاص شے نوں نشانہ بنائی رکھنا۔ ٹھڑکدا: اُکدا، بھلدا۔ مودھائی: مودھیاں
کرنا، اُلٹا دینا۔ کوڑھیاں: کوچھیاں۔ کبیریاں: کانیاں۔ پھہوڑا: لکڑی دی کہی، کوچھی قلم۔
بھور سلطان:۔ نیوٹا: نیپا جانا۔ دھروڑ: نس، گھوڑے وغیرہ تے نس جانا۔ کھٹی: میل
ملاقات دی اخیرلی حالت۔ ویدا: دتا جاندا۔ پونیا: پرویا۔ ہوں: واں، آں۔ بھانور:
مشابہت۔ جال: ٹھہریا ہونا۔ چوکھڑے: چوکھے توں، بہتے۔ رڈاٹ: وچھیاں دی واج۔
پہارو: بھیدیاں، بکریاں۔

سوے

مڈھلے سوے

غلام رسول میراٹی۔ ”رادھا بھٹیانی“۔ جلال پور بھٹیاں۔ تحصیل پنڈی بھٹیاں۔ ضلع حافظ آباد۔ 2 اکتوبر 2009ء۔

- کمال دین، میاں۔ ”بھور سلطان“۔ کوٹ امیر۔ تحصیل لالیاں۔ ضلع چنیوٹ۔ 27 دسمبر 1993ء۔
 --- ”راجا بیربل“۔ کوٹ امیر۔ تحصیل لالیاں۔ ضلع چنیوٹ۔ 2 جولائی 1995ء۔
 --- ”راجا کرناں“۔ کوٹ امیر۔ تحصیل لالیاں۔ ضلع چنیوٹ۔ 26 دسمبر 1996ء۔
 --- ”رام چندر“۔ کوٹ امیر۔ تحصیل لالیاں۔ ضلع چنیوٹ۔ 6 اپریل 1991ء۔
 --- ”سعد اللہ خاں چنیوٹی“۔ کوٹ امیر۔ تحصیل لالیاں۔ ضلع چنیوٹ۔ 26 جون 1994ء۔
 --- ”ملاں دو پیازہ“۔ کوٹ امیر۔ تحصیل لالیاں۔ ضلع چنیوٹ۔ 25 جون 1994ء۔
 نذر میراٹی۔ ”تان سین“۔ بھوانا۔ تحصیل بھوانا۔ ضلع چنیوٹ۔ 26 اگست 2002ء۔

پنجابی رسالے

- سعید بھٹا۔ ”بھور سلطان“۔ ماں بولی 3-8.2 (1996ء): 11-14۔
 --- ”تان سین“۔ ترجمہ 1.1 (2006ء): 89-94۔
 --- ”راجا بیربل“۔ ساہت 4.4 (1998ء): 209-216۔
 --- ”راجا کرناں“۔ ساہت 3.3 (1997ء): 229-235۔
 --- ”رادھا بھٹیانی“۔ سنگری 1.3 (2012ء): 70-78۔
 --- ”رام چندر“۔ پنچم (کتاب لڑی) (1998ء): 52-55۔
 --- ”نواب سعد اللہ خاں چنیوٹی“۔ ماں بولی 7-7.6 (1995ء): 12-28۔

ناں

تیمور 82	اچھراں رانی 9,11
ٹیکسلا 16,20,22-5,103	احمد خان بھٹی 71-5,77-9
جسرت 9-11,13-4	احمد خان (دیکھو احمد خان بھٹی)
جشید 90	احمد، دادا 70
جودھا بائی 34.37.40	احمد بھٹی (دیکھو احمد خان بھٹی)
جیل 104	احمد (دیکھو احمد خان بھٹی)
جے سنگھ راجپوت 98	اشوک، راجا 16,18-20,23-4
چوچک 27	اعظم خان خاٹھانے نواب دا 98
چو غطیا 27	اکبر اعظم (دیکھو اکبر)
حیدر 93	اکبر جلال دین (دیکھو اکبر)
دارا 80, 98, 100-101	اکبر 16,33-5,37,40-41,43,53,55,58,
دارے (دیکھو دارا)	65-71,74,77-9,104
دوش 12-3	امیر خسرے 35
دہنسر (دیکھو راون)	اورنگ زیب 80, 98-100
ڈھول بادشاہ 104	بابر 52,82
رادھا بھٹیانی 71-2,104,106	بھٹی 72
رام چندر 9-14,103-4,106	بھوج، راجے 49
رانجھا 27	بھور سلطان 98-102,104
راون 12-4,49,96	بیربل (دیکھو بیربل راجا)
روپ نکھا 12-3	بیربل،
رستم ایران 91	33,36-44,51,53-5,60-61,104-5
رستم ہند 87	بیرم خان 33-4
زین العابدین قطب کمال 100	بیرم (دیکھو بیرم خان)
سارنگ 37, 104	پھتا 104
ساہ دیو 9,11-2,14	تان سین 36,65-7,69,104-5

کھر 12-3	ستونقی 47-8
کیکئی 9-10,106	سجاوا اعران 43
گد، رائے 35	سی 26-7
لچھن 9,11-4	سعد اللہ خاں چنیوٹی
لکھی 44-51	80-81,83,90-92,94-7,104-5
محمد خان پٹھان 71-2,74,77-9	سعد اللہ (دیکھو سعد اللہ خاں چنیوٹی)
محمد عمر (ملاں دو پیازہ)	سعد الے (دیکھو سعد اللہ خاں چنیوٹی)
مرجیا (دیکھو مرزے خان)	سکندر اعظم 16
مرزیا (دیکھو مرزے خان)	سلطان 80
مرزے خان 44,50,86	سیتا 10-14,106
مٹھے دھاڑیوال 66,68-70	سید الیاس 84-90
ملاں دو پیازہ 52-3,63-4,104-5	سید عمر 84-87,91,104
ملاں (دیکھو ملاں دو پیازہ)	شاہ
نواب سعد اللہ خاں (سعد اللہ خاں چنیوٹی)	جہان 80-81,83,94,96-7,104
نوشیرواں 90	شاہ دارا (دیکھو دارا)
نکل 9,11-2,14	شاہ شجاع 80
وجھل 44,86	شاہ مراد 80
ہمایون 52-3	شکستہ 18-9,23,25,29,31-2,106
ہنومان 14	شیر شاہ سوری 52
ہیر 27	طہما سپ 52-3
یوسف 49	علی حیدر 85-6
	غلام فاطمہ 68-70
	غوث تان سین (دیکھو تان سین)
	غیرت خان (دیکھو بھور سلطان)
	فضل شاہ 74
	قادر یار 49
	کرشن مہاراج 37
	کرنال راجا، 16-20,22-6,28-30,103
	کمال رائے، 37,104

تھاں

دلی، 6-74، 9-68، 66، 53، 33	اجودھیا 2-11، 9
80-82، 85-6، 88، 97، 104	انبالا 33
ساندل بار 66	ایران، 8-85، 81-80، 3-52
سراندیپ 12	90-91، 97،
سندھ 20، 100، 104	اُچ بلوط 100، 102
شاہ جیونا 84، 100	اُڑیسہ 2-61، 55
شاہ جیونے (دیکھو شاہ جیونا)	برہمن (دیکھو ہند)
غزنی 81	بلوط 100
قلعہ قنوج 19	بنارس 16، 23، 26-7، 30
قلعہ گڑھ چٹوڑ 37	بنگلہ پیراں 66
قندھار 34، 60-61	بھنیر 72، 74-5، 79
کوئلہ فتح اللہ شاہ 84	بیجا پور 98
کچ 27	برجیاں 66
گنگا 54	بج وئی 12
لال قلعہ 33	پنجاب 4-103، 80
لکھی وال بھٹیاں 37	جمنا بازار 39
لکا 12، 14، 96	جھنگ، ضلع 69
لہور 66	جھنگ 27
مٹھراگری 37	چندن وٹ (دیکھو چنیوٹ)
نجد 52	چنیوٹ، تحصیل 69
ہندوستان (دیکھو ہند)	چنیوٹ 66، 80، 97، 104
ہند 5-103، 4-97، 88، 38	دلی جہانا باد (دیکھو دلی)
یمن 52	

ایسے ہتھوں

- 1- چن چھاں دے لہور: پنجنڈا کیڈمی 1990ء
- 2- کلیات شاہ عظیم لہور: پاکستان پنجابی ادبی بورڈ 1991ء
- 3- سرساویں رتی پریت لہور: پاکستان پنجابی ادبی بورڈ 1993ء
- 4- سانجھ وچار لہور: اے۔ ایچ پبلشرز 1997ء
- 5- سانجھ سرت لہور: اے۔ ایچ پبلشرز 1997ء
- 6- نین نہ رہندے تکلنوں لہور: اے۔ ایچ پبلشرز 2000ء
- 7- نہ جھنگ چھٹیا نہ کن پاٹے لہور: سانجھ 2005ء
- 8- کمال کہانی لہور: سانجھ 2006ء
- 9- دیس دیاں واراں (پہلی جلد) لہور: پنجاب انسٹیٹیوٹ 2007ء
- 10- نابہ کہانی لہور: سانجھ 2010ء
- 11- بار کہانی لہور: سانجھ 2011ء
- 12- راج کہانی لہور: سانجھ 2013ء

سانجھ دیاں کتاباں

320 روپے	مرتب: ممتاز بلوچ	ہودے بیت
350 روپے	امرتا پریتم	کاغذ تے کینوس
140 روپے	مشتاق صوفی	پیٹھ وگے دریا
160 روپے	مشتاق صوفی	تاء
100 روپے	مشتاق صوفی	مٹی داماس
120 روپے	غلام حسین ساجد	سرسوتی توں راوی تائیں
160 روپے	غلام حسین ساجد	کسے سُنے دے نال
120 روپے	غلام حسین ساجد	نیندر بھنی رات
240 روپے	ریاض احمد شاد	کھلارا
140 روپے	نسرین انجم بھٹی	اٹھے پہر تراز
200 روپے	محمد منشا یاد	وگدا پانی
200 روپے	سعید بھٹا	کمال کہانی
140 روپے	سعید بھٹا	نابر کہانی
300 روپے	سعید بھٹا	بار کہانی
36 روپے	سعید بھٹا	نہ جھنگ چھٹیانہ کن پاٹے
300 روپے	فضل فرید لالیکا	چچھ پتر
80 روپے	1857 دی جنگ آزادی وچ وٹواں دا حصہ/ظہیر وٹو	
130 روپے	محمد آصف خاں/فیاض مگھیانہ	سانجھی پیڑ
260 روپے	ممتاز بلوچ	چچ دے دوہڑے
130 روپے	وسیم گردیزی	رنگ رس
120 روپے	جسوندر سنگھ	گھر دا جی
200 روپے	فضل احمد خسرو	وفاواں عشق دیاں

راج کہانی اساڈی دھرتی وچوں پنگریاں
کہانیاں دے کھیت وچ سعید بھٹا دی چوتھی
کتاب اے۔ ایس توں پہلاں ایس اوہناں دیاں
سودھیاں ہونیاں ایس وڑھی دیاں ترائے کتاباں
”کمال کہانی“، ”نابر کہانی“ تے ”بار کہانی“ چھاپ
کے ورتا بیٹھے آں، جیہناں دی بھناں، داناواں،
ووداناں تے پارکھاں بہوں سلاہنا کیستی اے۔ اسانوں
پک اے ایس دی وی جگ کولوں ڈھیر ماتا ملسی۔



”کمال کہانی“، ”نابر کہانی“ تے ”بار کہانی“ وانگوں ”راج کہانی“ دات وی دانش، دلیری، حق
تے انکھ جیہے وسباں نوں تارنا اے۔ ایہہ کتھاواں اساڈے وڈکیاں دے مہاژنوں سیانن تے اپنی بھونیں
تے وسیب نال اوہناں دی پیڑی جڑت دا گوہ کرن پاروں تاں نویکیاں ہے ای، اوس ان مکی دانش
پاروں وی اگھڑ دیاں نیں، جیہڑی ایس مٹی دے نرول ہوں دی بھانور دیندی اے تے جیہدے
آسرے تے اوس ویلے دے راج تے رعیت دی ہوند دا اشارہ اے۔

ادب دی رکرکھن والیاں پاروں سعید بھٹا داناں جانی پچھانیا اے۔ اوہ پہلاں پاکستان پنجابی ادبی
بورڈ وچ سیں محمد آصف خاں دے سنگتی رہے تے پچھلے ویہہ ورھیاں توں شعبہ پنجابی، اوری انٹیل کالج
پنجاب یونیورسٹی لہور وچ پنجابی زبان تے ادب دے سرکڈھویں اُستاد نیں۔ اجیہے اُستاد جیہڑے اپنے
شاگرداں نوں زرا پڑھاندے ای نہیں سگوں علم بخش کے اوہناں نوں تار دے وی نیں۔

سعید بھٹا دیاں کجھ ہور کتاباں ”سرساویں رتی پریت“، ”گلیات شاہ عظیم“، ”نین نہ رہندے
تکوں“، ”نہ جھنگ چھٹیا نہ کن پاٹے“، ”سانجھ وچار“، ”سانجھ سُر تے“ تے ”دیس دیاں واراں“ نیں۔
بھاویں لوک کہانیاں نوں سودھن، اکٹھیاں کرن تے سانسھن داکم اک بندے دانیں، مڑ وی سعید بھٹا
اپنے ایل، ٹپے تے کم دے معیار پاروں کدی پینا نہیں پیا۔ ”راج کہانی“ وچ وی تہانوں پرکھ پڑچول
دے ایہہ سارے وسب اکٹھے دسسن۔

سانجھ
SANJH
PUBLICATIONS

Book Street, 46/2 Mozang Road, Lahore, Pakistan.
Phone: +92 42 37355323. Fax: +92 04 37323950
e-mail: sanjhpk@yahoo.com, sanjhpk@gmail.com
Web: www.sanjhpublishations.com

